

ელგუჯა აღეიშვილი



იღია

და...

რკინიგზა კახეთში

საქართველოს მწერალთა, მეცნიერთა და
სახობალო მოღვაწეთა საერთაშორისო
აკადემია „ქალღმეა - საქართველო“

ელგუჯა აღეიშვილი

ილია
და...

რკინიგზა კახეთში

კუბლიკაციები კლიმენტი გობიაგას
ბიოგრაფიული რომანიდან

“ი ლ ი ა ო ბ ა”



გამომცემლობა „უნივერსალი“
თბილისი 2020

რედაქტორი - ანზორ ჯაფარიძე

საქართველოს მწერალთა კავშირის
წევრი, საქართველოს მწერალთა,
მეცნიერთა და საზოგადო მოღვაწეთა
საერთაშორისო აკადემია „ქალღეა -
საქართველოს“ აკადემიკოსი.

© ელგუჯა ადეიშვილი, 2020
გამომცემლობა „უნივერსალი“, 2020

თბილისი, 0186, ა. ჰოლიბოროსკისაძის №4, ☎: 5(99) 33 52 02, 5(99) 17 22 30
E-mail: universal505@ymail.com; gamomcemlobauniversal@gmail.com

ISBN

„არც უნიგნობა ვარგა და არც
მარტო წიგნებილამ გამოხედვა“
ილია

დღეს ხელთ მიპყრია ელგუჯა ადგიშვილის სიამაყე - „ილია და... რკინიგზა კახეთში“ (პუბლიკაციები კლიმენტი გოგიავას ბიოგრაფიული რომანიდან „ილიაობა“). ნამდვილად არ მეგონა, მადლიერ ქართველ საზოგადოებას, დიდ ილიაზე რაიმე თუ დარჩა კიდევ სათქმელი. ბატონი ელგუჯა თვისეული უთბილესი ხედვით მკითხველს გვახსენებს ერის სულიერი მამის იმ შემოქმედების სიდიადეს, რომელიც გადმოცემულია კლიმენტი გოგიავას ბიოგრაფიულ რომანში „ილიაობა“ (გამოცემულია 1973 წელს).

ბატონმა ელგუჯამ, დიდი სიყვარულით გაგვიზიარა, ერის საგანძურად აღიარებული ილიასეული ფართო მსოფლმხედველური სიდიადის განუმეორებელი შერძნებები. მწერალს მრავლად მოეპოვება კლასიკური შემოქმედების უკვდავი მარგალიტები, რომელთა შორისაცაა: „კაცია-ადამიანი?!“,

„მგზავრის წერილები“, „სარჩობელაზედ“, „გლახის ნაამბობი“, „ოთარაანთ ქვრივი“, აქვე დავძენთ პუბლიკაციებსაც: „ვიცინოთ, თუ ვიტყვით?“, „დავით აღმაშენებელი“, „რა გითხრათ, რით გაგახაროთ?“, „ქვათა ლაღადი“ და კიდევ მრავალი. ერის მამის, დიდი ილიას სიბრძნე ის ჩაუქრობელი წმინდა სანთელია, რომელიც საქართველოს მარადიულობას თავად დაუნთო და უთვალს შესთხოვა თვისი მამულის, ენისა და სარწმუნოების უკვდავყოფა.

მადლობა ბატონ ელგუჯას, რომ კიდევ ერთხელ შეგვახსენა, ალგვინთო გულები და გაგვიცოცხლა ერის უდიდესი მამა – დიდი ილია.

ანზორ ჯათარიძე.

ვუძღვნი ჩემი ქართული
ენისა და ლიტერატურის
მასწავლებლების, ძვირფასი
აღამიანების – შენია დაღუ-
ნაშვილის (ღუცხუნის 8-წლი-
ანი სკოლის დაწყებითი კლასი),
ნუნუ თავაძე-აღვიშვილის,
თამარ აღვიშვილის და ვალერია
ანი აღვიშვილის (ყუმურის
საშუალო სკოლა) ნათელ
ხსოვნას.

წინასიტყვაობის მადიმრ

რამდენიმე წლის წინ ვიმყოფებოდი ჩემი ახლო მეგობრის - თემურ კაკაბაძის მამაპაპისეულ სახლში, ხობის რაიონის სოფელ ხეთაში.

ამ საინტერესო და განათლებული ხალხის საოჯახო ბიბლიოთეკაში აღმოვაჩინე მწერალ კლიმენტი გოგიავას ბიოგრაფიული რომანი - „ილიაობა“ (დაზიანებულ მდგომარეობაში), რომელიც გამოცემულია 1973 წელს, მაშინდელი ბეჭდვითი ორგანოს „საბჭოთა საქართველოს“ მიერ.

მცირედი მონაცემები ხეთელი კაკაბაძის ცხოვრება-მოღვაწეობისა და საინტერესო წიგნის არსებობის შესახებ შემდეგია: როგორც სიტყვიერად გადმომცეს, აღნიშნული ისტორიული წიგნი ანზორ კაკაბაძის (ჩემი მეგობრის მამა) ოჯახში სამახსოვროდ მიუტანია მის მამიდაშვილს, თბილისის სახელმწიფო უნივერსიტეტის ცნობილ ფილოლოგს (პროფესორი) ვახტანგ (ვატო) როდონაიას. თვით ანზორ კაკაბაძე და მისი მეუღლე ციალა თოდუა იყვნენ ღვაწლმოსილი პედაგოგები, რომლებიც მოღვაწეობდნენ ხობისა და ხეთის სკოლებში.

ბიოგრაფიული რომანი „ილიაობა“ დაბეჭდილია 358 გვერდზე და მოიცავს საქართველოს უგვირგვინო

მეფის, დიდი ილია ჭავჭავაძის, ბიოგრაფიული ხასიათის საკმაოდ ვრცელ და უნიკალურ მასალებს.

გასული საუკუნის შესანიშნავი მწერალი კლიმენტი გოგიავა მივიწყებული ქართველი მწერლების სიაში რომ არ მოხვდეს, მისი სახელის უკვდავყოფის მიზნით, გადავწყვიტე ბიოგრაფიული რომანიდან „ილიაობა“ გამეცოცხლებინა ეპიზოდები, რომლებიც უშუალოდ ეხება ჩვენი ქვეყნის უდიდესი ადამიანების ისტორიული, დოკუმენტური და შემოქმედებითი ურთიერთობის უაღრესად საინტერესო პროცესებს.

ბარდა ამისა, მე როგორც ს.ს., „საქართველო-ს რკინიგზა“-ს ერთ-ერთ მოკრძალებულ მუშაკს, ჯიბნიდან ეპიზოდების გამომკვეთების სურვილი გამიმძაფრდა კალზემ სანტიმეტრო სტილში გადმოცემული „თემის“ შემდეგ, თუ როგორ იყო ღაინტირესებული ილია ჭავჭავაძე კახეთის მხარეში რკინიგზის მშენებლობის აუცილებლობით.

ვფიქრობ, ეს წიგნი საინტერესო იქნება ყველა ასაკისა და კატეგორიის მკითხველი საზოგადოებისათვის.

P.S. კლიმენტი გოგიავას ბიოგრაფიული რომანიდან „ილიაობა“, პუბლიცისტური ნაშრომის წიგნად გამოცემის მომზადებისას, იმასთან დაკავშირებით, რომ შემდგომში არ წარმოშობილიყო სხვადასხვა სახის გაუთვალისწინებელი მომენტები და იგი სადაო არ გამხდარიყო, მის დასაზუსტებლად, თუ რეგისტრაციის მიხედვით აღნიშნულ რომანზე ვინ ფლობდა ქონებრივ უფლებებს და რა დროიდან - დახმარებაზე თხოვნა გაიგზავნა საქართველოს ინტელექტუალური საკუთრების ეროვნულ ცენტრში „საქპატენტი“, საიდანაც ცნობილი გახდა (N01-05/233 08.06.2020წ), რომ არ გააჩნდათ ინფორმაცია, მითითებულ ნაწარმოებზე თუ ვინ ფლობდა საავტორო უფლებას, შესაბამისად მოკლებული იყვნენ შესაძლებლობას დაეკმაყოფილებინათ თხოვნა. ამასთან, რეკომენდაცია იყო საქართველოს საავტორო უფლებათა ასოციაციაში საკითხის გარკვევა. ცნობილი გახდა (29.06.2020 - skurashvili@gca.ge), რომ შემკვიდრე ან/და მისი საავტორო ქონებრივი უფლებების მფლობელი პირი არ იყო განეწიანებული ასოციაციაში, რომლის გარდა დამატებითი ინფორმაცია მათთან არ არსებობდა.

წიგნის გამოცემისათვის აუცილებელი მასალების მოპოვებაში სათანადო დახმარების განევისათვის, საქართველოს მწერალთა, მეცნიერთა და საზოგადო მოღვაწეთა საერთაშორისო აკადემია „ქალღეა-საქართველოს“ ნამდვილი წევრი, პოეტი - მამუკა ძაძამია, იმსახურებს მადლობას.

ელგუჯა ადღეიშვილი



დაიბადა 1948 წელს ვანის რაიონის სოფელ ყუმურში, მოსამსახურის ოჯახში.

1973 წელს დაამთავრა მოსკოვის კოოპერაციული ინსტიტუტი და მიენიჭა ეკონომისტის კვალი-

ფიკაცია. 1996 წელს დაასრულა უნივერსიტეტი „აჭარა“-ს სამართალმცოდნეობის ფაკულტეტი. 1986-1989 წლებში ირიცხებოდა თბილისის ივანე ჯავახიშვილის სახ. სახელმწიფო უნივერსიტეტის აღრიცხვის, ანალიზის და კონტროლის კათედრის მაძიებლად. 2000-2006 წლებში გაიარა: აშშ-ის საერთაშორისო განვითარების სააგენტოს პროგრამით განხორციელებული საგადასახადო სისტემის რეფორმასთან დაკავშირებული საკვალიფიკაციო ტრენინგები; აშშ-ის სახაზინო დეპარტამენტის ეგიდით ორგანიზებული და გაეროს განვითარების პროგრამის ფარგლებში ჩატარებული ტრენინგები. 2010-2011 წლებში წარჩინებით დაასრულა თავისუფალი უნივერსიტეტის - პროფესიული განვითარების პროგრამა (CBA (Certified Business Administrator)).

შრომითი საქმიანობა დაიწყო 1971 წელს. მუშაობდა სპეციალობით და სხვადასხვა თანამდებობებზე -

საქართველოს სამომხმარებლო კოოპერაციის სისტემაში, ფინანსთა სამინისტროში, საგადასახადო სამსახურში, კონტროლის სახელმწიფო კომიტეტში, კონტროლის პალატაში, საბაჟო დეპარტამენტში, ამჟამად მუშაობს ს.ს.“საქართველოს რკინიგზა“-ს კონტროლის, მონიტორინგის და ინსპექტირების დეპარტამენტში.

მინიჭებული აქვს საგადასახადო სისტემის ოპერატიული სამსახურის კაპიტნის წოდება.

გახლავთ ქტიტორი მშობლიურ სოფელ ყუმურში წმინდა გიორგის სახელობის ეკლესიის მშენებლობისა.

2010 წლის ივნისის თვეში, ვანის საკათედრო ტაძრის გახსნასთან დაკავშირებით, საჩუქრად მიიღო საქართველოს კათოლიკოს-პატრიარქის ილია II-ისაგან - „საგალობლები“-ს ალბომი, ხოლო შემდგომში საქართველოს საპატრიარქოს, ვანისა და ბაღდათის ეპარქიის მეუფე ანტონისაგან - „სამკერდე ნიშანი“.

2010 წლის 25 ნოემბერს, ვანისა და ბაღდათის ეპარქიაში გამართულ საზეიმო შეხვედრაზე, ელგუჯა ადეიშვილს გადაეცა საქართველოს კათოლიკოს პატრიარქის, უწმინდესისა და უნეტარესის ილია II-ის “დალოცვის სიგელი“.

ვანის რაიონის გამგეობისა და ეპარქიის მღვდელმთავრის ერთობლივი გადაწყვეტილებით, რაიონის განვითარებაში შეტანილი წვლილისთვის,

2016 წელს იგი არჩეული იქნა ვანის საპატიო მოქალაქედ და გადაეცა საპატიო სიგელი.

ელგუჯა ადგიშვილი არის საქართველოს მწერალთა, მეცნიერთა და საზოგადო მოღვაწეთა საერთაშორისო აკადემია „ქალდეა - საქართველოს“ აკადემიკოსი, გაზეთ „ქალდეა“-ს სარედაქციო კოლეგიის თავმჯდომარე.

პუბლიცისტური წერილები გამოქვეყნებული აქვს გაზეთ „ქალდეა“-ს სხვადასხვა ნომრებში.

მას ერგო წილად იყოს პოეტი-აკადემიკოსის ვაჟა ეგრისელის „კოლხური ფსალმუნები“-ს ოცდაათ-ტომეულის, 25-ე ტომის გამომცემლობის რედაქტორი (გამომცემლობა „უნივერსალი“ 2019წ.).

ელგუჯა ადგიშვილს გამოცემული აქვს წიგნები - „ქართული სინმინდეები“ (გამომცემლობა „უნივერსალი“ 2019წ.), „ჭალასამზიარი“ (გამომცემლობა „უნივერსალი“ 2020წ.), რედაქტორი ვაჟა ეგრისელი; ლექსების კრებული - „აკაციის ყვავილობა“ (გამომცემლობა „უნივერსალი“ 2020წ.). მომზადებული აქვს გამოსაცემად რომანი - „ჯვარიქედიდან დანახული“.

მის შესახებ გამოქვეყნებულია მასალები სხვადასხვა წიგნებში და გამოცემებში:

- „ვანი ოქრომრავალი ქვეყანა“ (ოთხტომეული) (მწერალი საზოგადო მოღვაწე ბადრი სვანაძე, გამომცემლობა ქუთაისი 2012 - 2015წწ.).
- ტომი N3 „ქტიტორი“ (ვანის მუნიციპალიტეტის ყუმურის

წმინდა გიორგის სახ. ეკლესიის მშენებლობასთან დაკავშირებით).

- ტომი N4 მისი მშობლების შესახებ მოგონებები და სარწმუნოებრივ თემაზე ნაშრომი.

- „აღსარება“ (შემოქმედებითი თემა - აკადემიკოსი ანზორ ჯათარაძე. გამომცემლობა „ივერიონი“ 2015წ.).

- „არ დავიწყება მოყვრისა (შემოქმედებითი და ბიოგრაფიული ხასიათის ნაწარმოები - თეიმურაზ ადგიშვილი, იური ადგიშვილი, გამოცემული 2019 წელს).

- ვანის მუნიციპალიტეტის პერიოდული დამოუკიდებელი გაზეთი „საჩინო“ (რედაქტორი ნატო მეფარიშვილი) (ბიოგრაფიულ-შემოქმედებითი მონაცემები რამდენიმე ლექსთან ერთად, 2019 წელი, სექტემბერი).

- ჟურნალი „ათინათი“ - წიგნი „ქართული სინამდვილე“, რამოდენიმე ლექსი (N1 (35) და N2 (36), 2020 წელი).

ჰყავს მეუღლე - თინათინ გეგეშიძე, უმაღლესი განათლებით (ფილოლოგი); შვილები - კონსტანტინე ადგიშვილი, დაბადებული 1979 წელს, დამთავრებული აქვს თბილისის ივანე ჯავახიშვილის სახ. სახელმწიფო უნივერსიტეტის ეკონომიკის ფაკულტეტი და შალვა ადგიშვილი, დაბადებული 1984 წელს, დამთავრებული აქვს თბილისის ივანე ჯავახიშვილის სახ. სახელმწიფო უნივერსიტეტის იურიდიული ფაკულტეტი; ოთხი შვილიშვილი.

ყ ვ ა რ ე ლ ი

I

მამამ ილიას თბილისიდან საწერი ქალაქი
ბლომად ჩამოუტანა.

- აჰა, წერე და წერე!

გრიგოლს მოსწონდა შვილის ნაწერი. ლამაზად
გამოყვანილი ასოები.

ილიამ ერთ ფურცელს თავისი სახელი და გვარი
დააწერა.

- სწორი არ არის, - დაუწუნა მამამ, - აქ ორი მთავარი
სიტყვა კიდევ აკლია! - და ნაწერს ხაზი გადაუსვა. -
ამიერიდან როგორც მე გეტყვი, ისე დააწერე
ქალაქს, წიგნს, ყველაფერს!

ილიამ ახალი ფურცელი დაიღო წინ. გრიგოლმა
უკარნახა:

- თავადი ილია გრიგოლის ძე ჭავჭავაძე.

ილიამ გულმოდგინედ გამოიყვანა ასოები.

- აი ასე, შვილო, ასჯერ დაწერე, ტვინში ჩაგეჭედება,
მერე არასდროს არ დაგავინწყდება.

გრიგოლი ნადიმის თადარიგს იჭერდა. ამის
მიზეზიც ჰქონდა. სამიოდე წლის წინათ თავადების
სიაში შვილების ჩარიცხვა ითხოვა. დროზე პასუხი ვერ
მიიღო, ბოლოს, ძლივს ეღირსა დასტური. ეს
გასახარელი ამბავი თბილისიდან საწერ ქალაქთან

ერთად ჩამოიტანა. ვინ იცის, რამდენი ფიქრი, რამდენი ჯავრი დაადნა გულზე, სანამ ეს საქმე დაგვირგვინდებოდა. ახლა შვილმა თავისი ღირსების მაჩვენებელი სიტყვა რომ არ დანერა, ეწყინა.

ილია ლამფის შუქზე თავაულებლად წერდა. სამი ფურცელი გადაამავა და მერე ძილმა წაიღო.

გათენდა. სახლში ველარ გაჩერდა, მასწავლებლისთვის უნდა ეჩვენებინა ეს ლამაზი ასოებით ნაქარგი ქალაქი. ამიტომ სკოლაში ადრე მივიდა და რვეული ნიკოლოზ მასწავლებელს გადასცა.

- ნახეთ ჩემი ნაწერი.

ნიკოლოზს გაეცინა - „მართო სახელილა შერჩა გრიგოლს, სახრავი კი გამოელია“. მერე ილიას ქოჩორზე ხელი გადაუსვა.

- კარგად დაგინერია. წიგნი არ ჩამოუტანია? - ჰკითხა ნიკოლოზმა.

- ვერ უშოვია.

ნიკოლოზს სეთაშვილი წარმოსადეგი ვაჟუკაცი იყო, გამხდარი, მკრთალი სახისა, მაგრამ ამ სიგამხდრეს ხელი არ შეუშლია ყვარელში თალავნის სახელი მოეხვეჭა, მისი წამქცევი და მომრევი არაფერ იყო.

ნიკოლოზი ღმერთსაც კარგად ემსახურებოდა, ყვარლის თომა მოციქულის ეკლესიაში მთავარ დიაკვნად მუშაობდა. ამ ხელობას მან სოფლისთვის უფრო საჭირო და აუცილებელი საქმე შეუთავსა, - ეს იყო

მასწავლებლობა. როცა უინი აიტანდა, შავ ანათორას კუთხეში მიაგდებდა და მოედანზე ტოლ-სწორებს იწვევდა. ჭიდაობაში გამარჯვებულს, გადაბმული ქეიფი და დროსტარება ვერ ერეოდა. სკოლას მაინც არ აცდენდა, მონათფეებს მზრუნველ მამასავით ეპყრობოდა.

ბიჭებს თავი მოჰქონდათ, რომ ასეთი ღონიერი მასწავლებელი ჰყავდათ.

ყვარელს კი სკოლა არ ჰქონდა. ილიამ წერა-კითხვა ისე შეისწავლა, რომ მერხი, დაფა, ცარცი და, რაც მთავარია, სახელმძღვანელოც კი არ უნახავს.

კარგ ამინდში ნიკოლოზი ბავშვებს ეზოში მუხის ქვეშ ფეხმორთხმით დასვამდა ხოლმე, თვითონაც წინ დაუჭდებოდა, და მანამ ხმას არ ამოიღებდა, სანამ არ გაინახებოდნენ.

იმ დღეს ნიკოლოზმა გაკვეთილზე გაზეთი „თბილისის უწყებანი“ მიაწოდა ილიას.

- აქ ერთი კარგი ლექსია მოთავსებული და წაიკითხე. ილიამ კითხვა დაიწყო. პირველსავე სიტყვაზე სიცილი გაისმა.

- რა არის სასაცილო? ლექსს „ძილი“ ჰქვია. ძილი არ გაგიგონიათ? გაჩუმდით! - გაისმა მასწავლებლის დაბალი ხმა.

- ილიას თვითონ უყვარს ძილი! - უადგილოდ იხუმრა ალექსიმ.

ამღვრა ილია, მსუქან ლოყებზე ცეცხლი წაეკიდა.

- ეს ლექსი ზეპირად ვიცი! - უთხრა მან მასწავლებელს და გაზეთი გაუნოდა.

„თბილისის უწყებანი“ ილიას შინაც ჰქონდა, მარიამი თითქმის აზეპირებინებდა მის თითოეულ წერილს, ლექსს მით უმეტეს. ისე როგორ გაუშვებდა, რომ ბიჭისათვის სხაპასხუპით არ ესწავლებინა. იცოდა ეს მასწავლებელმა, ამიტომ გაჯავრებულ ილიას გაზეთი გამოართვა და ამხანაგის ბურგს ამოფარებულ ალექსის დაუძახა:

- ძილი რომ არ გიყვარს, გამომართვი და წაიკითხე.

ალექსიმ გაზეთი გამოართვა, ორი სტრიქონი ძლივს ამოიკითხა და მერე თავი ჩალუნა.

- განაგრძე!

განაგრძო. ასოების მარცვლას მოჰყვა, მაგრამ მერე სიმწრით წაკითხულს თავი ველარ მოაბა.

ილიას გულმა ველარ მოუთმინა. შეებრალა ცუდ დღეში ჩავარდნილი ამხანაგი და მიეშველა.

- გაჩემდი! - გაატრთხილა მასწავლებელმა და ალექსის გაზეთი გამოსტაცა.

- სირცხვილი შენ, კითხვა ვერ ისწავლე! - მერე მონათვეებს მიუბრუნდა: - „ძილი“ პუშკინის ლექსია, ქართულად თარგმნილი, შემდეგ გაკვეთილზე გადაგანერინებთ და ისწავლეთ.

მასწავლებელმა „თბილისის უწყებანი“ გვერდზე გადადო და მაგიდის უჯრიდან ვარდისფერი ქალაქი ამოიღო. მონათვეებმა იცნეს, დავით გურამიშვილის „სწავლა მოსწავლეთა“, გუშინ ამ ლექსის პირველი რვა სტრიქონი თითოეულ მონათვეს ხუთჯერ მაინც წააკითხა. მერე გადააწერინა და საზეპიროდ მისცა. დღეს გამოკითხვას აპირებდა. ამას მაშინვე მიხვდნენ ბიჭები. ყველა მასწავლებელს მიაჩერდა. მკვესავი თვალებით შეემუდარნენ, არა მე გამიძახე, არა მეო. ნიკოლოზმა შეატყო, რომ გაკვეთილი ყველამ იცოდა, არც ერთს არ ჰკითხა და მოულოდნელად გამოაცხადა:

- მოემზადეთ საწერად!

მონათვეებმა გრძელი, დახაზული ქალაქები, რვეულებად აკინძულები, წინ დაილაგეს. ზოგი რვეული ვარდისფერი იყო, ზოგი ლიმონისფერი და ზოგიც თეთრი. ვის როგორი ეშოვნა, ისეთი მოეტანა.

- გურამიშვილის ლექსს ვაგრძელებთ, პირდაპირ მიჰყევით წინათ ნაკარნახევ სტრიქონებს.

შეუდგნენ წერას. ნიკოლოზი ალტაცებული კითხულობდა ლექსს, ხან აუწევდა ხმას, ხან დაუწევდა. მორჩილ მონათვეებს თავიანთი გაუწვრთნელი ხელებით ოჩხობოჩხოდ გამოჰყავდათ ქართული ასოები.

წერას გვიან მორჩნენ.

მასწავლებელი სახელით მიმართავდა მონაფეებს, რადგან მასთან ექვსი ჭაჭავაძე სწავლობდა.

- ილია, ამ ლექსის რომელი ადგილი უფრო მოგეწონა?

ილია წამოდგა, თვალი უცებ გადაავლო ქალაქს და მიუგო:

- თუ კაცსა ცოდნა არა აქვს, გასტანჯავს წუთისოფელი.

ალექსის ენამ გაუსწრო და წამოიძახა:

- სწორია!

- ამდენი თუ გესმის, რატომ ბეჭითად არ სწავლობ?! - გაუწყრა მასწავლებელი.

კითხვასა და წერას გვიან მორჩნენ. მასწავლებელმა სახლიდან ნაჭრის ბურთი გამოიტანა. წესად ჰქონდა, ბურთს იმ ბავშვს გადასცემდა, რომელსაც გაკვეთილი კარგად ჰქონდა მომზადებული.

მალლა ასროლილი ბურთი ილიამ ჰაერში დაიჭირა. თამაში დაიწყო.

მალე გახურდნენ ბიჭები. ბურთი ხელიდან ხელში სწრაფად გადადის, ილია მარდად ვერ დარბის, ტოლსწორები უსწრებენ, სტაცებენ ბურთს.

მასწავლებელმა ერთხანს უყურა ბიჭების განამანჩას, მერე კაკლის ხის ჩრდილში მოიკალათა და პლატონ იოსელიანის ახლახან გამოცემული ქართული გრამატიკის წიგნი გაშალა.

ბავშვებმა ყვირილსა და ღრინაცელს უმატეს. ეს არ მოეწონა მასწავლებელს და გასძახა:

- ნუ ყვირით, ენით ხომ არ თამაშობთ?!

ცოტა ხნის შემდეგ თვითონაც მოვიდა თამაშის გუნებაზე და იკითხა:

- ვინ იგებს?

- ჩვენ! -ამაყად მიუგო ალექსიმ. ამასობაში მისმა ბიჭებმა იყოჩაღეს და ორი ბურთი კიდევ გაიტანეს.

ალექსი მაშინვე გამოექანა, ილიას გაშლილ ზურგზე შეახტა და გახარებულმა დასძახა: პანიანო, პანიანო!

ასე მოიქცნენ სხვებიც. წაგებულებმა მხრებზე შეისვეს მოგებულები და სათამაშო მოედანზე გაიქც-გამოიქცნენ.

ბურთი კი დაღმართზე გორებ-გორებით დაეშვა. ენაგადმოგდებული ფინია იქვე, ჩრდილში რომ დასუცქელიყო, ყეფა-ღრენით გამოუდგა ბურთს.

თაფჩაღუნული და გაჭავრებული ილია მძიმედ დააბიჯებს.

მასწავლებელს ილიას ის ნაწერი მოაგონდა, წელან რომ მოიტანა და გაეცინა. „ჰაი, დედასა, რა დღეში ხარ,

თავადო, მამაშენმა რომ დაგინახოს, გული გაუსკდება“
და მისდაუნებურად გასძახა:

- კარგი, ალექსი, გვეყოფა!
გლახის ბიჭი მაშინვე ჩამოხტა.
მაგრამ ილიამ ეს იუკადრისა.

- ბატონო მასწავლებლო, კანონი კანონია, რაკი
წავაგე, კიდევაც უნდა დავისაჯო! - და ალექსის ზურგი
მიუშვირა.

- პანიანო! - დასწყვივლა ალექსიმ, მაგრამ აღარ
შეახტა.

ბიჭები აღარ დარბოდნენ.

მასწავლებელმა ილია გაათრთხილა:

- შვილო, მამაშენმა არ გაიგოს, ალექსი რომ ზურგზე
გეჯდა, თორემ ეწყინება.

- თამაში დამთავრდა. ბიჭებმა სული მოითქვეს,
წყალი დალიეს, შინიდან მოტანილი შოთითა და
გუდის ყველით შიმშილი მოიკლეს.

- ილია ჭამის გუნებაზე არ იყო. ნაზუქი შუაზე
გადატეხა და ნახევარი ალექსის მოაწოდა.

უყვარდა ეს ენამწარე ბიჭი. ბევრი ლექსი იცოდა, ფან-
დურსაც კარგად უკრავდა და სიმღერაც ემარჯვებოდა.

ალექსიმ გამოართვა ნაზუქი და ჩაკბიჩა. მოეწონა,
მაგრამ მაღლობის მაგიერ მწარედ უთხრა:

- ასეთ ნუგბარ საჭმელს რომ მიირთმევ, იმიტომ ხარ

მსუქანი, სირბილ-თამაშის შნო არა გაქვს.

- მაშ რა, წინაუკა ვჭამო?

- რატომ არა, მარგებელია.

- წინაკას რომ ეტანები, ამიტომ გაქვს მწარე ენა!

- არ იცი რო ...

- როგორც გატყობ, ამ ნაჭერზე გიჭირავს თვალი, აჰა გამომართვი.

- რომ გავსუქდე? - ჩაიცინა ალექსიმ და ხელი გაუნოდა, მაგრამ ილიამ ნაზუქი თვითონ ჩაკბიჩა.

ალექსის განზილება ეწყინა, მაგრამ არ შეიმჩნია, გაშვერილი ხელით ქოჩორი გაისწორა.

- შეგენანა?! - მკაცრად ჰკითხა მან.

- ვაითუ ჩემსავით გასუქდე! - მიუგო ილიამ.

მეორე დღეს მონათფეები სკოლაში ადრე მივიდნენ. მაგიდას შემოუსხდნენ, ზოგმა წიგნი გაშალა, ზოგმა რვეული, ზოგმა ფანქარი ამოიღო და ხატვას შეუდგა.

მასწავლებელი გვიან გამოვიდა. ანათორა გაეხადა, ტილოს შარვალ-ხალათი ეცვა, კეფაზე თუშური ქუდი მოეგდო, მონათფეებს გაუსცინა და უთხრა:

- წიგნები გადავდოთ, დღეს ჭიდაობაა!

ცას ეწივნენ ბიჭები. წიგნები ფაცვიფუცით ისევ ჩანთებში ჩაალაგეს.

- კი მაგრამ, სად იქნება ჭიდაობა? - იკითხა ერთმა.

- რიყეში, წამოდით.

ბიჭებმა ჩანთები ამოიღლიათ და უკან გაჰყვნენ

მასწავლებელს.

- დღეს მე არც მასწავლებელი ვარ, არც მთავარი დიაკონი ნიკოლოზი. დღეს ნიკა ვარ, გესმით, ბიჭებო?! რომ წავაქციო, დასცხეთ ტაში და ყიჟინა, თუ დავმარცხდე, ტაში მაშინაც არ დაიშუროთ, ახია ჩემზე, გესმით?!

- არა, თუ წავაქციეს, ტაშს არ დავუკრავ! - უთხრა ილიამ.

- ვითომ რაღაო, გამარჯვებულს ტაში და შეეება არ უნდა? - ჰკითხა ნიკოლოზმა.

- უნდა, მაგრამ მასწავლებელი თუ დამიტაბნა, ტაში რა გულით დავუკრა? - კითხვა შეუბრუნა ილიამ.

- არა, არა, არ დავუკრავთ ტაშს! - აყაყანდნენ ბიჭები.

ამასობაში გზიდან გაიმინდვრეს და რიყეც გამოჩნდა. იქ უკვე ხალხს მოეყარა თავი.

- ვა, ჩვენი მთავარი თავისი ჯარით მოდის! - იხუმრა ვილაყამ.

ყველამ ნიკოლოზისკენ მიიხედა. ნიკოლოზი დინჯად მიდიოდა, ზოგი მოწაფე წინ მიუძლოდა, ზოგი უკან მისდევდა, ილია გვერდში მიჰყვებოდა, ფეხს ძლივს უსწორებდა, უფრო მორბოდა, ოფელში გაღვრილი.

- დღეს ვის ეჭიდავები? - გვიან ჰკითხა ილიამ. ბიჭებიც დაინტერესდნენ.

- თქვენ არ იცნობთ, სიღნაღელია.

- გამოგინვიათ?

- მე არა, მაგრამ მარჯაანთ სტუმარია. სუფრაზე დაუტრაბახებია, ყვარლელები რას გამიძლებენო. ბიჭები გაბრაზებულან და გამოუწვევიათ. მეც ახლახან შემატყობინეს, იქნებ ღმერთი გაგვიწყრეს, დაგვეხმარეო.

- თქვენ რას გაგიძლებთ! - უთხრა ილიამ.

- ვითომ რა იცი? - გაეცინა ნიკოლოზს.

- ვიცი, ვიცი! - თავი დაუქნია ილიამ. ილიას სხვებიც არ ჩამორჩნენ.

- თქვენ ღონიერი ხართ!

- ჯერ ვინმეს ხომ არ წაუქცევია ხართ? - ზედიზედ აყრიდნენ კითხვებს ბიჭები.

მოედანს მიადგნენ.

მეტოქე ჯერ არ იყო მოსული. ყვარლელები კი აჩქარებულიყვნენ, ზოგი ცხენით წამოსულიყო. თალავანი ლექსოც აქ იყო. მისი ცხენი იქვე, ბზის გადაბრეცილ ხესთან იდგა, თვითონ ნიკოლოზის შესაგებებლად წამოვიდა.

- ლექსია, რომ მცოდნოდა, შენ აქა ხარ, მე არ მოვცდებოდი! - უთხრა ნიკოლოზმა და ხელი ჩამოართვა.

- არა, კოლა, შენ საჭირო ხარ.

- სიღნაღელმა ასე როგორ შევაშინათ?! - იკითხა გაკვირვებულმა ნიკოლოზმა.

- ტრაბახა კაცი ეშმაკიც არის, მე ეშმაკობის მეშინია, თორემ, ღონითა და ხერხით არაფერს გავატან.

- მოდის! მოდის! - იხუვლა მოედანმა.

შარაგზაზე ჯერ მტვერი დატრიალდა, მერე ცხენოსნები გამოჩნდნენ. გაღმაუბნელი მარჯანიშვილები მოდიოდნენ. მოჰყავდათ თავისი საამაყო სტუმარი.

სიღნაღელმა რიყეზე ხალხი რომ დაინახა, ვერ მოითმინა, ცხენი გამოაქანა და პირველი მოვარდა მოედანზე.

- გამარჯობათ, ხალხნო! - ამაყად დაიძახა მან.

- გაგიმარჯოთ, გაგიმარჯოთ! - დაიგუგუნეს მასპინძლებმა.

სიღნაღელი დაბალი იყო, ჩასკვნილ-ჩაგრეხილი, ქოსმენივით ჩასუქებული. ცხენიდან მარდად გადმოხტა, მათრახი და აღვირი ბიჭს გაუწოდა, მარცხენა მხარი ჩამონეული ჰქონდა, ეტყობოდა, ღონიერი იყო. გზა დაუთმეს, სქელი კისერი მიაბრუნ-მოაბრუნა, ცხელი თვალი ყველას მოავლო.

ხალხში მაშინვე ჩუმად გაისმა:

- რა ჯანის პატრონია?!

- ეტყობა, თოხსა და ბართან მწყრალად არის, თორემ ასე რამ გაასუქა?

- ამბობენ, ერთი ჭედილააც არ ყოფნისო.

- მამა უცხოვნდა, სხვისი მონაგარი შეიძლება ორიც შე-

ჭამოს, მაგრამ ერთი თვითონ იშოვოს?

ილიას ეს ლაპარაკი ესმოდა და ფერფერი მისდიოდა, მასწავლებელი არ წამიქციოსო.

დოლის ბაგაბუგმა ხალხი ჭიდაობის ეშხზე მოიყვანა. მოედანზე პირველი ლექსია გამოვიდა. თივის ბულულები მისწი-მოსწია და თავისი ძმაკაცების წინ დადგა, მეტოქეს ელოდებოდა, მაგრამ სიღნაღელი თავს იფასებდა, აგვიანებდა.

- გამოდი, გამოდი! - ვეღარ მოითმინა ვილაცამ.

მოედანზე თმაქოჩორა ბიჭი გამოვიდა, ლექსოსთან მიირბინა, მკლავზე რომ ვერ შესწვდა, მუხლზე სტაცა ხელი და უთხრა:

- ჩემი ღონე შენ!

ეს ბიჭი ნიკოლოზის მონათვე იყო, ბალიკა ჭავჭავაძე. მას ილიამაც მიჰბაძა, მოედანზე ბურთივით გამოგორდა, ფალავანს წაეტანა და უთხრა:

- ჩემი ღონე, შენ!

სიღნაღელი კიდევ არ ჩანდა. ბუჩქებს მოფარებული ცხენებთან იდგა. ესეც მისი ხერხი იყო, უნდოდა გახურებული მეტოქე მოლოდინით მოექანცა.

ხალხსაც გული გაუნყალდა, ტაში დასცხეს, მედოლეც ხალხს აჰყვა. გვიან გამოვიდა სიღნაღელი. ლექსოს ბიჭები ეხვეოდნენ, თავიანთ ძალ-ღონეს აძლევდნენ.

- გეყოფათ, გეყოფათ! - ლექსომ ბიჭები ჩამოიშორა და სტუმარს შეეგება, ჯერ შორიდან თვალით მოსინჯეს ერ-

თმანეთი, მერე ხელი ჩამოართვეს... ერთ წუთში ჭიდაობა გახურდა, თვალავნებს ტანზე ბული ასდიოდათ. ძლიერი და ღონიერი გამოდგა სიღნაღელი, მაგრამ არც ყვარლელი იყო ჯაბანი, დიდხანს ანჯღრეის და ამტვრიეს ერთმანეთი, ბოლოს სიღნაღელის ხერხმა გასჭრა, ელვასავით მხარზე მოიგდო ამხელა კაცი და დასცა.

გული ჩასწყდათ მონაფეებს. ტაში არც ერთს არ დაუკრავს, თავები ჩაქინდრეს. ნიკოლოზმა კი თავისი ჯამივით მრგვალი ხელები ერთიმეორეს შემოჰკრა, მას სხვებიც აჰყვნენ, მაგრამ მათ ტაშს სიხარულის ცეცხლი აკლდა.

სიღნაღელი შუა მოედანზე გამოიჭვიმა, ღოინჯი შემოიყარა და დაიბუბუნა:

- შემდეგი გამოვიდეს, მეჩქარება!
კიდევ სამმა ყვარლელმა ჯამა სირცხვილი.

აფეთქდა გრიგოლ ჭავჭავაძე, გაგულისებული მივარდა ნიკოლოზ სეფაშვილს:

- აქ რას ჩამომჯდარხარ, ბაღლებში, სირცხვილი გსიამოვნებს?!

სანამ სეფაშვილი უპასუხებდა, სიღნაღელის ყვირილი გაისმა:

- შემდეგი გამოვიდეს, მეჩქარება!
- გადი, რას აყოვნებ?! - ბობოქრობდა გრიგოლი.
- ცეცხლივით ხომ არ ვეცემი, კაცმა ჯერ სული მოითქვას

- დასვენებას ელოდები?

- მაშა, ოფლი შეაშრეს.

- უცნაური კაცი ხარ, მოითა ხელი!

ნიკოლოზმა ხელი გაუწოდა.

- ჩემი ღონე შენ! - უთხრა გრიგოლმა.

სეფაშვილმა ხალათი გაიხადა და მოედანზე გადაეშვა, მაშინვე ეცა სიღნაღელი.

ბიჭებს გული დასწყდათ, ველარ მოასწრეს მასწავლებლისათვის თავიანთი ღონის „მიცემა“ და ახლა, გახურებული ჭიდაობის დროს, ჩუმად გაიძახოდნენ:

- ჩემი ღონე შენ!

- ჩემი ღონე შენ!

- გაჩუმდით! - უყვირა გრიგოლმა, მაგრამ ჭიდაობის ცეცხლმა უფრო გაათვისხა ისინი, ხმას აუწიეს.

სიღნაღელმა სეფაშვილს დიდხანს გაუძლო, მაგრამ ბოლოს მუხლმა უმტყუნა. ტაში და ყვირილი ერთიმეორეში აირია. კარგი რამ იყო მოწაფეების მალაყი და ცეკვა, დოლის ბაგაბუგი.

გრიგოლმა ამ აურზაურში კარგად დაინახა, სეფაშვილმა როგორ გაშალა მკლავები სიღნაღელის გადასახვევად, მაგრამ დამარცხებულმა თვალავანმა ზურგი შეაქცია და გაიქცა.

სამაგიეროდ გრიგოლმა ჩაიკრა სეფაშვილი.

- ვაგახარა ღმერთმა, რომ გამახარე! - მაშინვე ჯიბიდან

რევოლუციური ამოიღო და გაუნოდა, - ახლა საჩუქრად ეს გქონდეს, შემდეგ პატივისცემა ჩემზე იყოს.

II

ილია მუხის ჩრდილში იჯდა, სალამურს უკრავდა. ლერწმის მოხატული სალამური ხან ბულბულივით სტვენდა, ხან საჭიდაოს აუღერებდა.

ხელზე შეჩვეული ლომა იქვე ბალახს სძოვდა. ჩიჩხვინა კუდით აბეზარ ბუზებს იგერიებდა.

უცებ ლომამ მიაბლავლა და ჩაიკეცა.

ილიამ სალამური ხელიდან გააგდო. მისი გაჭირვების ტალკვესი ნიკა პაპა იყო. მაშინვე რაც ძალი და ღონე ჰქონდა დაიყვირა:

- ნიკაა, აააი, ნიკა!
- რა იყო, შვილო, მგელია?
- მიშველე

ილია ლომას ირგვლივ დარბოდა, ტიროდა, ხბოები დაფროთხნენ და გაიქცნენ მდინარისაკენ.

ნიკა პაპამ მოირბინა, გასავათებულ ლომას რომ შეხედა, იყვირა:

- მგელი ყოფილა!
- მგელი?!

- ჰო, ჰო, აბა, წყალი, წყალი!

ქელბურა გუდა ზურგიდან მოიხსნა და მდინარისაკენ გაიქცა, მას ილია დაედევნა, მოიტანეს ცივი წყალი და ლომას გადაასხეს, ლომა არ განძრეულა.

გუდას წყლით მეორედ რომ ავსებდნენ, ილიამ მოუთმენლად ჰკითხა:

- მგელი რომ ახსენე, სად არის მგელი?

- ნამდვილი მგელი კი არა, მინის მგელია, მე დავინახე, აბა, ჩქარა!

ბულა რომ კარგად ამოლუმპვს, წამოდგა, ცოტაზე წაბარბაცდა და დაიზმუვლა.

- აწი არა უშავს, არ მოკვდება! - გაეხარდა ნიკა ჰაჰას.

- კი მაგრამ, რა მოუვიდა?

- სიკვდილი, დროზე მივეშველეთ, თორემ დაიღუპებოდა.

- წყალმა უშველა?

- უშველა, მინის მგელი ეცა, შვილო, ამ ავადმყოფობის მალამო წყალია, ხურვებას ტანიდან უცებ გამოდენის.

- ეეხ, საბრალო ლომა, მამამ მითხრა სახარედ მინდაო; მე უნდა გავხედნო, ამიტომ ვუვლი, ჩემჩემად პურსაც კი ვაჭმევ.

- ღვინოს თუ ასმევ? - გაიცინა ჰაჰამ და თეთრი თმით დაფარული კისერი მოიქექა.

ილია მიხვდა, რასაც უმიზნებდა მოხუცი. კარვისაკენ გაიქცა, მალე ღვინო, პური და ყველი მოარბენინა, გულ-

მა ვერ მოუთმინა და ნახევარი შოთი ლომას აჭამა, მერე მწვანეზე სუფრა გაშალა, სურა ნიკა პაპას მიაწოდა.

დედა ყოველდღე ქინძმარაულით სავსე სურას ატანდა. მდინარის ნოყო წყალი არ დალიო, ციება არ აგყვესო. ილია იმ ღვინოს ხშირად ნიკა პაპას ასმევდა. ნიკა ხმელ თონეულს ვერ ღეჭავდა, ღვინოს ჯამში ასხამდა, შიგ პურს ფშვნიდა და ბოლლინოს მადიანად შეექცეოდა. ახლაც ასე მოიქცა და ილიაც დაჰატიჟა.

- ჭამე, შვილო.
- არა, არ მინდა.
- ჭამე, თორემ ჩემი ლოცვა ვერ გაგაძლებს.

ილიას ბოლლინოს სუნი გულს ურევდა. ნიკა პაპა კარგად რომ დანაყრდა, ილიას ლელვის ჩირი მუჭში ჩაუყარა და მერე თავის ნახირს მიაშურა.

ილიამ გადაგდებული სალამური აიღო, მაგრამ მისი დაკვრის გუნებაზე არ იყო. რაც პური დარჩა, სულ იმ ლომას აჭამა, საბრალოს პირიდან დეჟი გადმოსდიოდა. ბალახის ძოვის თავი აღარ ჰქონდა, გაოგნებული და დაღვრემილი იყო.

- რა იყო, ლომა, გული გადამიბრუნე, მართლა მინის მგელი გეცა? ამოიღე ხმა.

ლომამ თავი ასწია და ილიას შეხედა.

- მინის მგელმა შეგაშინა? ნუ გრცხვენია, რას იზამ, ჯერ პატარა ხარ. მიდი, შენებურად გაიკუნტრუშე.

ილიამ გავაზე დაარტყა ხელი, მაგრამ ლომამ ნაბიჯიც

არ გადადგა, ყელი მოიღერა და კუდი გაიქნ-გამოიქნია.

ილიამ კარვისაკენ ჯამ-ჭურჭელი წაიღო, ლომა უკან გაჰყვა.

- წამოდი, წამოდი, კიდეც არ გეცეს მგელია, თუ რალაც ჯანდაბა.

ილია მარტო იყო, მგლის ხსენებაზე ტანში გაჰბურძგლა, შიშმა თავი უჩვენა, თუმცა შინ დედა და მამა მას არასოდეს არ აშინებდნენ. აი, ბუა მოდის, აი, მგელი შეგჭამსო, არასოდეს არ უთქვამთ. თამამად ზრდიდნენ, შიშის ავ გრძნობას არ უნერგავდნენ, მაგრამ ახლა თავისთავად ლომას უეცარმა, სასიკვდილო წაქცევამ, ილია შეძრა. „მე ვერ დავინახე, თორემ ის ნამდვილად მგელი იყო, მიწიდან ამოძვრა, და ამ საბრალოს ეცა“ - ფიქრობდა ილია, უკვე თავის ქოხში თივაზე წამოწოლილი.

ლომა იქვე კართან იდგა, პატრონს უყურებდა.

- სიკვდილს ხომ გადაურჩი, წადი ახლა, ძოვე, გეყო, რაც განებივრე, საშენო პური აღარა მაქვს, - უთხრა ილიამ და მეურმესავით დაუძახა - ეე-ხიი..

ლომას კუდიც არ გაუნძრევია. ცოხნა დაიწყო და წასვლას არ აპირებდა.

- წადი, გეყო, რა შიშიც მაჭამე! - ილიამ კომბალი მოუქნია, შინდის კაუჭა ჯოხმა შეხუთულ ჰაერში გაიშხუილა თუ არა, ლომამ წასვლა იკადრა. ქოხის წინ გადაბზინებულ მდელოს მიადგა.

საიდანღაც ყვავი მოფრინდა, ბებერ თელაზე
შემოჭდა, მოჰყვა ყვა-ყვას.

ილიამ ახლომახლო ქვა ვერსად იპოვა, მერე ჯოხი
ესროლა და დაათრთხო.

ლომა ახლოს მივიდა პატრონთან.

- ვიცი, რაც გინდა, - უთხრა ილიამ, სარქეებზე ხელი
წაავლო და უკან დაახევინა.

ილია ლომას წვრთნიდა, უნდოდა რქენა და ჭიდაობა
ესწავლებინა, მაგრამ პირუტყვი გაუგონარი იყო,
არაფერი ესმოდა პატრონის, მარტო სარქეების მოთხანა
სიამოვნებდა.

ლომა ახლაც გაყუჩდა. ილიას სარქეების თხანაში
ხელი დაელალა, მერე თავისი ნაბადი გამოიტანა,
მდელოზე გაშალა და ლომას შესძახა:

- აბა, გადახტი!

ლომამ ამჯერად გაუგონა და გადახტა.

გაეცინა ილიას, ნაბადი წაიფრიალა და კიდევ წინ
გაუშალა.

- გადახტი, გადახტი, პური არ გინდა?

ლომამ ნაბადს არც კი მიხედა, კუდი აიპრიხა და გაიქცა.

გული დასწყდა ილიას, ქოხში შებრუნდა, ჩანთიდან
შაშალიკი ლელვი ამოიღო და პირი ჩაიტკბარუნა. მერე
მინდორზე გაშლილ ხბოებს დაუარა. ერთგული ბათარა
მზეში იდგა ენაგადმოვლებული და სიცხისაგან
დამანტებულ ხბორებს თვალს არ აშორებდა.

ჯერ ხბოების წარეკვის დრო არ არის, მაგრამ ილიას ეშინია, საცაა ციება დასცემს და მერე გვიან იქნება.

გუშინ ქოხში დააგდო ციებამ, რაც ცხვრის ტყავი იყო, ნიკა პაპამ ყველა ზედ დაახურა, თავისი გაქუცული ნაბადიც დაუმატა, მაგრამ მაინც ვერ გათბა ილია.

წელან რალაც ცივად გაჰკრა, პირიც მწარე გაუხდა, შეშინდა და დაეშურა წასვლას. ამიტომ პირველმა გადასძახა მეხბორე ბიჭებს:

- ეე... ოო...

ილიას ხმას თავისი ხმაც დაუმატა ხევმა.

ბათარამ იცოდა, ეს ძახილი რასაც ნიშნავდა, ხბოებს ყეფა-ღრენით დაურბინა და ერთ ადგილას შეაქუჩა. ლომა პირველი გაემართა შინისაკენ.

ნიკა პაპამ აშალა თავისი ხბოები. ზეგანი რომ ჩამოათავა, ილიას შეხვდა.

- როგორ არის შენი ნამგელავი ლომა?

- კარგად არის, პაპა, კარგად!

- ჰო, ეგრე, შვილო, მამას უთხარი, ერთი ხელადა ღვინო მალარიჩად მეკუთვნის-თქო.

- კარგი, პაპა.

ბოსლის ეზოში მოსანველად ჩამომდგარმა ძროხებმა ხბოების მოახლოება იგრძნეს და ზმუილ-ბღავილი ატეხეს. დედებს ბოჩოლებიც გამოეხმაურნენ. სოფელი გაავსო პირუტყვის ველურმა ხმებმა, მალე თბილი რძის სუნიც მოეთინა ბინდბუნდში გახვეულ ეზოებს.

მეორე დილას დედამ ილიას უთხრა:

- ხბოებში არ გიშვებ.
- რატომ, მე ახლა არაფერი არ მტკივა.
- მღვდელთან უნდა წაგიყვანო, შევილოცავს.
- ხბოებს საჭმელი არ უნდათ?
- დღეს იოლად გავლენ, თივას დავუყერი, ხვალისთვის მამაშენი ბიჭს იშოვის და ის წარეკავს.
- მე?
- შენ უნდა მოგარჩინოთ და ისწავლო.
- მე მოვრჩები, ნიკა პაპამ მითხრა, ბევრი თათული ჭამე და მორჩებიო.

ჭიშკართან მენახირის ხმა გაისმა. ილია აივანზე გადმოდგა და ზევიდან გადახედა ჭალისკენ ზღაზღვნიით მიმავალ ნახირს.

შინ დარჩენილმა ხბოებმა მალე ბღავილი ატეხეს, თივას პირი არ დააკარეს, არც სალათავს მიეტანენ.

- დედა, ცოდონი არიან, გავრეკავ!
- არა. მოშვიდებათ და შესჭამენ!

ილიამ გვიან მაინც წარეკა კუდბანარა ხბოები. ლომა არ წაუყვანია, ბოსელში შეაგდო და ბოსტნიდან მოტანილი ლორთქო ბალახი დაუყარა.

ჯანიანი ბიჭი იყო ილია, ციებამ ეგრე ადვილად ვერ დაასუსტა. გუდა სავსე ჰქონდა შოთი პურებით, მოხარბული ხორციით, ცხვრის ახალი ყველით, სურით ერთი ხელადა ღვინო მიჰქონდა ნიკა პაპას გასამასპინძ-

ლებლად. ხბოებს ცხარედ მიერეკებოდა, ეშურებოდა, ისეც დაგვიანებული იყო.

ნიკა პაპა მინდორში დაუხვდა, ბერიკაცი მორბე იჭდა და სალამურს აკვნესებდა. დინჯი დაკვრა იცოდა ნიკა პაპამ, კაცს სევდას აუშლიდა.

ილია ზურგიდან მიეპარა.

- გამარჯობა ნიკა პაპა!
- გაიზარდე, შვილო.. მოხვედი?
- მა რა მექნა, ხბოები შემეცოდნენ... ღვინო მოგიტანე, მამამ თქვა, თხოვნის შნოც არა აქვს, ერთი ხელადა რაა, ათი წაიღოსო.

- შექარი და ბარაქა გრიგოლის ოჯახს! - დალოცა ნიკამ და მერე, როცა სასაუბმოდ დასხდნენ, ნიკამ ხმელ პურსა და ყველს ორი ჯამი ღვინო დააყოლა.

ხბოებმა ბალახ-ბალახობით გაიმინდვრეს, თვალს მიეფარნენ, ილია მათკენ გაიქცა.

ტყის პირას, ჩრდილში მოძალეებული ბალახი ძალიან მოენონათ ხბოებს. მადიანად ძოვდნენ, თან პატარა კუდებით ბუზებს იგერიებდნენ. ბუზი ერთობ ბევრი იყო. ილიამ ხერხს მიმართა, ძალღს დაუსტვინა, აბა, ეცი, ეციო, და მობალახე ხბოები იქვე, ახალ ამონაყარ ფოთლიანში შელალა, მერე ყვირილითა და სახრის შხუილით ისეც ფიცხლად უკანვე გამორეკა. ხერხმა გაჭრა, ხბოებმა აბეზარი ბუზები ფოთლებს შეატოვეს.

ის დღე მინდორში ილიამ კარგად გაატარა,

არ შეუციებია და შინ გახარებული მოვიდა, მაგრამ ეზოში ლომა თავგასისხლიანებული რო დაინახა, ელდა ეცა.

- დედი, ვინ დაჭრა ჩემი ბულა, ვინ?! - ატირდა ილია.
- გაჩუმდი, არავისაც არ დაუჭრია.
- მა სისხლი რადა სდის?!

- ღმერთს შევწირეთ, მღვდელმა თქვა, ასე სჯობიაო, აწი არასოდეს არ შეგაციებს!

ლომა ახლოს მივიდა ილიასთან, გაჭრილი ყურიდან სისხლი წვეთავდა.

- შეუხვიეთ ყური, თორემ სისხლისგან იცლებს! - შეევედრა დედას.
- დაიცალოს, მოკვდეს, სამაგიეროდ შენ მეყოლები კარგად.

გვიან, როცა ბინდი დაეშვა, ილია ბოსელში შეიპარა; თეთრი ტილოს ნაჭრით თავის ძმობილს ყური შეუხვია, თან შოთი პურიც აჭამა.

იმ ღამეს მშვიდად ეძინა ილიას, მაგრამ დილით ლოგინიდან ვერ ადგა, შეამცივნა. აკანკალებულ ბავშვს დედა საბნებს აყრიდა, მაგრამ მაინც ვერ თბებოდა.

- ხომ ხედავ, აქ ვერათერს ვშველით, წაიყვანე ქალაქს! - მიატირა მარიამმა გრიგოლს.

პეტერბურგში

I

პეტერბურგში ილია ბედს არ ემდუროდა. ამაღლების პროსპექტზე, ვაჭრის ცოლის, კალიჩინას სახლში რიგიანად მოეწყო. კალიჩინა კეთილი დედაკაცი გამოდგა, ოთახი ძვირი არ დაუფასებია, ილიამ ორი თვის ქირა წინასწარ გადაუხადა.

ახლა მთავარი საზრუნავი უნივერსიტეტში შესვლა იყო. დარგიც შეარჩია, იურიდიული ფაკულტეტის კამერული განყოფილება. აქ მისაღებ გამოცდებზე ბევრი საგანი არ ჰქონდა ჩასაბარებელი. ამ დარგზე შესვლა შედარებით ადვილი იყო ილიასთანა სტუდენტისათვის, რომელსაც გიმნაზიის სრული კურსის დამთავრების საბუთი არ გააჩნდა.

ილიამ 1857 წლის 19 ივლისს თხოვნა დანერა უნივერსიტეტის რექტორის ემინ ლენცის სახელზე. ილია წერდა: „მაქვს რა სურვილი საბოლოო განათლების მისაღებად მოვისმინო ს. - პეტერბურგის უნივერსიტეტის იურიდიული ფაკულტეტის კამერული განყოფილების სრული კურსი, უმორჩილესად ვთხოვ თქვენს აღმატებულებას ჩამრიცხოთ თავისუფალ მოსიარულე სტუდენტად.“

თხოვნის შეტანა არ იყო მთავარი, ილიას გამოცდებისა ემინოდა. მან საჭირო სახელმძღვანელოები ჩამოითხოვა და ოთახში ჩაიკეტა.

სიბეჯითემ ნაყოფი გამოიღო, გამოცდები კარგად ჩააბარა.

ყვარელში წერილი აფრინა, თავისიანები გაახარა.

„მე შევისწავლი ევროპის ქვეყნების სახელმწიფოთა უფლებებს, - წერდა ილია, - რუსეთის იმპერიის სახელმწიფოებრივ დანესებულებათა საქმიანობას, ფინანსებისა და სახელმწიფოებრივ დანიშნულებათა კანონებს, მართლმსაჯულების კანონებს, პოლიტიკურ ეკონომიას, სტატისტიკას, ბუნებისმეტყველებას, ტექნოლოგიას, აგრონომიას, არქიტექტურას.“

პირველ ნოემბერს ილიამ სწავლის ფული ოცდახუთი მანეთი შეიტანა, ქვითარიც მიიღო.

- ახლა ნაღდი სტუდენტი ხარ, წამო ლექციაზე! - უთხრა კოხტამ, მაგრამ ილია შეჩერდა, ის ქვითარი უბის წიგნაკში ჩაიღო და მეგობარს უთხრა:
- სტუდენტი ვარ, უფულო სტუდენტი!
- რამდენი დაგრჩა?
- ცხრა მანეთი.
- „კუხმისტერსკში“ გეყოფა, ჯავრი ნუ გაქვს. წამოდი!

სალექციო დარბაზში ადრე შევიდნენ, ახალბედა სტუდენტებმა მალე მოიყარეს თავი; თითქოს სოფლის სკოლაში არიანო, მერხებთან ჯგუფ-ჯგუფად იდგნენ. ზოგ ჯგუფში რალაცაზე ცხარედ დაობდნენ, ზოგში მღეროდნენ, ვიღაც მოწყენილი და დარცხვინილი სტუდენტი თავისთვის იჯდა კუთხეში, ხმას არ იღებდა,

ილია მასთან მივიდა და მორიდებით ჰკითხა:

- შეიძლება?
- დაბრძანდით!
- რა ხმაურია?! - თქვა ილიამ.
- იცინიან, სანამ ეცინებათ, გამოცდები რომ მოაღწევს, მაშინ ვნახოთ ამათი ბიჭობა.
- ჯერ რა დროს გამოცდებია?!

უცნობმა რაღაც ჩაილაპარაკა, მაგრამ ილიამ კარგად ვერ გაიგონა, აღარ ჩაეკითხა, უზრდელობაში ჩამომართმევსო, და გაჩუმდა.

ილია უკვე მეხუთე ლექციას ესწრება. ნეტავი რომელი პროფესორი შემოვა? ცხრილი ჯერ არ გამოუკრავთ, თორემ გვარი მაინც ეცოდინება.

შარვლის ჯიბიდან ვერცხლის მსხვილძენკვიანი საათი ამოიღო.

- ვლადიმერ დანილოვიჩი არ დაიგვიანებს, ისეთი კაცია! - უთხრა გვერდით მჯდომმა.
- ვინ ვლადიმერ დანილოვიჩი? - ჰკითხა ილიამ.
- სპასოვიჩი.
- პროფესორი? - დაინტერესდა ილია.
- პროფესორია, უნივერსიტეტში იმისი ფასი კაცი არ დადის.
- თქვენ საიდან იცნობთ ასე კარგად?
- ვიცნობ, ვიცნობ!

დერეფანში ზარმა გაიწკარუნა. დაფეთდნენ სტუდენტები, ყველამ თავისი ადგილი დაიკავა, ნანატრი სიჩუმეც ჩამოვარდა.

კარი გაიღო, შემოვიდა ახალგაზრდა კაცი, კათედრასთან არც მისულა, შუა დარბაზში შეჩერდა, სტუდენტებს ხელით ანიშნა, დასხედითო.

- ვაიმე! - აღმოხდა ილიას და განითლდა.

პროფესორმა მერხებს შორის გაიარ-გამოიარა, სტუდენტებს გადახედ-გადმოხედა, ილიას მერხთან ნაბიჯი შეანელა და იმ მოწყენილ სტუდენტს უთხრა:

- ყოჩაღად იყავი, არაფერია.

არც ილია დატოვა გულნაკლული, მხარზე ხელი მოუთათუნა და კათედრისკენ წავიდა.

რალა მაინცდამაინც ამ ორ სტუდენტს მიაქცია ასე განსაკუთრებული ყურადღება?

ილია მიხვდა, რაშიც იყო საქმე, პროფესორმა რატომ მიუალერსა მის დარცხვენილ მეზობელს, მაგრამ მაინც ჰკითხა:

- რატომ გაგამხნევათ, რატომ გითხრათ, არაფერიაო?
- რა ვიცი, რა ვიცი! - დაიბნა სტუდენტი. მერმე, თითქოს გამოსავალი იპოვაო, ახლა თავის მხრივ ილიას უთხრა: - შენც ხომ მოგეფერა.
- ჩემი საქმე სხვანაირად იყო და იმიტომ.
- მაინც რა საქმე გქონდა პროფესორთან?

- აი, რა. გუშინ „კუხმისტერსკში“ ვსადილობდით ქართველი სტუდენტები, ეშმაკად იურიდიულ საგანზე ჩამოვარდა ბაასი. როგორც მოგეხსენებათ ახალგაზრდობის საქმე, ბაასი ცხარე და მწვავე კამათად გადაგვექცა. კამათში ჩამოგვევრია სწორედ ეს პროფესორი, რომელიც იქვე სადილობდა. იმასაც მაშინვე პირში ვეცით და არა დავუთმეთ რა, თუმცა მეტად გარკვევითა და სადად განმარტა საკამათო საგანი. რა ვიცოდით, პროფესორი იყო, თორემ ხმას როგორ ამოვიღებდი.
- თქვენ გგონიათ, მუნჯივით რომ მჯდარიყავით, უფრო ასიამოვნებდით? არა, ჩემო მეგობარო, სპასოვიჩს კამათი და შეხლა-შემოხლა უყვარს. იგი ბუნებით იურისტია, ენის ვარჯიშს დიდ ყურადღებას აქცევს.
ილიამ თანქარი მოიმარჯვა და ლექციის ჩანერას შეუდგა, მაგრამ ახლადგაცნობილმა შეაჩერა.
- თავს ნუ შეინუხებთ, მე ჩანერილი მაქვს მისი ლექცია და მოგართმევთ.
- როდის მოასწარი?
- შარშანაც პირველ კურსზე ვიჯექი.
- ჩაგტოვეს?!
- ნულა მკითხავთ, დიდი ისტორიაა! - შეიშმუშნა უცნობი.
ილიამ მაინც განაგრძო წერა, სპასოვიჩი „იყო ერთ მოუსვენარ ხელების შლაში, თითქმის ტრიალში, ცმაცურში“. ეშხიანად კითხულობდა, გრგვინავდა, ლექ-

ციის ჩანწრა ილიამ ვერ შესძლო, თანქარი ჯიბეში ჩაიღო და თვალი მიაპყრო, ნიკო ნიკოლაძის თქმისა არ იყოს, „ტანში ეშმაკ ჩამჯდარ კაცს“.

- როგორ შესძელი ამ კაცის ლექციის ჩანწრა? - დაინტერესდა ილია.
- სტენოგრაფია მწყალობს, ჩემი დანწერილი ლექცია პროფესორმა გაასწორა და ხუთიანი არ დაიშურა.
- ყოჩაღ, მერე რატომ ჩაგტოვეს?
- სხვებმა არ გამახარეს.

ილია პროფესორის თითოეულ მოძრაობას თვალს ადევნებდა, მაგრამ რალაც გამოუცნობი შიში მის გულს თანდათან ერეოდა და მომართულ სმენას უხშობდა. „რალა ამ დანაკრული კაცის გვერდით მოვხვდი, - ფიქრობდა იგი, - იქნებ მეც მისი ბედი მომელის. რა ვიცი, როგორ წავა ჩემი საქმე. აა, ეს რა წამომცდა, სწავლის მეშინია, იმიტომ ჩამოვედი აქ, ცხრა მთას იქიდან, ცოდნას უნდა ვეზიარო. განათლებული და შემართული უნდა დავუბრუნდე ჩემს ქვეყანას“.

პირველი ახალწლის ღამე ილიამ პეტერბურგში მხიარულად ვერ გაითენა. მართალია, სტუდენტთა ხალისიან სუფრას ეჯდა, მაგრამ დანა პირს არ უხსნიდა. დეკემბრის მიწურულს სტუდენტებმა ჯიბე მოიქეცეს და სწავლის ფული შეიტანეს. ილიას ჯიბეს კი, როგორ თვითონ იტყოდა ხოლმე, „ჭავჭავაძის ავადმყოფობა“ სჭირდა.

გუშინწინაც ასე იყო. ილია მაგიდასთან იჯდა, სანთლის მკრთალი შუქი თეთრ ქალაქს დასცემციმებდა. ქალაქდღე მხოლოდ ორი სიტყვა ეწერა: „ხმა სამარიდამ“. კალამი მომარტყვებული ჰქონდა, მაგრამ სიჩუმეში კაკუნი გაისმა და ილიამ კარისკენ მიიხედა.

- შემობრძანდით!

შემოვიდა დიასახლისი, კარი ზურგს უკან მიხურა და იქვე მორიდებით გაჩერდა.

ილიას ორი თვის სახლის ქირა ევალეებოდა, დიასახლისის შემოსულა თუმცა არ გაეხარდა, მაგრამ შუბლი მაინც გახსნა და მიიპატიჟა.

- მობრძანდით!

- გმადლობთ, კნიაზო, პატარა საქმისათვის შეგაწუხეთ.

- პატარა საქმეო, მწარედ გაეცინა ილიას. - ახალი წელიწადი კარზე მოგვადგა, არ მინდა ვალი გაგყვეს, თქვენთვისაც არ ვარგა, ამიტომ შეგახსენეთ.

- კარგი, ხვალ მოგართმევთ!

- გაიხარეთ, ძილი ნებისა! - დიასახლისი გავიდა.

მაგრამ იმ ღამეს ილიას ძილი არ მიჰკარებია. „ხმა სამარიდამის“ წერაში პეტერბურგის ცივი ღამე ისე მალე დაიწვა და დაილია, როგორც ის სანთელი, შანდალზე რომ იღვენთებოდა.

ეს იყო 31 დეკემბერი.

ორი საათის შემდეგ ახალი წელი კარს შემოაღებს. რა

სიკეთეს ჰპირდება 1858 წელი?

იმედი მაინც სხვა არის! ილიამ ერთ თავის ნათესავ ქალს მისწერა:

„...ჩემი ამბავი რა მოგწეროთ, ხომ იცით ჭავჭავაძის სისუსტე სად არის - ჯიბეში და ისევ ჯიბეში; უხ! ხანდისხან რა უგრძნო ქარიშხალი წამოუბერავს ხოლმე ჯიბით, რა რუსეთული თავგები შადგებიან ხოლმე ყალყმედ თითქო ძალათ დაცარიელებულ ჯიბეში; მაგრამ კი სასონარკვეთილებაში არ შევალ ხოლმე, ნუგემ-ვიცემ და ამას ვეტყვი ხოლმე ჩემს თავს: ნუ გეშინიან, ერთხელაც იქნება, რომ ჩვენც გაგვიბრწყინდეს მზე-მეთქი, და ჩემი თავი ჩვეულებრივ სიცვიით მიჰსახეებს ხელმე: პაპაშენიც მაგას ამბობდაო, მაგრამ კი, შენი ჯიბე მაინც არ გათბაო. მეც თავს გავიქნევ ხოლმე, და ჩვეულებრივ სასოებით შავყურებ პირღია ცას, თითქო იქიდან მოველოდე გაქლიბულს ჭრელ-ჭრელ მანეთებს, მაგრამ თქვენც იცით, ცას რა რიგად ჰსძულს ვერცხლი. მაშასადამე, ლოდნა ჩემი ციდან ფულისა ამაოა.“

ახლა ეს წერილი მოაგონდა და გაიღიმა, მერე „ხმა სამარიდამ“ გაახსენდა, იქ ხომ ფულზე, მექრთამეობასა და ადამიანის სულის სიბინძურებზე წერს; დიამბეგს ცოდვა სამარეში მაინც აწეხებს, და აიძულებს მკვდარმა მაინც სიმართლე თქვას.

„სამართალს ფულითა ვსჭრიდი,
გროშისათვის კაცს ვყიდდი,
თვით ძმას ორმოს გაუუთხრიდი
და ჩემს ჯიბეს ნელ-ნელ ვზრდიდი“.

ილიას სულაც არ ესმოდა სუფრის აურზაური, მეგობრებმა ბევრჯერ შესძახ-შემოსძახეს ტკბილი ქართული სიმღერა, მაგრამ ის მაინც მონყენილი იყო. ახლა კი სუფრა ეშში შევიდა, ბიჭებს სასმელი მოეკიდათ. სიმღერას ტაში მოჰყვა. ერთი წონწოლა სტუდენტი სკამზე შედგა და ფეხები გაუსვ-გამოუსვა.

კობტა ილიასთან მივიდა.

- ილიკო, ჩვენ რა გვეშველება, არც სიმღერა ვიცით, არც ცეკვა. მოდი, დალევით მაინც დავლიოთ.

ილია ფეხზე წამოდგა. კობტამ სასმისები შეავსო, ერთი ილიას მიაწოდა, მეორე თვითონ აიღო.

- ჩვენს ქვეყანას, ჩვენს ხალხს გაუმარჯოს!
- გაუმარჯოს, გაუმარჯოს! - შესძახა ილიამ და ჭიქა აიღო.
- მოიყა, ჩვენებურად დავლიოთ.

მკლავი მკლავში გაუყარეს, ჭიქები პირთან მიიტანეს და ვახტანგურად გამოსცალეს.

მერე კარი გაიღო და თოვლის ბაბუა შემოვიდა. ამ დროისათვის შემონახული შამპანური გახსნეს. საცობები ჭერს მიეხალა, ჭიქები ქათვით გაივსო.

თოვლის ბაბუა ჭიქას არ დასჯერდა, ახალი წლის სადღეგრძელო ბოთლით შესვა, მერე საჩუქრები ჩამოარიგა.

ილიამ მალე დატოვა სუფრა, ქუჩაში გავიდა, თოვლის ბაბუას მიცემული კანფეტი პირში ედო. ცუდ გუნებაზე იყო, ბენვის საყელო აინია, ხელები ჭიბეში ჩაიწყო და დაცარიელებულ ქუჩას გაჰყვა, მალე ნევას მიაღდა. გაყინული მდინარე თითქმის თოვლს ამოევსო. მაგრამ ყინულის ქვეშ მაინც ცოცხლად ფეთქავდა, ღამის მოსაწყენ მყუდროებას არ ეუუებოდა. მარმარილოს მოაჭირს მიყრდნობილი ილია ბევიდან დაჰყურებდა მდინარეს, მაგრამ ფიქრით და გულით შორეულ პეტროგრადში კი არა, თბილისში იყო და მტკვრის ჯავრიანი დუღუნი ესმოდა.

ზამთრის სუსხიანი სიჩუმე დაარღვია ილიას ოღნავმა ჩურჩულმა. იგი თავისთვის ამბობდა ჯერ კიდევ გულში ახლად აკინძულ ლექსს.

ბევრი ვიტანჯე, ვიცი რომ მელის
ბევრიც სხვა ტანჯვა მომავალშია,
მაგრამ ეს არ არს მიზეზი ცრემლის,
რომელიც მარად თრთის ჩემ თვალშია.

ყველას გაუძღვებ: სასტიკ ტანჯვასაც,
ჩემ საყვარელთა იმედთ დანთქმასაც,
თვით სიყვარულის ფიცისა ლალატს
და თვით ჩემ ბედსაც, ამ უგრძნო ჯალათს.

ყველას გაუძღვებ, როგორც კლდე ქვისა,
ბედთანა ბრძოლა ვით მეშინება?!
ხოლო ჩემ თავის არათურობისა
არ ძალმიძს, ძმანო, ვერ რით გაძღვება!

იანერის შუა რიცხვებში უფრო გაჭირდა ცხოვრება.
უნივერსიტეტში სწავლის ფულის შეტანის ვადა მიიწურა,
მამიდამ ფულის მაგიერ სიღარიბის მონწიობა
გამოუგზავნა, ესეც ძლივს ვიშოვნე, თელავში ვინ არ
შევანჯახეო.

ილიამ ბედი სცადა, უნივერსიტეტში თხოვნა შეიტანა,
სწავლის ფულისაგან გამანთავისუფლეთო. თხოვნას
სიღარიბის ცნობაც დაურთო, ბედმა გაუღიმა, მალე
სასურველი პასუხი მიიღო და დამშვიდდა.

ერთი თვის შემდეგ ილიამ კარდანახიდან წერილი
მიიღო, ნინო ათას მოკითხვას და კოცნას უგზავნიდა.
პასუხში ილიამ უფულობის ჩივილთან ერთად
საყვედურიც არ დაივინცა. „რა არის, ნინუცი, რომ
იწერები წიგნს და ახალ მანდაურ შექცევამდ, ან კუტ-

რობაზედ, მაგრამ კუტრობა წამომცდა, კუტრობაზედ ნულარ მომწერთ, თვითონ მე კარგად ვიცნობ, რა წითელი კოჭიცა ბრძანდება. ჩემ ჯიბეში ნეტავ ჩაგახედა, რა ამბავია, რუსეთულ თაგვებს ისეთი ჯირითი გააქვთ, რომ მეტი არ იქნება. ღმერთმანი, ჭრელ-ჭრელ მანეთებს წამოჰკრავენ ფეხს, შენ ნუ მოუკვდე ჩემს თავს! ისეთი მონმენდილია აქაურობა, რომ ყაბახის მოედანზედ არ იქნება ასე“.

მაგრამ ამ უფულობამ, ამ გაჭირვებამ ვერ გასტეხა ილია, ხშირად ხმელ პურს ლოღნიდა, გულს დაიმაგრებდა და ისევ ლეექციებზე წავიდოდა. იქ შიმშილი და ხელმოკლეობა ავიწყდებოდა, თავის საყვარელ პროფესორებს ყურს უგდებდა, მათ სიტყვებს გულში ილექავდა.

სიღარიბეზე ნუხილი და ჩივილი ნათესავებისადმი მონწერილ ბარათებში რომ ვერ ჩასტია, მერე პოეზიას მიმართა. უეჭველად ავტობიოგრაფიულია მისი ცნობილი ლექსი „ქართველ სტუდენტების სიმღერა“. ამ ლექსის ერთ-ერთ ვარიანტში ვკითხულობთ:

„ღარიბნი ვართ, ჩვენს ჯიბეში
ხშირად გროში არც კი არი.

.....

გამხმარ პურსა ცივ წყალშია
უდრტვინველად ხშირად ვალბობთ,
ჩარდახშია ცივსა ოთახს
ჩვენი გულის ორთქლით ვათბობთ“.

მაგრამ, მიუხედავად ასეთი ღუხჭირი მდგომარეობისა, სტუდენტი მაინც მხნედ არის, სულიერად არ ეცემა, პირიქით, წინასწარ გამიზნული აქვს მომავალი ბრძოლის გზა, სწამს თავისი მიზნის სიღიადე, მოწადინებულა, მაღალ კულტურას ეზიაროს და ქვეყანას გამოადგეს.

II

ტახტზე წამოწოლილი ილია ვახტანგ მეფის სამართლის წიგნს კითხულობდა. ეს ნანატრი წიგნი თბილისში ვერ იშოვნა, შორეულ პეტერბურგში კი აღმოჩნდა. პროფესორმა დავით ჩუბინაშვილმა სალომე ბატონიშვილისეული წიგნები ქართველი სტუდენტების ბიბლიოთეკას გადასცა. წიგნების მიღება-ჩაბარების აქტზე, სხვებთან ერთად, ილიამ და აკაკიმაც მოაწერეს ხელი.

ილიამ მაშინვე წამოიღო ვახტანგ მეფის სამართალი და, აი, დღეს მეორედ კითხულობს ამ ძველი ქართული კანონების კრებულს.

სალამომ მოატანა, დიასახლისმა პენიანად განწმენდილი და გაუთოებული მუნდირი შემოიტანა და სკამის საზურგეზე გადაჰკიდა;

დიასახლისი ჩუმად გავიდა ოთახიდან. ილიამ მისი შემოსვლა ვერც კი გაიგო, გატაცებით კითხულობდა, მალე კოხტა აფხაზმა შემოალო კარი და შემოსძახა:

- სოფო დაგავინყდა?
- ილიას წიგნისთვის თვალი არ მოუშორებია, ისე მიუგო:
- უქონლობა ყველაფერს ავინყებს კაცს!
- თარ-ხმალი დაჰყარე?!
- ეგრე გამოდის! - ილია წამოდგა და გაშლილი წიგნი მაგიდაზე ჩამოღო. - მოდი, უმუნდიროდ მივიდეთ.
- თავი მოგვეჭრება!
- შენ ეგა თქვი, ახლა რა ვიღონოთ? - უთხრა კოხტამ.
- აი მუნდირი, ჩაიცვი და წადი! - უთხრა ილიამ.
- გულის გარეთ ნუკი მეუბნები, სოფო შენ მოგწონს, მის სანახავად მე მგზავნი?.. კარგი, წავალ! - ჩაიცინა კოხტამ, მუნდირს ხელი დასტაცა, ჩაიცვა და ილიას მიაძახა: - აბა გამიძეხ, წავიდეთ!
- კი მაგრამ, მე უმუნდიროდ?
- მაშა, წამოდი!
- ეგ არ გამოვა, კოხტა.
- წამოდი, კარგი რამ მოვიფიქრე.
- მაინც რა მოიფიქრე, ხომ უნდა მითხრა?
- წინასწარ ვერ გეტყვი, ახლა წამოდი.

* * *

ილიამ სოფიო ჩაიკოვსკაია ილიკო ჩოლოყაშვილის წვეულებაში გაიწვნო. უცებ, ერთი ნახვით მოეწონა ეს ლამაზი ქალიშვილი. როცა ჩაის შემდეგ ბაღში გავიდნენ, მთვარის შუქში გახვეული სოფიო მიუწვდომელი ეჩვენა.

„ლამის, ტურფავ, შენს ტრფობაში მე შთაგნურო სრულად გული!“ - ენაზე მოადგა, მაგრამ ვერ გაუმხილა. ის ბედნიერი საღამო იყო. ილია გატაცებით ლაპარაკობდა. საქართველოს ამბებმა ქალიშვილი ძალიან დააინტერესა.

ბოლოს გაბედა და თავისი მოცახცახე ხელი შეახო სოფიოს პატარა ხელს, რომელსაც ბედესავით ნაქსოვი თეთრი ხელთათმანი ემოსა.

ოცდასამი წლის ვაჟკაცს ამაზე მეტი სიხარული არც უნდოდა. გული დასწყდა, სტუმრები რომ აღრე აიშალნენ, ილია და სოფიო საერთო დარბაზში გავიდნენ.

- ბევრი ლექსი გითხრათ ილია გრიგორიჩმა? - ჰკითხა სოფიოს დიასახლისმა - ივანე ანდრონიკაშვილის ასულმა, და გამომცდელად გაუღიმა.

სოფიო განითლდა.

- ლექსები არ უთქვამს, მაგრამ თავისი ქვეყნის ისტორია სცოდნია.

სოფიომ თავი დაუკრა დიასახლისის და ტანის მოქნილი რხევით წინ გაუძღვა ილიას. ქუჩაში გამოვიდნენ. სადარ-

ბაზოსთან ეტლი იდგა. მეეტლე მაშინვე წელში გასწორდა და სკამის საფარი გადასწია.

- შეიძლება გაგაცილოთ? - მორიდებით ჰკითხა ილიამ.
- თუ დრო გაქვთ...

ილია ეტლში ჩაჯდა, ახლოს, სულ ახლოს იგრძნო ქალიშვილის მსუბუქი, სურნელოვანი სუნთქვა. აღელდა, სიტყვა დაეკარგა, უხერხულად ჩამონოლილი სიჩუმე სოფიომ დააღვია.

- რას გაჩუმდით, მითხარით თქვენი ლექსი.
- აი, თქვენზე დავწერ და მაშინ სიამოვნებით.

ილიას უცებ სხვა თეიქრი შემოაწვა, ჯიბეში ხელი ჩაიყო, ნეტავ რამდენს გამომართმევს მეეტლეო და გუნება წაუხდა.

- როდის დასწერთ?
- ამაღამ, შინ რომ მივალ.
- ცეცხლი ხართ, კავკასიელები! - აჩქარება მოუწონა სოფიომ და ხელი ტუჩთან მიიტანა, სიბნელეში ბეჭდის თვალმა გაიელვა.
- კიდევ როდის შევხვდებით? - შეაგება ილიამ.
- ასე უცებ პაემანი? ჯერ გავიცნოთ ერთმანეთი.
- თუ არ შევხვდებით, როგორ გავიცნობთ? - მოუჭრა ილიამ.
- კარგი, თქვენ და კობტა აფხაზი ერთად მოდით. ასე აჯობებს. დედა კობტას იცნობს და აფასებს.

- როდის?
- ზეგ, საღამოს რვაზე, ლექსიც არ დაგავიწყდეთ. ეტლი გაჩერდა.

სოფიომ მეეტლეს ასძახა:

- ეს ბატონი შინ მიიყვანე! - ხოლო ილიას ხელი ჩამოართვა და უთხრა: - ჩემი ეტლია, არაფერი მისცეთ.

სოფიო სადარბაზო შესასვლელში რომ მიიმალა, მეეტლემ ილიას უგემურად ჰკითხა:

- საით, ბატონო?
- ამაღლების პროსპექტი, 122.

ილია ეტლში არხეინად გადაწვა. ღრმად ჩაისუნთქა ნელსაცხებლის მოტკბო სურნელი, რომელიც ასე უხვად დატოვა ჩაიკოვსკაიამ.

შინ გვიან მივიდა, კოხტას ეძინა. ილიამ ლოგინიდან წამოაგდო და მოუთმენლად მიაძახა:

- ბიჭო, გავკეთდი, ჩაიკოვსკაია გავიცანი, ანგელოზი ყოფილა, ტყუილად კი არ აქებდი შენ.
- მერე?
- ზეგ დაგვპატიჟა, უშენოდ კარს არ გამიღებს. დედა გაუჭავრდება, წამოხვალ?
- თუ საჭიროა, რატომაც არა.

იმ ღამეს არ დაუძინიათ, უეცარმა გატაცებამ ძილი გაუკრთო ილიას. ხან მღეროდა, ხან ოხრავდა, ხან ლექ-

სებს ამბობდა. გათენებისას მაგიდას მიუჯდა.

ნანატრი ჰაემანის დღეც დადგა, მაგრამ მეგობრებს ერთი მუნდირის მეტი არ ჰქონდათ და საგონებელში ჩავარდნენ. ბოლოს კოხტამ ურჩია:

- მუნდირს ილიკო ჩოლოყაშვილისას ვიშოვნით.

ჩოლოყაშვილი იმპერატორის ამაღლაში მსახურობდა და ყველაფერი თავსაყარი ჰქონდა, მაგრამ ილიას ესირცხვილა მასთან სათხოვნელად მისვლა. არც ამხანაგი გაუშვა.

ქუჩაში უგუნებოდ გამოვიდნენ. კარეტა გააჩერეს, შიგ ჩასხდნენ. ჩაიკოვსკაიას სადარბაზოსთან მუნდირში გამოჭიმული კოხტა კარეტიდან გადმოვიდა და ათიოდე წუთის შემდეგ გამობრუნდა. დახურულ კარეტაში მუნდირი უცებ გაიხადა, ილიას ჩააცვა და ზურგზე დაჰკრა ხელი.

- ღმერთია შემწე, შედი.

ილია რომ კარეტიდან ჩავიდა, კოხტამ მეეტლეს ასძახა, წადიო. კარეტა დაიძრა, კოხტამ ფანჯრიდან გახედა დაბნეულად მდგარ ამხანაგს.

ილია გვიან, გაუბედავად აჰყვა მარმარილოს კიბეს.

ლაქიამ კარი გაუღო, კართან თვითონ სოფიო შემოეგება. ილიას მონყენილი ეჩვენა ეს ნანატრი ქალიშვილი. უცებ ხელი გაუნოდა და გაიღიმა.

- სალაში, მაჰატიეთ, ცოტა დავიგვიანე!

- კობტამ არ დაიცადა, საშური საქმე მაქვსო, მეგონა, თქვენც არ მოხვიდოდით. ჰო, მართლა, ლექსი? - აჩქარდა სოფიო.
- ვერ დავწერე. ლექსის წერას მშვიდად ყოფნა უნდა. თქვენ სიმშვიდე წამართვით.
ეს პასუხი მოეწონა სოფიოს, მკრთალ სახეზე კმაყოფილმა ღიმილმა გადაურბინა.
- თქვენი პასუხიც ლექსია, მხოლოდ რითმა აკლია! - უთხრა სოფიომ და მეორე ოთახში გავიდა, იქ ვიღაც იყო. ილიას ჩურჩული მოესმა.
სოფიო მალე გამობრუნდა, შავი ხავერდგადაკრული ალბომი გამოიტანა და მაგიდაზე დადო.
- აი, ჩემი ალბომი, გთხოვთ ჩასწეროთ რამე! - ალბომი გადაშალა, საწერ-კალამიც მიანოდა.
ილია მაგიდას მიუჭდა.
- მხოლოდ ქართულად. მე მიყვარს თქვენი ენა.
ამ აღიარებამ ილია უფრო გაახარა.

უცხო თემის ყარიბ მთქმელსა
რად აღმიგზენ სიყვარული?..
ლამის, ტურფავ, შენს ტრფობაში
მე შთავწერო სრულად გული! -

ჩაწერა ილიამ, მერე სიტყვასიტყვით უთარგმნა ლექსი. სოფიო განითლდა და თავი დახარა. შუბლზე წაბლისფე-

რი კულუღი ჩამოეშალა. ილიამ თვალღი ვერ მოსწყვიტა დარცხვენღილ ქალიშვილს.

ილიას სიტყვა დაეკარგა.

ღუმღიღი სოფიოსაც გადაედღ.

ოთახღი უხერხული სიჩუმღით აივსღ.

მაღღდაღზე გადაშღღიღღ აღბომშღღი ოთხსტრიქონღან ლეექს ლამფის შუეღღი დასციმციმებღდა. ილიამ თვალღი გადაავღღო ლეექს. უცებ კალამღი აიღღო და რაღღაც მიანწრა.

- რა ღღაუმატეღთ? - მაშინვე ჰკღითხა სოფიომ.
- კღითხვის ნღშანი.
- კღითხვის ნღშანი?
- ღღიახ, რაღღ აღღმიღღზენ სიყვარული-მეღთეღღი, გეკღითხებღით.
- ჰღო, კარგღით, კარგღით.

სოფიო გავღღდა წინა ოთახშღღი, ცღოტა ხნღს შემღღდეგ მაღღალ, ჭაღღარა ღღედკაცს შემოუღღღღა.

- თავაღღო, გაიკანღით ღღეღღაჩემღი.

იღღია მაშინვე წამოღღდა და ღღიასახღღისს მიეგება. მღსალმებღღისა და კღითხვა-მოკღითხვის შემღღდეგ სტუმარღი ღღიდხანს არ გაჩერებულა.

მაღღე სოფიოს ორღი ამხანაგღი მოუვიღღა. ერთღი მათგანღი, ღღაბაღღი და გამხღღარღი, პრანჭღია ჩანღღა, რუსულაღღ ხმას არ იღღებღღა, ფრანგულაღღ ირჯებოღღა, სულ თავღს ფეხსაცმელსა და ვარღღისფერ კაბას უყურებღღა.

იღღიამ მოინწინა, წამოღღდა.

- რა გეჩქარებათ?
- წიგნები, სწავლა, სტუდენტი ვაყის ხვედრი!
სოფიომ ხელის ჩამორთმევის დროს ჩუმად უთხრა:
- შემოიარეთ, არ დამივიწყოთ!
გახარებული ილია შინ წავიდა.
სახლში კობტამ მაშინვე შეაგება:
- როგორაა საქმე?!
- შევირთავ, ქორწილი და მისი ჯანი!
მაგრამ ნაჩქარევ აღტაცებას უცებ თრთები შეეკვეცა.
ღიასახლისმა ყვარლიდან გამოგზავნილი კონვერტი
შემოუტანა. საჩქაროდ გახსნა და მაშინვე შუბლი შეიკრა.
- რა ამბავია? - ჰკითხა კობტამ.
- ნახე, რაებს მიბედავს სოლომონი! - მიუგო ილიამ და
მუჭში ჩაჭმუჭნული წერილი მიანოდა.
სოლომონ ჭავჭავაძე წერდა: „ილიკო, სირცხვილი არ
მაჭამო, ი, რაღაც მიქარვა ბრძოლებია მანდ, სტუდენტებს
თურმე მეფის ჩამოგდება უნდათ, მათი ჩამოსაგდები მეფე
ჯერ არ დაბადებულა. შენ არ გაბრიყვდე და ფეხის ხმას
არ აჰყვე, მალე დაამთავრე, გელოდები. ხომ იცი, რა
ფული მიჯდება შენი შენახვა. ეს შენ უნდა დააფასო“ ...
ილიამ ვერ მოითმინა, მეგობარს წერილი გამოსტაცა
და ღუმელში შეაგდო, უყურებდა, როგორ მოიკრუნჩხა
ქალალდი ნაკვერჩხლებზე, მერე ცეცხლი აბრიალდა და
შავი ფერთული ალმა აიტაცა.

- ასე უკვალოდ დავინვა, თუ სოლომონს ეს წერილი ძვირად არ დავუსვა!
- რას იზამ, უნდა მოითმინო.
- მე და მოთმენა? მაშ, მჩვარი ვყოფილვარ. შენ მაინც კარგად მიცნობ, ასეთ რჩევას როგორ მაძლევ?!
- მაშ რას იზამ?
- ყველაფერს, ყველაფერს. რომ მოვდიოდი, მომშხამა ჭკუის სწავლებით, გავჩუმდი, ვიფიქრე, უფროსი კაცია-მეთქი და მოვითმინე, მაგრამ არა. ვერ მოვითმინე, წამოსვლისას მამიდას დავუბარე, როგორმე ფული მოაქეჩე და ეს ბრიყვი სოლომონი ჩამომაშორე-მეთქი.
- გოგოს რას ეუბნები?!
- ფულმა, ანგარიშმა გოგო კი არა, თავი შემაძულა, არ მინდა, არაფერი არ მინდა, მომასვენოს სოლომონმა. ეეს, შენ რა იცი, რა შხამია სხვისი დამადლებული ლუკმა.
მეორე დღეს ფოსტალიონმა კარზე მიაკაკუნა.
- ფული, ფული! - მიახარა ილიას.
ხმაურზე დიასახლისიც მოვიდა, სწორედ კარგ დროს მიიღო ფული, ორი თვეა ილიას სახლის ფული არ გადაუხდია.
- აი, აქ მოაწერე ხელი! - უთხრა ფოსტალიონმა და სალოკი თითი ქვითარზე დადო.
ილიამ ქვითარი გამოართვა, გახედ-გამოხედა, შუბლი

შეიკრა. „ხედავ, სოლომონს, იმ მწარე წერილისათვის ფული დაუდევნებია“, გაიფიქრა ილიამ და ხელმოუწერელი ქვითარი ისევ ფოსტალიონს გაუწოდა.

- არ მინდა, არ ვლებულობ ამ მოწყალებას.
- რატომ?! - ერთხმად იკითხეს დიასახლისმა და ფოსტალიონმა.
- ეგ მე ვიცო, უკან წაიღე! - ილიამ ჯიბე მოიქექა და ორიოდ გროში, იქ რომ უბრწყინავდა, ისიც ფოსტალიონს ჩაუდო ხელში.
- მაშ წამინერე, რომ მიღებაზე უარს აცხადებ.
- სიამოვნებით!

ფოსტალიონი რომ წავიდა, გამშრალ დიასახლისს ილიამ შინაურულად მხარზე ხელი წაუთათუნა.

- ნუ მოიწყენთ, თქვენს ვალს ორ-სამ დღეში მოგართმევთ!
- აქ სად იშოვნით ფულს?
- ვიშოვნი, ფულს ყოველთვის ვიშოვნი.
- ღმერთმა ხელი მოგიმართოს, მაგრამ იმ ფულს, უკან რომ დააბრუნეთ, სუნი სდიოდა?
- მაშა, ცუდი სუნისა იყო! - გაიღიმა ილიამ.

საუბრის შემდეგ წერილი დანერა. სოლომონის ფულს მწარე წერილი დაადევნა, თავისი ბოღმა და კილვა იმ წერილში ძლივს ჩატია.

გულიდან ლოდი რომ მოიხსნა, მერე დიდ მაგიდაზე გაშლილ ქაღალდებს მიაშურა, ილია „გლახის ნაამ-

ბობს“ წერდა. სამწუხაროდ, იმ პირველმა ვარიანტმა ჩვენამდე ვერ მოაღწია.

ელენე ანდრონიკაშვილმა დაბადების დღეს თბილისიდან საჩუქრად ვერცხლის ქალური ქამარ-ხანჯალი მიიღო. ოფიცრების ცოლებსა და ქალიშვილებს ყველას თვალში მოუვიდა ეს საჩუქარი, ზოგმა წელზე შემოირტყა და სარკეში გასინჯა მისი პენიანობა. სხვებს არც სოფიო ჩაიკოვსკაია ჩამორჩა. ქამარ-ხანჯალშემორტყმული დიდხანს ტრიალებდა სარკის წინ.

- გხატავს, სოფოჯან, გხატავს! - ქართულად ჩასჩურჩულა ელენემ.

სოფიოს ეგონა, დიასახლისი თავის ნივთს სთხოვდა, ქამარი მოიხსნა და გაუწოდა.

ილია მის ყოველ მოძრაობას თვალს ადევნებდა, სოფიო რომ მასთან მივიდა, მაშინვე ჰკითხა:

- მოგეწონა?

- ძალიან.

- გექნება. მივწერ ჩვენებს და გამოგიგზავნიან.

მეორე დილას ილია ადრე ადგა, კარდანახში გასაგზავნი ბარათი დაწერა. ამ ბარათში პოეტმა თავისი ნათესავები მიიკითხ-მოიკითხა და ბოლოს „სულზედ უტკბეს დას - ნინოს“ სათხოვარი გაუმუღავნა. „ერთი რამა მაქვს შენთვის სათხოვარი, თუ გიყვარდე, თუ ჩემი

მცირედი სიყვარული გაქვს, ამისრულე. ერთმა ქალმა ქალური ვერცხლის ქამარი მთხოვა ხანჯლითა და დავპირდი. შენი ჭირიმე, ნინუცი, ნუ გამამტყუნებ იმ ქალთან, მერე უნდა იცოდე, რა ქალია! იმათ ოჯახში, როგორც შვილი ისე ვარ მიღებული, ასეთი დედ-მამა ჰყავს, რომ თავი შემეყვარეს. თუ შეიძლება, შენი სულის ჭირიმე, ნინო, სააღდგომოდ გამომიგზავნე. ვიცი, რომ გიყვარვარ, თუმცა ცოტა ხელის მოჭერა გიყვარს, მარამ ჩემი სიყვარული გაგაბედინებს“.

ამ წერილმა მოგონებები და ფიქრები აუშალა, ცუდ გუნებაზე დადგა. წერილი კონვერტში ჩადო და წიგნი აიღო. ფიქრების გასათფანტავად წიგნი უებარი წამალი იყო. დიდხანს იკითხა, უკვე სადილობამ მოაღწია, შიმშილი არ უგრძვნია, მაგრამ გულმა მაინც მეგობრისაკენ გაუნია.

პეტრე ნაკაშიძე, იქვე ახლოს, ილიას მეზობლად ცხოვრობდა, საზაფხულოდ თბილისში წასვლა ველარ შეძლო და პავლოვსკი დარჩა.

- პეტრეს გაუმარჯოს! - შესძახა ილიამ ღია ფანჯარაში.

პეტრეს მაგიდაზე „ცისკრის“ ნომერი გაეშალა, ფურცლავდა გაყვითლებულ ჟურნალს, რაღაცას ეძებდა. იქვე კუთხეში სამოვარი შიშინებდა. პეტრეს გაეხარდა მეგობრის მოსვლა და გაეხუმრა:

- ასე ადრე რამ მოგიყვანა, ჩაიდნის შიშინი ხომ არ გაივინე?!

- მაშა.

ილია ოთახში შევიდა, საყელო შეისხნა და სკამზე ჩამოჯდა.

- ამ გაზეთების კითხვას კიდევ ვერ მორჩი?

- ზოგი ნომერი არ მქონდა და გუშინ მივიღე.

ხანდახან გადავფურცლავ და გულს მომემპვება ხოლმე... შენ ბედი დაგყვა, ილია, პირველმა ლექსმა პირველი ქება მოგიტანა. ივანე კერესელიძის წერილი ხელახლა გადავიკითხე და მეამა.

- მადლობის მეტი რა მეთქმის, მაგრამ, ჩემო პეტრე, „ჩვენი ცისკარი ჯოჯოხეთის კარია და არაა ცის“.

- რა მწარე ენა გაქვს.

- არ მეთანხმები თუ?

პეტრე ჩაფიქრდა, პასუხი შეუგვიანა.

- გეთანხმები, მაგრამ „ცისკარი“ გასაწირავი არ არის, ის მაინც დიდ საქმეს აკეთებს.

- დიდი საქმე... - დაიწყო ილიამ, მაგრამ მეგობარმა შეაჩერა.

- რა გაქვს საკამათო, მოდი, ჩაი დავლიოთ. ყუათიანი ნამცხვარაც მაქვს.

ილიას ცხელი ჩაი არ უყვარდა. როგორც ყოველთვის, ახლაც ფინჯანში დაასხა მოყავისფრო, გუბგუბა ჩაი, თანაც ნამცხვარი შეატანა. ერთი ჭიქა რომ გამოცალა, მეგობართან ბოლღში მოიხადა და წამოდგა.

- იყავ, სად მიდიხარ?

- შინ უნდა წავიდე. „დედა და შვილი“ მიტირის! - გაიღიმა მან.

პეტრე გუშინ იყო ილიასთან, წაიკითხა პოემის დასაწყისი, მოეწონა დედის მონოლოგი და დაიმახსოვრა. მას საოცარი მესხიერება ჰქონდა. იცოდა მეგობარს აამებდა და ის ადგილი ხმამაღლა წარმოთქვა:

მე ვწუხვარ მასზედ, რომ ჩვენს მამულს ამ ნეტარ დღესა მხოლოდღა ერთი შეაკვდება ჩემგან შობილი...

ასიც რომ მყვანდეს, ასსვე მხედრად მამულს მივცემდი.

ილიამ გადაწყვიტა ეს პირველი პოემა მიეძღვნა პეტრე ნაკაშიძისათვის.

და, შინ რომ მოვიდა, უკვე მოფიქრებული „მიძღვნა“ ცალკე ქალაქდზე დაწერა და პოემას წაუმძღვარა.

სიჩუმეში, ფიქრსა და წუხილში ილიამ დაინახა, როგორ შემოვიდა სოფიო ჩაიკოვსკაია. რალაც ამაყი და მიუკარებელი ეჩვენა, ერთიც არ გაუღიმა, ფანჯარასთან გოროზად დადვა.

ილია მისკენ რომ წავიდა, მაშინვე უკვალოდ გაქრა.

ილიამ თავისი ფიქრი, სურვილი და ეჭვი პატარა ლექსში გამოამჟღავნა:

„სატრფოვ! ხშირად ლალი ფიქრი
გამიტაცებს მსუბუქ ფრთითა,
ვითომც მე რომ მოგხვევივარ
სავსეს ეშხის სიამითა.

„დასტკები, გიჟო! - მეუბნები, -
აჰა ჩემი წრფელი გული!
ბაგე ბაგეს ჩავაკონოთ
და ჩავართათ სულთან სული!“
თუმც ეს, ტურთავ, სიზმარია,
მითაც სტკებება გული კრული...
თუ არ სიზმრით, მაშ რით დასტკებს
უიმედო სიყვარული!“.

ილიამ ლექსს თარიღი მიაწერა: „21 ივლისი 1860 წ.,
პავლოვსკი“.

კვირას სოფიოს მოსამსახურემ ბარათი მოუტანა.

ილიამ ამ მოულოდნელ ბარათს თვალი გადაავლო
და გაუკვირდა: „პაემანი სასწრაფოდ, დღეს ექვს საათზე,
რამ ააჩქარა?“ - გაივლო გულში და იკითხა:

- სტუმრები ხომ არ ჰყავს?
- არა, რა გადავცე?
- შევხვდები.

მოსამსახურე წავიდა. ილია ფიქრმა წაიღო.

ივლისმა ცუდად დასცადა. სოფიოს თითქმის ყოველ-
დღე ხვდებოდა, მაგრამ მათ ურთიერთობაში ჩამომ-

დგარი სიცივე თანდათან ღრმავდებოდა. ქალიშვილი გულს არ უხსნიდა. წინანდელივით წრფელი და მხიარული აღარ იყო, რაღაცას მალავდა. ჩათვიქრებული და მონწყენილი ჩანდა.

ილია გრძნობდა ამ სიცივეს, მოახლოებულ შიშს და მოსვენებას კარგავდა.

... ექვს საათზე ილია სოფიოს აგარაკზე მივიდა.

შემკრთალი სოფიო ღიმილით გამოეგება და იქვე, ბაღში, სკამზე ჩამოსხდნენ. პირველად ხმის ამოღება ორივეს გაუჭირდა, ბოლოს ისევ ილიამ დაარღვია უხერხული სიჩუმე.

- ქამარ-ხანჯალი გექნება, აუცილებლად გამომიგზავნიან!
- რა საჭიროა, - ცივად მიუგო სოფიომ. - მე ხომ მაგ საჩუქარს ვერაფერში ვერ გამოვიყენებ?!
- რატომ, დაგშვენდება!
- მე და ხანჯალი?! - სოფიომ გაიცინა.

ილიას გული ჩასწყვიტა ამ ცივმა სიცილმა.

- მე მოგართმევთ და, თუ გინდათ, მერე გადააგდეთ.
- ბრავდებით?! რას ნიშნავს, რომ ფიცხი ქვეყნის შვილი ხართ, მაგრამ ამაზე ახლა სიტყვას არ გავაგრძელებ. ისედაც ბევრი რამ უნდა გითხრათ.

ილიამ უკვე იგრძნო, კარგ რამეს რომ არ ეტყოდა, წინასწარი შიში და ეჭვი არ ასვენებდა.

ის „ერთი სიტყვა“ ილიამ მშვიდად ვერ მოისმინა, ტყუი-

ლად კი არ უაზრებდა გული ცუდს. შინ გვიან მივიდა მოშხამული, დამცირებული და უიმედო. ის „ერთი სიტყვა“ და თავისი ბოღმა მაშინვე ქალაქდზე გადაიტანა ლექსად.

„ერთხელ მითხარ: „ცხოველს ქვეყნის
ივერიის შობილი ხარ;
მაღალ მთების ქარიშხალით,
ელვით, ჭექით გამრდილი ხარ.
მე ჩრდილოეთის ველზედ ვყვავი,
ზამთრის სუსხით დაჩაგრული;
შენს მხურვალს გულს ვითა გასცემს
პასუხს ჩემი ცივი გული?!“

ლექსი დაამთავრა, ხმამალა გადაიკითხა და თარიღი მიუწერა: „22 ივლისი, 1860წ., პავლოვსკი“.

ილია წამოდგა და ის იყო კარიც გაიღო. შემოვიდა კობტა. ჩაის შესატანებლად ნამცხვარი ეყიდა, ქალაქდის პარკი მაგიდაზე დადო, ჭერ კიდევ მელანშეუშრობელი ლექსის გვერდით.

- ტკბილი ჩაი, ტკბილი ნამცხვარი, პირი ჩავიტკბარუნოთ და მერე კარგა დაგვეძინება! - თქვა კობტამ და უკან კარებში გასძახა: - ხაზეკა, სამოვარი! ილიას ხმა არ ამოუღია, მოლუშული იჭდა. კობტამ მისი უგუნებობა უცებ ვერ შენიშნა, პარკი დარ-

დიმანდულად გახსნა და მიაწოდა.

- აჰა, აიღე.
- არ მინდა, გმადლობთ!
- რა მოგივიდა ილიკო?! - იკითხა გაკვირვებულმა, მაგრამ გულის ტკივილს უცებ მიუხვდა. - გაგიჭირა ამ სიყვარულმა საქმე, დღესაც მოგშხამა?

კობტამ ახლა შენიშნა ლექსი, აილო, წაიკითხა და ისევ ჩუმად დადო მაგიდაზე.

- „ცივი გული“... მართალი უთქვამს. გაუშვი, მაგისი რჯული არ იყოს, შენ მაინც უცნაური გატაცება იცი, მოეშვი მაგ ცივ გულებს. საცაა შინ დავბრუნდებით და იქ ჩვენებური ცხელი ქალის გული ცოტაა? ჰა, რას იტყვი?

ილიას ნაღვლიან ფიქრში გული ეწურებოდა და კობტას ლაპარაკი არც გაუგონია.

- კაცო, ენაც წაგართვა იმ ქალმა? ხმა გამე! - წამოიყვირა კობტამ.

- კალოზე ხომ არ ხარ, დაჯექი! - მიუგო ილიამ.

კობტა არ დამჯდარა, ახალი ლექსი, თეთრ, ტკიცინა ქალაღდზე შავი მელნით რომ იყო დაწერილი, ხელში შეათურიალა.

- ვაცხოხნე სოფიოს მამა, ისე დაგწვა, რომ ცხელ-ცხელი ლექსები გაყრევინა.

- კობტა, გეყოფა.

- სოფიოს მადლობას ვეტყვი. აი, ნახავ, თუ არ ვუთხრა.

- კარგი ერთი, გეყოფა!
ილიამ ქალაღლი გამოართვა, ახალი ლექსის სათაური - „სოფიო ჩაიკოვსკაიას“, წაშალა.
- მარტო ეს არ კმარა. გულიდან უნდა ამოიშალო.
- რა ხუმრობის გუნებაზე ხარ?!
- რაც უნდა მითხრა, შევხვდები თუ არა, კარგ მაღლობას ვეტყვი.
- რისთვის?
- ივლისში რომ კარგი კალო დაგვიყენა. ამდენი ლექსი შენ არასდროს არ დაგინერია.
- რას ამბობ, „მუშაც“ იმან დამაწერინა?
- არ იცი რო!
ილიას გაეცინა.
- ვეტყობა, ბევრი ტკბილი გიჭამია, კარგ გუნებაზე ხარ.
- შენც მოგიტანე, ჭამე, შენც კარგ გუნებაზე დადგები.
- მე კანფეტი გუნებას ვერ გამიკეთებს.
- აბა, მე რა ბავშვი მნახე?
დიასახლისმა მოთუხთუხე სამოვარი შემოიტანა, მაგრამ ლაპარაკს შეჰყვნენ და ჩაი არც ერთს არ დაუსხამს.
ბოლოს კობტა მაინც არ მოეშვა:
- კიდევ როდის შეხვდები სოფიოს?
- არასდროს! - ფიცხლად მიუგო ილიამ.
კობტა გვიან წავიდა.
იმ ღამეს ილიას არ დაუძინია. ახალ ნაწარმოებს, რო-

გორც თვითონ იტყოდა, შალაშინი გაჰკრა, გადაიწერა და ჩვენამდე ის ლექსი ასეთი სათაურით მოვიდა „ს...სას“.

ილიამ იმ კვირას ბევრი იკითხა გოეთე. ერთ ლექსში ასეთ სტრიქონს წააწყდა, გოეთე ამბობს: „მე ვმღერი, ვით მღერის ფრინველი“. არ მოეწონა და გულში კიდევაც გაეკამათა დიდ პოეტს. მერე ის ფიქრი ლექსად აკინძა:

„მისთვის არ ვმღერ, რომ ვიმღერო,
ვით ფრინველმა გარეგანმა;
არა მარტო ტკბილ ხმებისთვის
გამომგზავნა ქვეყნად ცამა“...

როცა „მგზავრის წერილებს“ წერდა, ილიას ისევ გოეთე წარმოუდგა თვალწინ. „მე, როგორც ქვეყნის შვილს, თერგის სახე უფრო მომწონს, უფრო მიყვარს. მყინვარი დიდ გოეთეს მაგონებს და თერგი კი მრისხანე და შეუპოვარ ბაირონსა. ნეტავი შენ, თერგო! იმით ხარ კარგი, რომ მოუსვენარი ხარ... მოძრაობა და მარტო მოძრაობა არის, ჩემო თერგო, ქვეყნის ღონისა და სიცოცხლის მომცემი“.

III

მაისი იწურებოდა. არდადეგები კარზე იყო მომდგარი. სტუდენტები განამანიაში იყვნენ. ვინ სად აპირებდა დასას-

ვენებლად წასვლას და ვინ სად. ილიას ჯერ არ ჰქონდა თავისი ბარგი-ბარხანა შეკრული. მან ძირითადი საგნები ჩააბარა, ნიშნებიც კარგი მიიღო, ეგონა ამით მოვრჩი პირველ კურსზე ჯახირსო. მაგრამ უნივერსიტეტში ხმა დაირხა, იურიდიულ ფაკულტეტს კიდეც რამდენიმე საგანში ექნება გამოცდაო.

- ბედი არ გინდა, ბოლჩა შეკრული მქონდა! - წუხდა კობტა.
- მაინც სად აპირებდი? - ჰკითხა ილიამ.
- შინ. განა შენ არ მიდიხარ?
- ჩვენი არდადეგები გზას უნდა. ეს არ იანგარიშე?
- ვიანგარიშე და კიდეც ორი კვირა გვრჩება.
- იქნებ ცხენი შეგხვდა ჯაგლაგი და ის ორი კვირაც გზაზე დაგტოვა, მაშინ?
- მაინც წავალ, ჩვენები მომენატრა! - არ თმობდა კობტა.
- შენი ნებაა, მაგრამ დამატებით გამოცდებს რას ეუბნები?
- მეც ეგ მაწუხებს. წამო, წავიხემსოთ, არა გშია?
- მშია, მაგრამ მამაცაშვილს ველოდები, დამპირდა, რომელ საგნებში იქნება დამატებითი გამოცდა გავიგებო.
- ვინ ეტყვის?
- სტასიულევიჩის იმედი აქვს.

დიდხანს ლოღინი არ დასჭირდათ.

მალე გაიღო კარი და კონსტანტინემ დაიძახა:

- მოდით!
 - გაიგე? - მოუთმენლად იკითხა ილიამ.
 - ბრძანება გამოაკრეს, წამოდით დასტკბით.
 - რაღა მესამე სართულზე გინდა აგვიყვანო, - მიუგო ილიამ, - გვითხარი და გაათავე.
 - პირველი, სახელმწიფოებრივი უფლება, - დაიწყო კონსტანტინემ, - მეორე, რუსეთის კანონმდებლობის ისტორია, მესამე კიდეც, ჩემო ილია, შენი საყვარელი საგანი - ღვთისმეტყველება, კიდეც, ზოოლოგია. როგორ მოგწონს?
 - სულ ეგ არის?
 - არა, კიდეც ფსიქოლოგია.
 - ძალიან გამახარე, ამას ერთი მალარიჩი უნდა! - გაეცინა ილიას. - კაცო, ეს ზოოლოგია რაღა აგვკიდეს?!
 - რას იზამ, კანონი კანონია! - თქვა კონსტანტინემ.
 - ეგრეა, ახლა ლაპარაკი კუჭს ვერ ამოგვივსებს, წავიდეთ!
 - არ მინდა საჭმელი, არაფერი არ მინდა!
- ილიამ ქუდი მოიშვლია და წავიდა.
- რა მოუვიდა? - გაუკვირდა კონსტანტინეს.
 - ამ საგნებში ინჩიბინჩი არ იცის.
 - როგორ არ იცის, ფსიქოლოგია?

- ფსიქოლოგიას არ გეუბნები, მაგრამ სახელმწიფოებრივი უფლება, რუსეთის კანონმდებლობის ისტორია პუშკინისა და გოეთეს ლექსები ხომ არ არის. დალოცვილი ჩაუჭდა და დაიწყო მათი გადმოქართულება. სწავლა?
- ეს რომ სოლომონ ჭავჭავაძემ გაიგოს, ორმოც მანეთს კი არა, ორმოც კაპიკსაც არ გამოუგზავნის.
- თუ კაცი ხარ, ეს ფული არ უხსენო ილიას, გაგიჟდება. იმ ბრწყინვალე სოლომონმა არ იცის ილიას ხასიათი. ფულს ისეთი ჭკუის დამრიგებლური ბარათი მოაყოლა, კაცს დაბადება აწყევლინა, თავში მუშტები ირტყა ილიამ, რატომ ვარ ასეთი უბედურიო. ბარათი და ფული უკან გაუგზავნა, არ გაბედო და ჩემკენ არ მოიხედო.
- მაინც რა მოსწერა ამ ბრძენმა სოლომონმა?!
- რევოლუცია არ გააკეთო, მეფის აუგი არ წამოგცდესო, თორემ კაპიკს არ გამოგიგზავნიო.
- ძალიან ფიცხია ილია, ახლა ელოდოს შინიდან როდის გამოუგზავნიან ფულს!
- ავკაცობა სოლომონს, თორემ ილია შიმშილით არ მოკვდება.

სიტყვა გაუგრძელდათ, მაგრამ ნელ-ნელა სიარულით მაინც დროზე შევიდნენ სტუდენტთა ღარიბულ სასადილოში.

იმ საღამოს კოხტას ილიასთან არ შეუვლია, თავის

ოთახში ჩაიკეტა და გვიანობამდე მეცადინეობდა. დილით ადრე წამოდგა და ამხანაგს მიაკითხა. მაისი იწურებოდა, საკმაოდ თბილოდა და ორივე ფანჯარა ღია დაუხვდა კობტას.

კობტას კარზე არ დაუკაკუნებია, ფანჯარაში შეიხედა. წიგნებით სავსე მაგიდაზე თავი ჩამოედო ილიას და ეძინა. დილის ნიავს მისი სქელი, შავი თმა ფათარივით გაეშალა.

კობტას დიასახლისი გამოეგება და ჩურჩულით უთხრა:

- თავს იკლავს, თავადო, ამდენი სწავლა შეიძლება? ნუხელის არ დაუძინია და ახლა ჩაეძინა. ეს ცხოვრებაა?

- ცხოვრებაა, სტუდენტური ცხოვრება! - გაიცინა კობტამ.
- ეძინოს, მერე შემოვივლი.

მთელი ორი კვირა განამანიაში იყო ილია.

წერდა, კითხულობდა, გასაზვიანებელს იზვიანებდა.

მაისის მინურულს ილიამ გამოცდები ჩააბარა.

პეტერბურგის უნივერსიტეტის „იურიდიული ფაკულტეტის 1857-58 აკადემიური წლის დამატებით გამოცდების შესახებ“ არქივში არსებულ უწყისს შემოუნახავს ილიას მიერ გამოცდებზე მიღებული ნიშნები: სახელმწიფოებრივი უფლება - 4, რუსეთის კანონმდებლობის ისტორია - 4, ღვთისმეტყველება - 5, ზოოლოგია - 3, ფსიქოლოგია - 5.

ილია მეორე კურსზე გადავიდა, უკვე თავისუფალია,

შეუძლია არხინად დაისვენოს, გულითა და სულით ყვარელშია, თავის ნათესავებთან, ტოლ-სწორებთან. მაგრამ რომ ვერ მიდის, მისი წუხილი და ტკივილი ეს არის.

ფიქრმა თითოეული გლეხის გულში ჩაახედა. რაც იმათ ალალ გულში ტკივილი და სიხარული, ჭირი და ვარამი ნახა, ის ლექსში წმინდა სანთელივით ჩამოქნა და თავის მადლიან ნახელავს „გუთნის დედა“ უწოდა.

ეს ლექსი მაშინვე გამოსაქვეყნებლად ვერ გაიმეტა. ხუთ წელიწადს არც გულის სითბო მოაკლო, არც კალმის გაკვრა-გამოკვრა და მერე „საქართველოს მოამბეში“ დაბეჭდა.

„გუთნის დედას“ მეორე ლექსი - „სიმღერა“ მოჰყვა, ისიც ურმულს ჰგავდა, ჩვენებურ ურმულს, თუმცა განსხვავებაც ბევრი იყო. მეურმე აღზევანზე ერთი მიზნით მიდის, მარილის მოსატანად. პეტერბურგში მყოფ ილიას კი ცოდნა უნდა მოეტანა სამშობლოში და იმ ბეჩავი მეურმის ბედზე უნდა ებრუნა. ამიტომ მოელოდა ხიფათს და მღეროდა:

სად მიგყევარ, მდინარევ
მონყენილ სიცოცხლისაგ!
ჩემს მცირეს ნავს რას არხევ,
ზვირთო წუთისოფლისაგ!
რას შემამთხვევ, ვინ იცის.

1859 წლის თებერვალი ყველაფერს თოშავდა, ილიას დაეზარა ფოსტაში წერილი წაღება, ისევ „ვახტანგის სამართალი“ აიღო და ფანჯარასთან მივიდა. გარეთ არ თოვდა, მაგრამ ყინვა მძვინვარებდა, ტიტველი არყის ხე ჭილყავავეს გაეცოცხლებინა, ზოგი ტოტიდან ტოტზე ხტებოდა, ზოგი მოფუყული იჯდა თავისთვის, ზოგიც კენწეროს დასტრიალებდა.

ილიამ ერთხანს უყურა ამ შეწუხებულ ფრინველებს, მერე წიგნიც დაკეცა და მაგიდას მიუჯდა. მაგიდაზე ენყო პოლიტიკური, ეკონომიური და ფილოსოფიური წიგნები. ილია გატაცებით ეწაფებოდა მეცნიერების ამ დარგებს.

დეკარტე, ბეკონი, „ოტეჩესტვენიე ზაპისკი“, დიკენსი, ჟორჟ სანდი, გოეთე, შექსპირი, ბევრი გაყვითლებული და გაცრეცილი წიგნი ენყო მაგიდაზე. „ოტეჩესტვენიე ზაპისკის“ ერთ-ერთი ნომერი გადაშლილი იყო და წერილი „მსოფლიოს მექანიკური თეორია“ ორ ადგილას ამოეხაზა ილიას, ხოლო ერთგან ფანქრით კითხვის ნიშანი დაესვა.

ახლა ეს ჟურნალი დაკეცა და თაროდან ჩამოიღო ყდაშემოცლილი „ათენის რესპუბლიკის ისტორია“.

როცა წერდა ან კითხულობდა, დაღლას ვერ გრძნობდა, შეეძლო მთელი დღე მაგიდასთან ჯდომა და თავაუღებლივ კითხვა, კითხვა ავიწყებდა ჭამას, სმას და ძილსაც კი, ასე იყო დღესაც, ათენის ისტორიას თვალი ვერ მოსწყვიტა. ათენელების ცხოვრებისა და ბრძოლის

ამბები შორეული მთებიდან ანკარა მდინარედ მოედინებოდა, ილია თავისი დაუცხრომელი წყურვილის მოსაკლავად ამ მდინარეს დაენათა.

მაგიდაზე ჩამოდგმული სადილი გაცივდა, დიასახლისმა ლამთა ანთო და „კნიაზს“ უსაყვედურა: სადილისათვის ხელი არ გიხლიათო.

- ჭამას მოვასწრებ!
- ვახშამს მიირთმევთ?
- თუ მაჭმევთ, რატომაც არა.

კალჩინა სამზარეულოში გავიდა და მოხრაკული ღორის ხორციით სავსე თევში შემოიტანა.

არც მეორე დღეს გამოსულა შინიდან, არც მესამე დღეს. მეოთხე დღეს პარასკევი იყო. თოვლს თოვლი დაემატა და შემოძარცვული არყის ხე თეთრად შეიმოსა. ყინვამ ძალა მოიკრიფა, მარხილებს დარი დაუდგათ. ციოდა, მაგრამ ილია ოთახში მაინც ვერ გაჩერდა, უნივერსიტეტში პროფესორ ნიკოლოზ კოსტომაროვის ლექცია იყო და შინ რა გააჩერებდა. ილიას უყვარდა ეს სწავლული და დღესაც ერთი საათით ადრე წავიდა, რომ აუდიტორიაში პირველ მერხზე მოხვედრილიყო. კათედრის წინ უყვარდა ჯდომა, პროფესორის არც ერთი სიტყვა რომ არ გამოჰარვოდა.

დილას ცოტა წაეძინა, ჩაის და საუზმის დრო არ დარჩა, სახელდახელოდ ჩაიკვა და უნივერსიტეტისაკენ გაექანა. იქ კოხტა დაუხვდა და ორივემ ერთად შეირბი-

ნეს მეთერთმეტე აუდიტორიაში, მაგრამ ილიას აჩემებული მერხი უკვე დაეკავებინათ. დარბაზში სტუდენტები ირეოდნენ, მეშვიდე რიგის კუთხეში, ფანჯარასთან, ძლივს მოკალათდნენ დანჯარეულ მერხზე. უნივერსიტეტის ეს ყველაზე დიდი აუდიტორიაც კი მოზღვავებულ სტუდენტებს ველარ იტევდა.

დაიწყო ლექცია. კათედრაზე მდგომ პროფესორს ილია კარგად ვერ ხედავდა. წინა მერხზე ვილაცა მაღალი სტუდენტი გამოჭვიმულიყო და მისი გამლილი მხარბეჭი უშლიდა. ილიამ ხერხს მიმართა, სკამზე წიგნები დააწყო და ზედ ჩამოჭდა.

- ეი, ჩამოდი! - ზურგზე უბიძგა ვილაცამ, მაგრამ ილიას ყურადღება არ მიუქცევია, პროფესორის მეტს ის ვერავის ხედავდა, მისი გული რუსეთის ისტორიის წყაროებს მიეპყრო.

კოსტომაროვი მოხუცი იყო. მჭკნარ, უფერულ სახეს თეთრი წვერი უბურავდა, სიარულიც აუჩქარებელი იცოდა, აუდიტორიაში ძლივძლივობით შემოდიოდა, მაგრამ უცებ იცვლებოდა, თითქოს ასობით სტუდენტის თვალები - მისკენ მიპყრობილნი, ახალგაზრდულ სიმხნევეს მიასხივებდნენ, მისი სიძაბუნე იქვე, კართან რჩებოდა, კათედრაზე უკვე ჭაბუკი და რიხიანი აღიოდა. „დიდი ენერგიით კითხულობდა თავის საგანს, ხმამაღლა, გარკვევით. თითოეულ სიტყვას კვერს ჰკრავდა ხოლმე და ექვსასი თუ შვიდასი მისი მოწაფე ისე გულმოდგინებით

უგდებდა მას ყურს, რომ ბუზის ფრენასაც კი შეიტყობდა იმ სიჩუმეში“, - შენიშნავს ნიკო ნიკოლაძე.

ლექცია დამთავრდა, კოსტომაროვმა სტუდენტებს თავი დაუკრა და აუდიტორიიდან გავიდა. განახული სტუდენტები ისევ აზრიალდნენ.

ილიამ კობტას შეახსენა:

- გახსოვს, რომ მითხარი, კაცი ჩაცმააო?
- მახსოვს, მერე რა?
- პროფესორს, ხედავ, რა გახუნებული და მოფლაშული სერთუკი ეცვა.
- იმას ტანისამოსზე ვინ უყურებს, აი აქ უყურებენ, - კობტამ შუბლზე მიიღო ხელი.
- მაშ, კაცი ტანისამოსი არ ყოფილა!
- რას ჩააცვივდი ამ ტანისამოსს?! - გაუბრაზდა კობტა, მაგრამ ისევ მალე მოლბა და ორივენი „კუხმისტერსკში“ შევიდნენ სასადილოდ.

ერთი თვის შემდეგ ილია თავის არეულ-დარეულ მაგიდას რომ ალაგებდა, ქალაქებში დისადმი გასაგზავნ ბარათს წააწყდა. ენცინა, როგორ გადამავინცდა გაგზავნაო. გადაათვალიერა, ისევ „კუტრობაზე“ წერდა.

შემდეგ წერილს ჩაჰყვა და იმ ადგილს მიაღწა, სადაც ქალურ ქამარ-ხანჯალს სთხოვდა, მოინდომა ამოშლა, მაგრამ გულმა შეაჩერა და ფანქარი ისევ მაგიდაზე დააგდო... გუშინ სოფიომ გული ატკინა - პაემანზე არ მო-

ვიდა. მთელი სამი საათი ბიბლიოთეკის წინ წრიალებდა ილია, გაბრაზებული და გაავებული დაბრუნდა.

დილით იმ ბარათს მიაწერა: „ნინუცი! მეგონა ეს წიგნი გამოგიგზავნე შენ და ახლა ვიპოვე ქალაქებში, აქ დამრჩენია თურმე“.

უნივერსიტეტში წასვლის დრომაც მოაღწია, პალტო ჩაიცვა ქუდი დაიხურა და თბილი ოთახიდან გავიდა. ციოდა, ფეხს აუჩქარა, ფოსტაში შეირბინა, წერილი გაგზავნა და მერე უნივერსიტეტისაკენ გასწია.

IV

ილიამ ცოტა მოიხედა, მაგრამ ლოგინს ვერ შორდებდა, მუხლებში ძალა არ მოსდევს, ჩამოდნა, ჩავარდნილ ლოყებს შავი, გაბურძგვნილი წვერი უფარავს, ფართო შუბლი უხურს, სიცხისაგან პირი უშრება. ექიმი დღესაც ეწვია, სიცხე გაუზომა, წვეთები გამოუწერა და თან გაათვრთხილა:

- მარტო წამალი ვერ გიშველის, შენც უნდა იყოჩალო, ადექი, გაიარ-გამოიარე, საღამოსაც გამოგივლი, ლოგინში არ გნახო, იცოდე!

ექიმი რომ წავიდა, ილია წამოდგა, თბილად ჩაიცვა, მაგიდას მიუჯდა. მაგიდაზე, წამლების გარდა, ტკბილ-ლეულაც ბლომად ელაგა. მეგობრებმა იცოდნენ, რომ ილიას შაქარყინული უყვარდა და ცოტაცოტა ყველას

მოეტანა, თეფშებზე წითელი და თეთრი შაქარყინული ბრწყინავდა.

„ეხ, ნეტავი თემო მოვიდოდეს, პირს ჩაიტკბარუნებდა“. ილიამ ამასწინათ თავის დას კარდანახში ბარათი მისწერა, თემურის ამბავიც შეატყობინა: „თემური ძალიან კარგად არის, გაიხარე, ნინუცი, კარგი ჭკვიანი ძმა გყავს, ღმერთმა აცოცხლოს, მარტო ერთი არ მომწონს თემურში, ძალიან ფიქრიანია“.

თემური ძვირად იცინოდა, სახე მუდამ მოღუშული და ბურუსიანი ჰქონდა. „ნეტავი რა ჯავრი ბრუნავს თემურის გულში“, - ფიქრობდა ახლა ილია. არც კითხვის თავი ჰქონდა, და არც წერის. ფიქრი არ ასვენებდა, თავისთავად მოდიოდა, ფიქრს არც ღონე უნდა, არც დრო.

ვილასამ კარზე დააკაკუნა.

- შემობრძანდით!

შემოვიდა თემური. უფროსი ძმა ფეხზე რომ დაუხვდა, გაუხარდა, ჯარისკაცული ნაბიჯით მიუახლოვდა და ხელი გაუწოდა.

- მთლად „საღდათს“ ნუ დაემსგავსე, ბიჭო, - შეაგება ილიამ და გულში ჩაიკრა.
- ექიმმა ადგომის ნება მოგცა?
- მომცა!
- მე მაინც მეშინია, არ შევაქციოს.

- არა მგონია... მოდი, პირი ჩავიტკუბარუნოთ, დაჯექი. ილიამ თემური გვერდით მოისვა, წითელი შაქარყინულით სავსე თევზში წინ დაუდო.
- ექიმმა მირჩია, სამშობლოში წადიო, - დაინყო ილიამ, - მეც ვიცი, ყვარლის ჰაერი მარგებს, უნდა წავიდე.
- როდის აპირებ?
- როცა შევძლებ, ჯერ ონსილა არა მაქვს, ძლივს დავხანხალე.
- ნეტავი მეც მოვდიოდე!
- წამოდი.
- ვინ გამიშვებს. ყოველ წუთს რას, დვა! რას, დვა! მომბებრდა, შემზიზიდა ყველაფერი.
- აა, ეს არ გამაგონო, შენ ჭკვიანი ბიჭი ხარ, ცოტა ხანს გაიჭირვე, ისწავლე და მერე...
თემურს პირში შაქარყინულის ნაჭერი ედო და სანამ არ შეახრამუნა, ხმა ვერ ამოიღო.
- მე ოფიცრობით აშენებული და გამდიდრებული კაცი არ მინახავს.
- მაშ შენ, მომავლისა არა გწამს?!
კაკუნი გაისმა და კარიც გაიღო...
სოფიო ჩაიკოვსკაია თამამად შემოვიდა, მისი კაბის შრიალმა თითქოს სიო შემოიტანაო.
თემურმა უცებ ილიას შეხედა, გაიღიმა და თავი ჩაღუნა. ეს ჩუმი, ბავშვური გულწრფელობით სავსე ღიმილი სტუმარმა მაშინვე შენიშნა, წარბი ასწია და ილიას

თვალი ჩაუკრა.

- ავადმყოფო, როგორ გიკითხო?
- მძველა, მგონი აღარ მოვკვდები! - მიუგო ილიამ და სკამი შესთავაზა.

სოფიომ ბადესავით ნაქსოვი, შავი ხელთათმანი, რომელიც იდაყვამდე სწვდებოდა, წაიძრო, ხელჩანთაში ჩააგდო. ცოტა ხნის შემდეგ ისევ გახსნა ხელჩანთა, ფრანგული კამფეტები ამოიღო და მაგიდაზე დაყარა. ერთი თილა თემურს მიაწოდა.

- პატიჟის თავი არა მაქვს, გენაცვალე, ჯარისკაცივით მითხარი: - არის, შევჭამო, და მიირთვი.

თემურს გაეცინა და გამოართვა.

- ბოდიში, კანფეტი და ქართველი რაღაც ვერ ეწყობა,
 - ღიმილით გადაუჩურჩულა სოფიომ ილიას, - კონიაკისა და შამპანურის დალევვა ჯერ არ შეიძლება, რას იზამ!

- ნუ სწუხხართ, კანფეტი კი არა, შხამიც რომ მოგეტანათ, იმაზედაც მადლობას გეტყოდით.

- ენა მწარე გაქვს, ილია გრიგორიჩი, გული კი კეთილი და ტკბილი.

- ვითომ?

თემური წამოდგა.

- მე წავალ! - მორიდლებით თქვა მან.

- იყავი, რა გეჩქარება?

- მაშინ მეც წავალ! - სკამზე ნაზად შეირხა სოფიო.
- თქვენ ბრძანდებოდეთ, მე ათასი უფროსი მყავს, ცოტა ხნით ძლივს გამომიშვებს!
- უფროსებისა ნუ გეშინია, მამას ვეტყვი და უბატონოდ ხმას ვერავინ გაგცემს. ცოტა შეიცადე.
- ასე აჯობებს, დარჩი, - სთხოვა ილიამაც. თემური დაჯდა.

თემურმა მაგიდიდან „ცისკრის“ ახალი ნომერი აიღო და გადათურცლა. „ცისკრის“ იმ ნომერში შილერის ლექსი „ცრემლთა შინა ნუგეში“ იყო დაბეჭდილი. როცა ამ ლექსს ილია თარგმნიდა, მაშინ თემური მასთან იყო სტუმრად და ახლა დაბეჭდილი რომ ნახა, გაეხარდა. გუშინწინაც ლოგინში მწოლიარე ილიას გოეთეს ლექსი ხმამაღლა, გამოთქმით წაუკითხა. ავადმყოფი ძმა ამით ასიამოვნა და ესეც ბევრ რამედ უღირდა პატარა „თემურიკოს“.

სოფიო ახლა უფრო ლამაზი ეჩვენა ილიას. თმა მოდაზე დაეყენებინა, კეფაზე წვრილ-წვრილი ხვეულები ტალღა-ტალღად ეყარა, ხოლო ლამაზ, პატარა ყურებზე დაშვებული კულულები ოდნავ ერხეოდა. სოფიო სკამზე რომ დაჯდა, მოსასხამი მხრებზე გადაიგდო და გამოაჩინა ვიწრო წელზე შემოჭერილი ვერცხლის ქამარი, მორკალული პატარა ხანჯლით. ეგონა ამით ავადმყოფს ასიამოვნებდა, ილიამ თვალი შეავლო ამ სამკაულს, ცი-

ვად გაელიმა და მერე ქალიშვილს შეხედა. სოფიო ღელავდა, მკრთალი სახე წამოსწითლებოდა, ვარდისფერი ცხვირსახოციტ ნიკაპზე ოფლს ნაზად ინმენდდა.

- თქვენები როგორ არიან? - გვიან შეაპარა ილიამ.
- გმადლობთ, არ ვიცი, ღედას როგორ შეურიგდებით, გაჯავრებულია, ჩვენი ოჯახიდან თეხი რომ აიკვეთეთ.
- იქნებ მე უფრო მეტად ვარ გაჯავრებული? - კითხვა შეუბრუნა ილიამ.
- ამაზე ახლა ნულარ ვილაპარაკებთ, გთხოვთ! - მიუგო სოფიომ და თითქოს ახლა გაახსენდაო, წამოდგა, მოსასხამი ხელებით გასწი-გამოსწია და წელი შეარხია.
- მეუბნებიან გხატავსო, მართალია?
- თქვენ ისე ხართ დახატული, რომ ქართული ქამარ-ხანჯალი სილამაზეს ვეღარ შეგმატებთ! - ილია თემურს მიუბრუნდა: - რას იტყვი, ძმაო, ქამარ-ხანჯალი ალამაზებს სოფიოს, თუ სოფიო ალამაზებს ქამარ-ხანჯალს?
- რა ვიცი! - მორცხვად მიუგო თემურმა.
სოფიოს სახეზე უცებ სინითლებმ გადაუარა.
აივანზე თეხის ხმა გაისმა და ის იყო კარიც გაიღო. კობტა აფხაზი თამამად მოდიოდა, მაგრამ სოფიო რომ დაინახა, კარებშივე შეჩერდა და ბოდიში მოიხადა.
- არა უშავს, არა უშავს, მობრძანდით! - შეაგება სოფიომ.

ცოტა ხნის შემდეგ სოფიო და თემური წავიდნენ, ილიამ ისინი სადარბაზომდე მიაცილა, იქ ძმას ქალაქში შესვვეული შაქარყინული ჯიბეში ჩუმად ჩაუდო და გაისტუმრა, ჩქარა შემობრუნდა, ნისლი იყო და გაციებისა ეშინოდა.

- რა ამბავია ეს კანფეტები, ღვინო არა გაქვს? - ჰკითხა კობტამ.
- არა!
- მთლად ფრანცუზი გახდი. ჯანზე როგორა ხარ?
- რა მიშავს.
- ჩაიკოვსკაიას მალამომ გარგო?
- ოხ ძალიან, - გაიცინა ილიამ.

ილიას ავადმყოფობამ შეაძრწუნა პეტერბურგის ქართველობა. ექიმებმა და წამლებმა მომძლავრებულ სატკივარს ვერაფერი უშველეს. მეტი გზა არ იყო, კობტა აფხაზი ეახლა სამეგრელოს დედოფალს და დახმარება სთხოვა.

მეორე დღეს ცარსკოე სელოდან ექიმი ნიკოლოზ არენდი მოვიდა, გულდაგულ გასინჯა ილია, წამლები არ გამოუწერია, ჩემთან გადაგიყვან და იქ გიმკურნალებო.

კობტა ცას ეწია, იმპერატორის პირადი კანვლის ექიმს, ნიკოლოზ არენდს, კარგი სახელი ჰქონდა.

ზაფხულში იმპერატორი ალექსანდრე მეორე ცარსკოე სელოში იმყოფებოდა თავისი კანვლით. მეფის დაცვის

უფროსი პეტრე რომანოზის ძე ბაგრატიონი იყო, ნიკოლოზ ბარათაშვილის თანაკლასელი, ცნობილი ფიზიკოსი და ქიმიკოსი, სწორედ ამ ბაგრატიონს სთხოვა ეკატერინემ ილიასადმი ყურადღება.

ილია დაუყონებლივ გადაიყვანეს ცარსკოე სელოში, ბაგრატიონის კომფორტაბელურ ვილაში. ექიმი არენდი სიტყვის კაცი გამოდგა: მან რომ გაიგო, მისი ავადმყოფი პოეტი იყო, უფრო დაინტერესდა. არენდს უყვარდა პოეზია და პოეტები. დუელში სასიკვდილოდ დაჭრილ პუშკინს პირველმა შეუხვია იარა, წამლებიც მან დააღწევინა.

დასტაქრის ის ხელსაწყოები კი, რომელთაც პუშკინის სამკურნალოდ ხმარობდა, სამუდამოდ ჩაკეტა ყუთში და ხელი აღარ უხლია.

ამ საბედისწერო ამბის შემდეგ ოცდაორმა წელმა გაიარა, ბევრი რამ დავინწყებას მიეცა, ბევრს ისტორიის მტვერი დაედო, მაგრამ არენდის მგრძნობიარე გულში ისევ ცოცხლობდა პუშკინი, ცოცხლობდა მისი ხსოვნა.

ეს ხსოვნა და სიყვარული ექიმმა თავის შთამომავლობას გადასცა. ერთი საუკუნის შემდეგ მისმა შვილიშვილმა მოსკოვში, პუშკინის მუზეუმში მიიტანა ის ყუთი.

ამ დილით კოხტა აფხაზი და ლევან მაღალაშვილი მივიდნენ ილიას ამბის გასაგებად, არენდიმ სტუდენტები

გულთბილად მიიღო, თან შიშის ვერ დამალა.

- წუხელ სისხლი აღებინა, - ჩურჩულით უთხრა მათ.
- მამ ცუდად ყოფილა! - შეიცხადა კობტამ.
- პოეტს არავითარ სატკივარს არ მოვაკვლევივინებ, პოეტი მხოლოდ დამბაჩას უფროთხილდეს.

სტუდენტებმა ვერაფერი ვერ გაიგეს ამ გადაკრული სიტყვებისა.

- რა ბრძანეთ?! - ჩაეკითხა მაღალაშვილი.
- სიმართლე, ალექსანდრ სერგეევიჩი ბევრჯერ იყო ავად, მაგრამ ყოველთვის ვკურნავდი ხოლმე, დამბაჩის პატარა ტყვიამ კი გაათავა კაცი!

ილია ამ დროს ბევრს კითხულობდა და ბევრსაც თარგმნიდა, უნდოდა ქართველი მკითხველისათვის ხელმისაწვდომი ყოფილიყო პუშკინი, ლერმონტოვი, გოეთე, შილერი... ილიას თარგმანები მოსწონდათ მის მეგობრებს, ხელნაწერები ხელიდან ხელში გადადიოდა.

ახლა ექიმის ნათქვამი მიზანს მოხვდა, რაკი ექიმმა პუშკინი ახსენა, კობტა ილიასაკენ გადაიხარა და ჩუმად უთხრა:

- მოდი, თქვი „ჭეშმარიტება“, გაუხარდება, - და მერე ექიმს მიმართა: - ილია ახლა წაიკითხავს პუშკინის „ჭეშმარიტების“ ქართულ თარგმანს.
- სიამონებით მოვისმენ, ბრძანეთ!

მისუსტებული ილია ლოგინში წამოჯდა და დაინყო. არენდი განაბული უსმენდა. ილიამ კითხვა რომ დაამთავ-

რა, ექიმმა ჯიბეში ჩაიყო ხელი, იქიდან გაცრეცილი ქალაღლი ამოიღო და კოხტას მიანოდა.

- ახლა ეს წაიკითხეთ!

კოხტამ ქალაღლი გამოართვა, გაშალა. ლერმონტოვის ლექსი იყო, პუშკინის მკვლელელები რომ ამხილა.

- ზეპირად ვიცი! - თქვა კოხტამ და დაიწყო. იცოდა, ექიმზე უფრო ილიას გაეხარდებოდა ამ ლექსის მოსმენა.

ილია გაერთო და წამოდგომა დააპირა, მაგრამ ექიმმა შეაჩერა.

- ერთ კვირას მაინც გასძელით ლოგინში. მერე, სიცხემ თუ დაიკლო, შევიძლიათ ოთახში გაიარ-გამოიაროთ.

დაუჯერა ილიამ. კოხტას კი სთხოვა, ჩვენებს არ მისწერო ავად რომ ვარ, შორიდან ვერაფერს მიშველიან და თავად ცუდ დღეში ჩავარდებიანო.

არც თემურს შეატყობინეს კადეტთა კორპუსში.

ილიას ყურადღება და მოვლა არ აკლდა. ამხანაგები თავს ევლებოდნენ. ეკატერინეს პირადი მღვდელი თედორე ხომტარია ხშირად აკითხავდა, ნუგბარი საჭმელ-სასმელი მოჰქონდა.

ილია ავადმყოფობას არ ეპუება, როცა მნახველები გაიკრიფებიან, მარტობაში მაშინვე „აჩრდილის“ ხელნაწერს გადაშლის, წერასა და ფიქრში თავს უკეთ გრძნობს, ხშირად წამლების დაღვევაც კი ავიწყდება.

გუშინ ივანე პოლტორაცკი ესტუმრა. ხელკასრით საფერავი მოუტანა, ცოტა დალიეს. ბევრი ილაპარაკეს თბილისზე, გიმნაზიაში ერთად გატარებულ დღეებზე. გახარებულმა ივანემ ოთახში გაიარ-გამოიარა, კუთხეში მიყრილ-მოყრილმა ქალაღლებმა მიიპყრო მისი ყურადღება. აიღო, გვერდების მიხედვით დააწყო და მერე ჰკითხა:

- ილიკო, ეს რა გრძელი ლექსი დაგინერია.
- შევამოკლებ, არა უშავს.
- სათაური?
- ხომ აწერია.
- რა ვიცის, უშნოდ მიგიხაზ-მოგიხაზავს, ვერ ამოვიკითხე.
- „აჩრდილი“.
- ეს ის არის, რომ მეუბნებოდი, თავისუფლების სიმღერა უნდა დაწერო?
- სიმღერა კი არა, მოწოდება! - გაუსწორა ილიამ და მერე სუფთად გადანერილი თავები წაუკითხა, მაგრამ ოცდამეათე თავი რომ ჩაათავა, ივანე შეაჩერა.
- კარგად ვერ გავიგე, აბა ისევ წაკითხე.
- რა არის აქ გაუგებარი? - ილია შეიშმუშნა და განავრძო:

„ნუთუ ეს ხალხი, რომელთ დაჰბადეს
დავით, დიმიტრი, დიდი თამარი,
რუსთველი და მის ძლიერი ქნარი,
ნუთუ ეს ხალხი, აღარა აღსდგეს?“

- კარგად არის ნათქვამი, მაგრამ ცენზორი დაგიბეჭდავს?
- მაშ, ცენზორის შიშით, გულში რაცა მაქვს, არა ვთქვა?!
- თქვი, რას მიქვია შიში. ახლა განაგრძე, ხვალ გადავწერ და საქართველოში გავგზავნი!
ილიამ კითხვა დაამთავრა, შუბლზე ოფლი მოინშინდა და ივანეს უთხრა:
- შექებას ვერ მოვისმენ, აი ნაკლი და ხინჯი თუ შენიშნე, ის მითხარი.
- ხალხს, ჩვენ უნდა ვუჩვენოთ ბრძოლის გზა და კვალი. ამიტომ სწავლობთ აქ! - დინჯად თქვა ივანემ.
ილიას ეს სიტყვები მოეწონა. ივანე რომ წავიდა, ხელნაწერს, სადაც სათაური ძლივს ჩანდა, დაანერა: „ვეძღვნი ივ. პოლტორაკის“.
შემდეგ ისევ ჩაჰყვა ქვემოთ, იკითხა, ბევრი სიტყვა და გამოთქმა ჭკუაში არ დაუჭდა, წაშალა. სხვა უკეთესი რომ ვერ მოიგონა, ისევ ხაზგასმული აღადგინა. მეცხრე თავის დასაწყისში „მარად და ყველგან შენთან ვიყავ, ტკბილო ქვეყანა! დასაბამითვე შენი დამყვა მე სიყვარული“ წაშალა და ბევრი ფიქრის შემდეგ იქვე, გვერდზე მიანერა: „მარად და ყველგან, საქართველოვ, მე ვარ შენთანა!... მე ვარო შენი თანამდევნი უკვდავი სული“.
- აჰა, ესეც ასე! - ჩაილაპარაკა, მერე ხმამაღლა წაიკითხა ახლად დაბადებული სტრიქონები და გაიღიმა.

ასე თავაუღებლივ იმუშავა „აჩრდილზე“ თითქმის მთელი წელიწადი. მერე ჯანლონის მოსაკრეფად თბილისში რომ ჩამოვიდა, ჟურნალ „ცისკარში“ მიიტანა და ივანე კერესელიძეს სთხოვა დამიბეჭდევო.

ივანე გულითა და სულით პოეტური კაცი იყო, ლექსებსაც სწერდა, მართალია არ მოსწონდათ მისი ლექსები, მაგრამ მაინც აქვეყნებდა. ილიას ის იცნობდა, როგორც ახალგაზრდა, ნიჭიერ პოეტს, პირველი თარგმნილი ლექსი „ჩიტი“ მან დაუბეჭდა და კიდევაც შეაქო, შემდეგ სხვა ლექსებიც გამოუქვეყნა. ახლა ვერ მოითმინა და პოემა იქვე, ავტორის თანდასწრებით წაიკითხა.

- კარგია, დიდებული ამრებია, ბრძოლა ბატონყმობის წინააღმდეგ, ბრძოლა თავისუფლებისათვის, მაგრამ ამდენ ბრძოლას ცენზორი აიტანს?

- უნდა როგორმე დაიყოლიო! - სთხოვა ილიამ.
- ხელს არ დავაკლებ, თუ რამე გამოვიდა. დიდი ხნითა ხარ ჩამოსული?
- ცოტას მოვიკეთებ და ისევ გავბრუნდები.
- ოქტომბრის ნომერში რომ იყოს?!
- დიდი მადლობელი ვიქნები.

ილია დაემშვიდობა და წავიდა.

კერესელიძის შიში გამართლდა. ცენზურაში პოემა მიშალ-მოშალეს და მოლოდ მეხუთე თავის გამოქვეყნების ნება მისცეს.

რა ექნა კერესელიძეს, დაპირებულ ნომერში ის ნაწყვეტი მაინც მოათავსა. პოემის ეს ნაწილი აკაკიმ წაიკითხა, მოეწონა და ლექსიც კი უძღვნა. აკაკის ეს ლექსი - „ამაო ძებნა“ - რამდენიმე ხნის შემდეგ „ცისკარში“ დაიბეჭდა.

ეს იყო აკაკისა და ილიას პირველი პოეტური შეხვედრა.

ილიამ, რაკი „აჩრდილი“ ჟურნალში მთლიანად ვერ დაბეჭდა, მოინდომა მისი ცალკე წიგნად გამოცემა, მაგრამ აქაც ცენზორი წარმოუდგა თვალწინ. ამიტომ ხერხს მიმართა. მკაცრი ცენზორის თვალის ასახვევად ლერმონტოვის „ჰაჯი-აბრეკის“ თარგმანი დაურთო თავის პოემას და ისე მოითხოვა მისი გამოქვეყნება. თვითონ ამ დროს პეტერბურგში იყო. ამ საქმის მოგვარება თავის განუყრელ მეგობარს ილია წინამძღვრიშვილს მიანდო. ძალიან ღელავდა, ყოველდღე მოელოდა თბილისიდან წინამძღვრიშვილის ბარათს. პასუხმა რომ დაიგვიანა, თვითონ მიმართა მეგობარს:

„ერთი წიგნი მომწერე ჩემი აჩრდილი და ჰაჯი-აბრეკი რა ყოფაში არიან“.

წინამძღვრიშვილი ბევრს ეცადა, მაგრამ ამაოდ. ცენზორმა ხელნაწერი ჩამოართვა და უჯრაში ჩაკეტა. გამწარდა წინამძღვრიშვილი, ვინ არ მიუგზავნა, მაგრამ საცენზურო კომიტეტის ვერც ერთ მოხელესთან ვერაფე-

რი გააწყო.

ეს სამწუხარო ამბავი მეგობარს ვერ გაუმხლა, ავადმყოფმა ძლივს მოიხედა და ახლა ეს რომ შევატყობინო, იდარდებსო.

V

1859 წელი. ზაფხული. ილია ჭავჭავაძე პეტერბურგიდან თბილისს ჩამოვიდა, სტუდენტის ფორმა ეცვა, წვერი მოშვებული ჰქონდა, შავი წვერი ვერ ფარავდა ჩრდილოეთის მკაცრი ჰავისაგან ჩამქრალ სახეს.

ცოტა ადრე ილია პეტერბურგიდან თავის დას ნინოს კარდანახში სწერდა: ეს რა ქვეყანაში მოვხვდი, სამი თვეა მზე არ მინახავსო. უმზეობამ, ბურუსმა და ნესტმა ილიას ჯანმრთელობაზე იმოქმედა, სისხლის ღებინება დაანწყებინა და გახურებული გამოცდების დროს ლოგინად ჩააგდო.

ივნისის დამდეგს უკეთესობა დაეტყო, ან არაფერი მიშავსო და ამხანაგები დაითხოვა, ღამე მარტო დარჩა ოთახში. ერთხანს გოეთე იკითხა, მერე ძილს მისცა თავი, მაგრამ ვერ დაიძინა, ფიქრი აეშალა. წინა დღით მეგობრებმა უთხრეს, საქართველოში წადი და სულ მთლად მორჩებიო. ექიმმაც ეს ურჩია. ახლა ფიქრით და ოცნებით თბილისში იყო. მტერი, მოყვარე, ბრძოლა, თა-

ვისუფლება, ყველაფერი, ყველაფერი წარმოიდგინა, მერე კალამი აიღო და მოლურჯო ქაღალდს „ელეგია“ დააწერა. ერთ საათში დაიბადა ეს შესანიშნავი ლექსი, მაგრამ, ვინ იცის, რამდენი საათის ნაფიქრი და ნატანჯი იყო.

დილით უნივერსიტეტის სტუდენტთა ინსპექტორს ფიცდებ ფონ ეკსედეტს თხოვნა მიართვა: მთელი მაისის თვეში და განსაკუთრებით კი მის უკანასკნელ რიცხვებში, ვიმყოფებოდი რა ავად, მე არ მქონდა შესაძლებლობა გამოვცხადებულეყავი 28 მაისს სასოფლო მეურნეობის გამოცდაზე. გაუწყებთ რა აღნიშნულს და გირდგენთ რა საექიმო მონშობას, უმორჩლესად გთხოვთ მიიღოთ ეს გარემოება მხედველობაში როგორც საპატიო მიზეზი“.

ამ თხოვნას დაურთო ცარსკოე სელოს ექიმის მონშობაც. ექიმი ნიკოლაი არენდი 10 ივნისს წერდა: „ეძლევა ესე პეტერბურგის უნივერსიტეტის სტუდენტს თავად ილია ჭავჭავაძეს მასში, რომ 1859 წლის მთელი მაისის თვის განმავლობაში ვწამლობდი ავადმყოფს, რომელიც სისხლს იღებდა გულიდან და, თუმცა სენმა უკლო ახლა, წამლობამ არგო, მაინც საბოლოო გაჯანსაღებისათვის საჭიროა სამხრეთის ჰავა“.

ილიამ შვებულება აიღო და სამშობლოსკენ გამოეშურა.

თბილისმა გული უჩვენა, ნათესავეებსა და მეგობრებში მალე მოიკეთა. უქმად ვერ გაჩერდა, ამხანაგები გვერდ-

ში ამოიყენა და „მეფე ლირი“ ცოცხალი სურათებით წარმოუდგინეს საზოგადოებას.

„გიმნაზიის დარბაზში, - წერს პეტრე უმიკაშვილი, - სცენა მოეწყო, თბილისის წარჩინებული ოჯახების და თავადის ქალებმა მიიღეს მონაწილეობა ამ სურათებში, რომელიც კარვის ესთეტიკური გემოვნებით, ხელოვნებით და აზრიანად იყო შედგენილი.

თბილისის საზოგადოება ინტერესით მიანყდა და დიდის კმაყოფილებით დარჩა. ვინ იფიქრებდა, რომ ქართულის თეატრის განახლების მიზეზი უნდა გამხდარიყო ისევ ის დარბაზი, რომელშიაც პირველი ქართული წარმოდგენა ნახა საზოგადოებამ. ცოცხალი სურათებისათვის გაკეთებული სცენა კარგა ხანს ხელუხლებელი დარჩა გიმნაზიაში“.

ილიამ თვითონ შეასრულა ცოცხალ სურათში ლირის როლი. ხალხმა ძალიან მოუწონა და ტაშით დააჯილდოვა.

მამიდამ ილია თბილისში დიდხანს არ გააჩერა. თუ დასასვენებლად ხარ ჩამოსული აქ, შენს კარმიდამოში რიგიანად დაისვენეო.

ილიამ დაუჯერა თავის გამზრდელ მამიდას, ყვარელში ჩავიდა, მაგრამ იქ გულმა ვერ მოუთმინა და მესამე დღეს კარდანახში ნინოს სანახავად წავიდა. მამიდამ გზაზე მოსამსახურე ბიჭი გამოაყოლა. ბიჭი ართობდა ილიას, სოფლურ ლექსებსა და შაირებს ეუბნებოდა. ამ საუბარში

გზა ადვილად ილევოდა.

კარდანახის ტყეში ისინი ძახილმა შეაჩერა.

- ხელები მაღლა!

ბუჩქებიდან გადმოხტა თოფმომარჯვებული კაცი და ილიას ვინაობა გამოჰკითხა.

ილიამ უთხრა, ვინც იყო, გაუკვირდა თოფიანს.

- ბრწყინვალე თავადი ყოფილხარ, ბოლიში.

- ბრწყინვალეებისა რა მოგახსენო, - მიუგო ილიამ, - კარდანახში მივდივარ, გამიშვი.

- კარდანახში რა გინდა?

- სტუდენტია, თავის ნათესავ ნიკოლოზ აფხაზთან მიდის! - უთხრა ბიჭმა.

უცნობმა თოფი ძირს დაუშვა და ილიას თანმხლებს ჰკითხა:

- კარგი კაცია შენი ბატონი?

- ძალიან კარგი კაცია.

- ჭავჭავაძევ, ჩემთან პურის ჭამას იკადრებ?!

- კადრება რა მოსატანია, მაგრამ მაძლარი ვარ.

- მშიერი ბატონი ჯერ არ მინახავს, წამოდი, გზას დაგილოცავ.

უცნობმა თოფი მხარზე გადაიღო და წინ წაუძღვა სტრუმრებს. ბილიკი გაუკვალავი იყო, ნელა მიდიოდნენ. უზარმაზარ მუხებს გარს უვლიდნენ.

ქოხი მუხის ქვეშ იყო გამართული. შუა ცეცხლს შიგ ყველაფერი გამოემურა. უკანა კედელი ნაბდისა ჰქონდა.

უცნობმა სტუმრები ჯირკბე დასხა, თვითონ ნაბადი გადასწია და მეორე ოთახში გავიდა, მეორე ოთახი მუხის ფულუროს წარმოადგენდა, საჭმელ-სასმელი იქ ელაგა, ფულუროშიც კიბე ედგა. როცა ქოხში დასცხებოდა, ამ კიბით მუხაზე აღიოდა, იქ გაშლილ ტოტებზე მორები იყო გარდიგარდმო გადებული, ზედ ჩალა და თივა ეფინა და დასასვენებლადაც მყუდრო ადგილს წარმოადგენდა.

ილიამ ყველაფერი მიათვალა-მოათვალა, მიხვდა რომ ყაჩაღს გადაეყარა. არსენა ოძელაშვილზე ბევრს ფიქრობდა, ხალხურ ლექსებსაც აგროვებდა არსენაზე.

არსენა ჩვენი, ის მხნე არსენა,
ჩვენამდინ, ძმაო, ზღაპრად მოსული,
ის იყო ჩემი ჯავრი და ლხენა,
ის იყო ჩემი გული და სული.

ილიას დიდხანს არ ასვენებდა ბატონყმური ცხოვრების ამსახველი ნაწარმოების შექმნის სურვილი. შავად, პროზაული სახით, კიდევაც მოხაზა - კაკო, ზაქრო და გაბრო, არსენაც თვალწინ უდგას, მაგრამ ყაჩაღს სული და გული ვერ უპოვნა... ახლა კი მასპინძელს თვალს არ აშორებდა, ნუთუ ასეთი იყო არსენა?! არსენა, რომელსაც „გლახკაცის ბედი, ჭირი და ლხინი ძმასავით კალთით უტარებია“.

ილია ჩაფიქრდა.

მოსამსახურე ბიჭი კი თოფს მიშტერებოდა, რომელიც იქვე კედელზე ეკიდა.

მასპინძელი სუფრას შლიდა. მოხარული ხორცი, გუდის ყველი, თონის პური ტაბაკაზე დაალაგა.

- აბა მიირთვით, სტუმარო, - მიმართა ილიას ყაჩაღმა, - მოიცათ, თქვენ ხელის დაბანასა ხართ ჩვეული! - სურით წყალი მოიტანა, მაგრამ ილიამ ხელი არ დაიბანა.
- მიირთვით, რა ვქნა, ღარიბი ვარ, ოჯახში უკეთესად გავიმასპინძლდებოდით.
- ოჯახი არა გაქვთ?
- მქონდა, დამინგრიეს.
- ვინ?
- ბატონმა, ბატონო... მაგრამ ამაზე ნუ მალაპარაკებთ, პურიჭამა ჩაგვმწარდება.
- რა გვარი ხართ, ეს მაინც მითხარით! - სთხოვა ილიამ.
- გვარად გაუხარაშვილი, სახელად ყაჩაღი შემარქვეს.
- გამიგონია, ვიცო! - ვერ მოითმინა ბიჭმა.

ყაჩაღმა პატარა ყანწი შეავსო და დაილოცა:

- ქვეყანაში კაიკაცსა და სიმართლეს გაუმარჯოს!

ყანწს ყანწი მოჰყვა. დალიეს, მოილხინეს. ილიამ გაუხარაშვილს გამოჰკითხა ვინაობა, გაიგო ყაჩაღად გაჭრის მიზეზი, მისი სიტყვები გულის ფიცარზე დაინერა. იქ, იმ ალალ სუფრაზე ეს სტრიქონები დაიბადა:

„მხეცი რამ იყო ბატონი ჩვენი,
ერთი აჯამი, გულქვა, რეგვენი,
იმას კაცებრი გული არ ჰქონდა,
რომ მამაჩემი შეებრალებოდა...
რა გავაგრძელო, თავადიშვილი
კარგი რა არის, ავი რა იყოს“.

ილია გვიან წამოდგა და წასვლა დააპირა.

- ბატონო, აქ მოგასვენებთ, თუ მიკადრებთ.
- ეგ რა თქვი, კაცო, რას მიქვია კადრება? რატომ არ უნდა გიკადრო, რა უკადრისი და უკარება მე მნახე?
- ილია ბატონო, კარდანახში გელოდებიან, უნდა წავიდეთ! - უთხრა მოსამსახურე ბიჭმა.
- ჰო, მართლა, ჩემი დაიკო მელოდება, დიდი ხანია არ მინახავს, წავიდეთ.

ილია გაუხარაშვილს გადაეხვია.

- მადლობელი ვარ, ავაშენა ღმერთმა!
- რა სამადლობელო პურმარილი მე მქონდა?!
- გული რომ მიჩვენე, ცხოვრება რომ მიჩვენე, ამისათვის მადლობა, დიდი მადლობა!

ყაჩაღმა სტუმრები შარავგამდე ჩამოაცილა და ისევ ტყეს მისცა თავი.

ილიას ღვინო ჯერ არ მორეოდა, ბიჭს ხელი გადახვია და თეხს აუჩქარა.

- ბიჭო, როგორი კმაყოფილი ხარ ყაჩაღის მასპინძლობით? - ჰკითხა ილიამ.
- შიშით აღარა ვარ, ნეტავ რა ეშმაკმა შეგვახვედრა.
- რატომ? - ილიამ უბის წიგნაკი ამოიღო, რაღაც ჩაიწერა და განაგრძო: - კარგი, ენაწყლიანი კაცი ყოფილა, საბრალომ კიდევაც წაუმღერა, არა?
- წაუმღერა, მაგრამ ტყეში მხეცივით დაძრწის, რა ამღერებს?
- თავისუფლება, თავისუფლება ამღერებს!
ილიამ ჯიბეში ჩაიწყო ხელეები და გზის ბალახიან ნაპირს გაჰყვა. რამდენიმე ნაბიჯის შემდეგ თვითონაც წაუმღერა.

საღამოს ილია თავის სიძის - ნიკოლოზ აფხაზის ჭიშკარს მიადგა.

ნინო ქმარ-შვილით ჭიშკრისკენ გამოექანა, მაგრამ ილიას მიკითხვა-მოკითხვის თავი აღარ ჰქონდა.

- დამაძინე, ნინუცი, დამაძინე! - სთხოვა მან ნინოს.
გაუშალეს ლოგინი და მაშინვე ჩაეძინა.
დილას კარგ გუნებაზე გამოეღვიძა. ლოგინზე წამოჯდა, შინაურები გვერდით მოისვა და გაუხარაშვილის ამბავი დაიწყო.
- რომ ვუთხარი შენთან მოვდიოდი, მაშინვე დაუშვა თოფი. იცნობ? - ჰკითხა მან ბოლოს სიძეს.
- როგორ არა, გაჭირვების ტალკვესს მეძახის.

- მომეჩონა შენი გაუხარაშვილი, რკინის კაცია! - დაასკვნა ილიამ.

მოსამსახურე ბიჭი კარებში იდგა, ენამ გაუსწრო:

- რა რკინის კაცია, ცრემლებსა ღვრიდა.
- გაჩუმდი, ბიჭო, - შეუწყრა ილია, - „რკინის კაცის თვალში ცრემლი დიდსულოვნების შვილია“.
- მართალსა ბრძანებთ! - განითლდა ბიჭი.

მალე კობტა აფხაზიც შემოვიდა, სტუდენტურად ჩაცმულ-დახურეული. ლოგინში ილიას დანახვა გაუკვირდა.

- სად შენა და სად შუადღემდე ძილი?! ისეთი რა გაჭამა გაუხარაშვილმა, რომ არა გშია?
- ჰო, ავდგები.

ნაადრევი შემოდგომა შევნოდა კახეთს. მზებზე გაფიცხებული მტევნებით გოდრები ივსებოდა, ქვევრებს ხახა დაელოთ, სოფელს მაჭრის სუნი ტკბილად მოსდებოდა. ნიკოლოზ აფხაზის სახლის აივანი და კედლები აკიდოებს დაეფარა. ილია გამოვიდა პირის დასაბანად, ყურძენმა თვალი მოსტაცა და ინატრა:

- კობტაჯან, ეს მტევნები პეტერბურგში მისცა ჩვენს ბიჭებს!
- ჩვენს ბიჭებს, თუ შენს სოფოს? - მიუგო კობტამ და მერე ნინოს გადაუჩურჩულა: - შენი გამოგზავნილი ქამარ-ხანჯალი ძალიან დაშვენდა ჩაიკოვსკაიას ქალს, მადლობა მაინც შემოგითვალა?!
- მე ილიკოს მადლობაც მეყოფა.

- რა ქალია, რომ იცოდე!
- კარგი, კობტა, გეყოფა! - გაეცინა ილიას.
შემოუსხდნენ სუფრას, ნინომ ინატრა თავისი პატარა ძმა და ილიას უთხრა: - კარგი იყო, თემური წამოგეყვანა, გაიხარებდა ბიჭი.
ძალიან მინდოდა, მაგრამ უარი უთხრეს, ვერაფერი გააწყო.
- ექსტრა, ექსტრა! - დაიძახა კობტამ და ოქროსფერი ღვინით სავესე ჭიქა ასწია.
შესვეს თემურის სადღეგრძელო.
ნასაუზმევს ილია და კობტა შესხდნენ ცხენებზე და თვალისათვის წყლის დასალევივინებლად ალაზნისაკენ წავიდნენ. კამკამა ალაზნში ბიჭები ყვინთავდნენ. იქვე რიყებზე ხბოები იზვნენ.
მუხის ქვეშ ჩამოქვეითდნენ, ცხენები ჩამოხრილ ტოტებზე მიაბეს.
წყალში მოდგაფუნე ბიჭებმა ილია ბანაობის ეშხზე მოიყვანეს.
- კობტა, მოდი, ვიბანაოთ.
- ტანისამოსის გახდა-ჩაცმა მეზარება... სჯობს ჩრდილში წამოვგორდეთ, პეტერბურგის მერე ალაზნის ჰაერი გვარგებს.
მწვანეზე წამოწვინენ. კობტას მალე ჩაეძინა. ილიას ფიქრი წაეტანა და მშობლიური მდინარისადმი მიძღვნილი ლექსის პირველი სტრიქონებიც იქვე დაიბა-

და.

მდინარევე, ჩემის მშობლიურ მთის ცრემლით შემდგარო!
ან შენს კიდებზე ვდგევარ, დაგცქერ მე, მეგობარო!
დაგცქერ ჭმუნვითა და შენს წყალში ვეძებ ჩემს წარსულს,
დროთა ბრუნვისგან შენ ზვირთთ შორის დამარხულს,
დანთქმულს.

ორიოდე თვით საქართველოში ჩამოსვლა ნაყოფიერი
გამოდგა: ნაავადმყოფარმა ჯანიც მოიკრიფა და
ლექსებიც დანერა.

როგორც თვითონ ილია ამბობდა, ყვარლის ჰაერმა
ძალიან არგო. ამასობაში კალოობა მოილია და რთველი
დაიწყო. ყურძნის კრეფამ დიდხანს გასტანა, სოფელში
მაჭრის სუნი დატრიალდა.

ილია საპეტერბურგო სამზადისს შეუდგა, მაკრინეს
თათარა ადრე მოადუღებინა, ასიოდე ჩურჩხელა
სახელდახელოდ ამოავლებინა და აივანზე გასახმობად
დაკიდა.

მთელი დღე ვენახში იყო, თავის თანატოლ ბიჭებს
აღარ შორდებოდა, ხან კრეფაში შველოდა, ხან ზურგზე
კალათის წამოკიდებისას ხელს აუკრავდა, ხანაც
პეტერბურგის ამბებს უყვებოდა, გამრთობიცი იყო და
დამხმარეც.

თვითონ ჯანს იკაჟებდა, ალაზნის ჰაერი და ჩათათლუ-

ლი ყურძენი მალამოსავით რგებდა.

იმ დღით კობტამ ვენახში ცხენი მიაგდო და კაკლის ჩრდილში წამოწოლილ მეგობარს ზედ თავზე წამოადგა.

- ვახ, როგორ დაუნვიხარ მზეს, პეტერბურგში ველარ გიცნობენ!

ილია წამოდგა, კობტაც ჩამოქვეითდა, ცხენი მიუშვა და ბალახზე წამოჭდა.

- პეტერბურგიდან ჩამოსულს კაცის ფერი არ გედო, ახლა ნამდვილ გლეხს დამსგავსებხარ, შავი, ჯმუხა, მეშინია, ჩაიკოვსკაიამ მთლად არ დაგინუნოს.

- დამინუნა და ეგ არის.

- არაფერიც. აი, წერილი.

- წერილი? მიჩვენე!

გაუკვირდა ილიას და სანამ კობტა წერილს მიაწვდიდა, ვერ მოითმინა, ხელი გაუნოდა.

- რად უნდა გაჩვენო, წერილს მე მიგზავნის.

- რა მინდაო?

- ილიას ჯანმრთელობას გაუფრთხილდი და მოუარეო, - კობტამ წერილი ამოიღო, - აჰა, წაიკითხე.

- რაღა წავიკითხო, თუ რაცა თქვი იმის მეტი არაფერი წერია? - მიუგო ილიამ, მაგრამ წერილი მაინც გამოართვა, საჩქაროდ გაშალა, ჩაიკითხა და სახეზე ტკბილმა ღიმილმა გადაურბინა.

- კარგი გულის ადამიანია! - ჩაურთო კობტამ.

- ცივი გულის ადამიანია! - გაუსწორა ილიამ. - თორემ მე უარს მეტყოდა?
 - ნუ სცოდავ, უარი როდის გითხრა?
 - როცა საქმე საქმეზე მიდგა. სიკვდილს მოველოდი და ასეთი ანგარიში გულში რომ ედო, ამას როგორ ვიფიქრებდი?!
 - უნდა გეფიქრა. სიყვარული სიყვარულია, მაგრამ თავის სამშობლოს, ნათესავ-მეგობრებს ვერ დასტოვებდა და შენ ვერ გამოგყვებოდა. ეგ თავიდანვე უნდა გცოდნოდა. როგორ გითხრა, თქვი.
 - რად გინდა, ხომ იცი?
 - ვიცი, მაგრამ კიდევ მინდა მოგისმინო, შენ ლამაზად გამოთქვამ მის სიტყვებს.
 - საქართველოში ვერ გამოგყვებიო. თუ ჩემი თავი გიყვარს, აქ დარჩი, პეტერბურგში, მამა დიდ ქორწილს გადაგვიხდის, კარგ სამსახურსაც გიშოვის და ბედნიერად ვიცხოვრებთო.
- ილიამ წერილი დაკეცა და კოხტას გადასცა.
- პასუხი მისწერე?
 - მივწერე!
 - თუ აზრი არ შეიცვალა, ჩვენი სიყვარულისაგან არათფერი გამოვა.
 - ამაზე მეც ველაპარაკე, პეტერბურგში ცხოვრება არ შეუძლია, კაცი ცუდად არის-მეთქი.
 - რა გიპასუხა?

- ჰაერს მიეჩვევა და კარგად იქნებაო. რა არ ვუთხარი, მაგრამ...
- კარგი, კარგი, - შეაწყვეტინა ილიამ, - გვეყოფა იმაზე ლაპარაკი. ...რად გაისარჯე ამ სიცხეში?
- კარგი საქმისათვის მოვედი, სანადიროდ უნდა წამოხვიდე, ჩვენ სამნი ვართ, მეოთხე შენ იქნები.
- მე რომელი მონადირე მნახე? ნიშანი არც ვიცი.
- პავლოვსკში რომ დამბაჩას კარგად ისროდი?
- არ მაქვს მაგისი თავი და გული, თქვენ წადით!
- არა, უნდა წამოხვიდე! - ჩააცვივდა კოხტა და იმ საღამოსვე ალაზანზე წაიყვანა.

ილიას მამისეული თოფი მხარზე გადაეკიდა, ცხენზე წახრილი იჯდა და კოხტას მხარს უსწორებდა. მუხნარს რომ მიუახლოვდნენ, ილია ცხენზე წამოიმართა და შეჰყვირა:

- ძრწოდეთ, ნადირნო, მოვედი!
- კარგი კაცო! - გაეცინა კოხტას.

ჩამოქვეითდნენ. ცხენები ბიჭს დაუტოვეს, თვითონ კარგა მანძილი გაიარეს და შეჩერდნენ. ტანაყრილ ტყეს მთვარე ზედ აღნებოდა. ერთმა მონადირემ თქვა, ამის იქით ნულა წავალთ, ირემი აქ გამოივლისო.

თოკივით წვრილი ბილიკი პირდაპირ წყაროსაკენ მიემართებოდა. მონადირენი ამ ბილიკის ახლომახლო ჩასათვრებოდნენ, ძაღლებიც მიუყრდნენ.

დაძახულ მოლოდინს ბოლო არ უჩანდა. ტყის მძიმე

სიჩუმე უფრო და უფრო აუტანელი ხდებოდა. შუალამემ რომ მოატანა, ალაზნიდან წამოუქროლა ნიავმა, ტყეს ფაჩუნი და შრიალი აუყენა.

ილიას მოსწყინდა, თოფი ხეზე მიაყუდა და თვითონ იქვე, ბალახზე წამოწვა. ყველაფერს და ყოველივეს სული გაენაბა, ილიას კოხტას სიტყვებმა და იმ პატარა წერილმა, ჩაიკოვსკაიამ რომ გამოგზავნა, ძველი ფიქრები აუშალა. გულით ის ახლა აქ, ალაზნის ტყეში კი არა, პეტერბურგში იყო და ჩაიკოვსკაიას ესაყვედურებოდა: კოხტას რომ ეუბნები ილიას გაუფრთხილდიო, რატომ თქვენ თვითონ არ მიფრთხილდებით. შეყვარებული გულის ასე უწყალოდ დაკოდვა შეიძლება?!

ძაღლების ყეფა ატყდა, მონადირე ძაღლებმა მერე რა გამწარებული ყეფა იციან!

ილია წამოხტა და თოფს წაატანა ხელი.

დაფეთებული ირემი ხეს მიეყრდნო. კოხტა ვერაფრით ვერ მიუდგა ნადირს, დიდი მუხა ეფარებოდა, ილიასთან კი მარჯვედ იდგა ირემი, რქები უკან გადაეყარა, თავი აენია და განაბულიყო.

ილიამ ვერც თოფი დაუმიზნა, ვერც თვალი მოსწყვიტა. უყურებდა დამფრთხალ ირემს და გულში ამბობდა: „ისეთი ლამაზია, ისეთი ნაზი და სინაზესთან ერთად ისეთი მიმზიდველი ამაყიცაა, რომა, გგონია, რაც ბუნებისაგან მინიჭებული აქვს, სულ ეხლა შემოიკრიბაო, რომ სიკეთი-

თა და სილამაზით მაინც შეაბრალოს თავი დამალულს მტერსაო“.

ძაღლების გნასი რომ მოახლოვდა, ერთი დაიფრუტუნა და გაქრა ტყეში.

გამწარებული მონადირეები ილიასკენ გაექანენ.

- კაცო, რა ჰქენი, რატომ არ ესროლე?! - მიახალა მაშინვე კობტამ, ილიამ პასუხი შეავვიანა.
- უხ! ისეთი ლამაზი, ისეთი მოხდენილი რამ იყო, მაგას როგორ ვესროდი, როგორ გავიმეტებდი...
- მაშინ რაღას მოდიოდით სანადიროდ? - ჩაეკითხა ერთი.
- კობტამ ძალით წამომიყვანა, ააშენა ღმერთმა, რა ირემი ვნახე!

კობტამ ვერაფერი უთხრა მეგობარს, მწარედ ჩაიციანა. მალე მზე ამოვიდა, მონადირეებს ხელი მოეცარათ, დაბუა ჩიტიც ვერ მოჰკლეს, დამძიმებულნი შესხდნენ მაძლარ ცხენებზე და შინისაკენ გამოსწიეს.

სოფელში ასე ხელცარიელი შემოსვლა თავის მოჭრას უდრიდა. გამოსავალი ისევ კობტამ იპოვა. ყველა თოფი ერთად შეჰკრა, ნაბადი შემოახვია და ბიჭის ცხენს აჰკიდა, ძაღლებიც მას ჩააბარა და სულ სხვა გზით გაისტუმრა შინ, თვითონ თავის ამხანაგებიანად რთველში წავიდა დროს გასატარებლად.

ილიამ იმავე წელს დაწერა „გლახის ნაამბობი“. ამ მოთხრობის პირველ თავში სწორედ ალაზნის ტყეში ის

ნადირობა აღწერა, მან რომ ირემს ვერ ესროლა. სამაგიეროდ სხვა დროს კობტამ მეგობარი სანადიროდ არ წაიყვანა, ხელის შემშლელი არავინ ჰყავდა და მშვენიერი ირემი გამოასალმა წუთისოფელს. ნანადირევი შინ დიდი ზარ-ზვიმით მოიტანა. აი, მაშინ აღმოხდა ილიას ის სიტყვები „გლახის ნამბობის“ პირველ თავის ბოლოს რომ აქვს მიწერილი: ისიც კარგია, ჩემო პირუტყვო, რომ იქა ჰკვდები, სადაც დაიბადე. ჩვენ, კაცები, ხანდახან მაგ ბედნიერებასაც მოკლებულნი ვართ“.

შემოდგომა მიიწურა, რთველი მიიღია. კახეთის ღამე საარყე ქვაბების ცეცხლმა გაანათა. ყვარლიდან ხორაგით დატვირთული ილია თბილისს ჩამოვიდა, ხოლო აქედან რუსეთის შორ გზას გაუდგა.

სამშობლოში დასვენებამ, ნათესავებში ყოფნამ ილია გამოაკეთეს. გადადებული საგამოცდო საგანი, „სასოფლო მეურნეობა“ მოამზადა, ჩასვლისთანავე ჩააბარებს, მერე კვლავ ლექციები და უძილო ღამეები...

დილიუანსი არავგისპირს მიჰყვებოდა. ტყეც გამოჩნდა. ილიას თვალწინ ისევ გაუხარაშვილი წამოიმართა. გაუხარაშვილი ილიას სიზმარშიც ეწვევა ხოლმე. აი, ახლაც მისი ცხენი თქარათქურით მისდევს დილიუანსს, სადაც არის დაიძახებს: „ხელები მალლა“!

დილიუანსი კავკასიონის უღელტეხილს მიადგა. დაინ-

ყო მღეთის აღმართი. თოვლით დაფარული მწვერვალები დაკლაკნილ გზას ცივად დაჰყურებდნენ, მაგრამ სიცივე მაინც არ იგრძნობოდა, თბილოდა, მომქანსცველი გზა არ ილღოდა. მგზავრებს ყველაფერი მოსწყინდათ, საუბარიც, კამათიც.

დილიუანსი მიჰქროდა, უკან მორუხო მტვერს აყენებდა. ეს მაინცდამაინც არ აწუხებდა მგზავრებს, მაგრამ შემხვედრი დილიუანსის გამოჩენა არავის არ სიამოვნებდა, როგორც კი გამოჩნდებოდა დილიუანსი, მგზავრებს ფაციფუცი შეუდგებოდა, ზოგი ცხვირსახოცს იფარებდა სახეზე, ზოგიც საყელოს აიწვედა და კისერს მხრებში ჩარგავდა. ერიდებოდნენ მტვერს, რომელსაც შემხვედრი დილიუანსი კარგა მანძილზე სტოვებდა.

ახლაც გამოჩნდა მდიდრულად მორთული ეკიპაჟი. ცხენები ჩოროთით მოდიოდნენ, წინ დაბალი, ჩამსხვილებული კაცი ნელა მიაბიჯებდა, ხელები ზურგს უკან შემოეწყო, დაფიქრებულს თავი დაეხარა.

- გრიგოლ ორბელიანი! - გაისმა მგზავრებში.

ილიას ფიქრი გაუწყდა. მაშინვე თავი გამოყო სარკმლიდან, გრიგოლი ილიას თვალით არ ენახა, მისი დიდებული ლექსები კი ზეპირდა იცოდა და თავის ყმანვილურ გონებაში მაღალ გოლიათად ჰყავდა წარმოდგენილი.

თოვლიანი მთები, უფრო ქვემოთ ხერხივით დაკბილული კლდეები თითქოს თეხდაფეხ მისდევდნენ

პოეტს.

- სწორეს ახლა, ამ დამშვიდებულ გულზე ლექსს უწერს ამ მშვენიერ ბუნებას! - აღტაცებით თქვა ერთმა მგზავრმა.

ილიამ მეეტლეს ასძახა:

- შეაჩერე!

გაქაფულმა ცხენებმა აღმართზე ძლივ შეიმაგრეს თავი, ილია მაშინვე ჩამოხდა დილითუანიდან, მას კობტაც ჩამოჰყვა, მერე სხვებიც გადმოვიდნენ.

ახალგაზრდები შემოეხვივნენ უკვე ჭალარა პოეტს.

გრიგოლმა სათითაოდ ყველას ხელი ჩამოართვა.

შეატყო, რომ სტუდენტები იყვნენ და გზაც დაულოცა.

- აბა თქვენ იცით, ისწავლეთ, ისწავლეთ, ასახელეთ ჩვენი ქვეყანა!

მერე ყველას გვარი და სახელი გამოჰკითხა.

ჯერი ილიაზე რომ მიდგა, გაიღიმა.

- შენ პაჭუას „ნასლედნიკი“ ხარ?

- დიახ.

- ეხ, საბრალო მამაშენი, ჩემი სეხნია, კაცური კაცი იყო. ლეკებმა ვერაფერი დააკლეს, ბრმა შემთხვევამ... - გრიგოლმა სიტყვა განწყვიტა და ილიას ქოჩორზე ხელი გადაუსვა, - ახლა შენ ივარგე, გაჭირვება ღმერთმა გაშოროს, მაგრამ, რომ გაგიჭირდეს, ნუ მომერიდები. კადეტთა კორპუსში მივიკითხ-მოვიკითხე ქართველები. შენს ძმას წავაწყდი, გავიცანი. ლოგინში იწვა,

მაინც კარგად ვარო, მითხრა. სიცხე კი ჰქონდა. ახლა მართლაც კარგად დავტოვე.

ილია გაშრა, ვერაფერი თქვა, თვითონ ძლივს დააღწია თავი სატკივარს, ახლა თემურის ავადმყოფობამ თავზარი დასცა. „კარგად არისო“, გული გაუკეთა ალბათ, გრიგოლმა, თორემ იმისი ბედი ვინ მისცა მის ოჯახს, ავადმყოფი რომ განიკურნოს. ვინც ავად გახდა, ყველამ სამუდამოდ თვალი დახუჭა. საფიცარი ძმაღა დარჩა და ისიც თურმე ავად გამხდარა.

ილიამ ნაღვლიანი თვალი მიაპყრო გრიგოლს. გრიგოლი წელში გამართული იდგა, ყოჩალი ჯარისკაცის პენიანობას არ ელევოდა, მაგრამ შენუხებული სახე მაინც თავისას ამბობდა. ამ დაუსრულებელ გზას ხანშიშესული, ნაომარი და ნაჯაფარი გენერალი საკმაოდ მოექანცა. უღვაშებსა და ქილვაშებში ჭადარა მორეოდა.

„ლექსებში კი გრიგოლი ვაჟკაცურია და ომახიანი“, - გაივლო გულში ილიამ. მზის სხივები გრიგოლს წინ წამოწეულ, თართო მკერდზე ჩამწკრივებულ ორდენებს უბრჭყვიალებდა.

გრიგოლი ჩათვიქრებულ ილიას გამოემშვიდობა. სტუდენტებს გზა დაულოცა, ისევ შემოიწყო ხელები ზურგზე და გზა განაგრძო.

ეს იყო პირველი, მეგობრული, უფრო კი მამაშვილური შეხვედრა. გრიგოლ ორბელიანს უკვე თავდაღმარ-

თბე გადაედგა ფეხი, ილია კი აღმა მიემართებოდა მეცნიერების დასაპყრობად. ილია გრიგოლის ჩინსა და ორდენებს არად ავლებდა, მისი პოეზიით იყო მოხიბლული.

დილიყანსი ერთხანს ადგილიდან არ დაიძრა. მგზავრები საყვარელ პოეტს გაუფრთხილდნენ, ქვენა ქარი ქროდა და მტვერს ზედ მიახვეტავდა. გრიგოლი თვალს რომ მიეთვარა, მეეტლემ მერე შეუყიჟინა ცხენებს.

ახლა უფრო მარდად გასწიეს ცხენებმა, დილიყანსი ნავივით ქანაობდა, რიყის ქვებზე თვლები მიხრიგინებდა.

ილია კუთხეში იჯდა, ქუდი მუხლისთავზე დაედო, შავ თმას ქარი უწნავდა. კოხტამ შეატყო მეგობარს უგუნებობა, რა არ თქვა, როგორ არ იხუმრა, მაგრამ ილიას მოღუშული სახე მაინც ვერ გაუხსნა.

ამ ფიქრსა და ურვაში თემურს ეუბნებოდა: „ჩემო, ძამიკო, ავადმყოფობა რატომ არ შემატყობინე. ვაითუ, ისევ სიცხე გწვავს“, ფიქრმა ფიქრი შეცვალა და ისევ გაუხარამვილი წარმოუდგა თვალწინ.

ილია ფიქრით ისევ თბილისში გაჩნდა. გუშინწინ ივანე კერესელიძეს „აჩრდილის“ პირველი თავი გადასცა და მოკრძალებით უთხრა:

- თუ მოგეწონებათ, დასტამბეთ!
- დასაწუნს შენ აქ არ მოიტანდი! - შეაგებ ივანემ და ახალგაზრდა მეგობარს ხელნაწერი გამოართვა. გულში კი თქვა - „ლამის წამლეკოს ამდენმა ლექსმა“.

ილიას არათფერი აგრძნობინა, გადაფურცლ-
გადმოფურცლა ხელნაწერი, როგორც იტყვიან, „თვალი
გადაჰკრა“ და გაიღიმა.

- დავბეჭდავ, მაგრამ რომელი მიმართულებით
გამოგიგზავნოთ „ცისკარი“, ზღვით თუ ხმელეთით?
- ჩემთვის სულ ერთია!
- ხედავ, შენთვის სულ ერთი ყოფილა, აკაკის კი ზღვით
ურჩევნია.

ილიამ თავი შეიკავა, თითქოს ვერც კი გაიგო, თუ
რატომ გადაუკრა სიტყვა ივანემ.

პეტერბურგის ეართველი სტუდენტი
ახალგაზრდობისათვის „ცისკრის“ პოლიტიკური
მიმართულება მიუღებელი იყო, თავიანთი აზრი
კერესელიძეს წერილებით აცნობეს და მიუთითეს
ჟურნალის „მიმართულების“ შეცვლის აუცილებლობა.
სტუდენტთა ეს მოთხოვნა ივანე კერესელიძეს
სხვაგვარად გაუგია, რის გამოც აკაკის ლამაზად
უხუმრია:

„ივანე კერესელიძე „ცისკარს“ გვიგზავნიდა
პეტერბურგში, ჩვენც მადლობა მოვწერეთ და ვთხოვეთ,
რომ „ნაპრაველნიე“ გამოეცვალა. კერესელიძემაც
„დაგვიჯერა“ და ზღვით გამოგიგზავნა ჟურნალი“.

ბ ა რ ა თ ა შ ვ ი ლ ი

იმ ზაფხულს ილია სამშობლოში ველარ ჩამოვიდა, გზას დიდი დრო და ხარჯი უნდოდა, ამიტომ ჰავლოვსკის მიაშურა. ხეებით დაბურული ეს გრილი სოფელი, თუმცა ყვარელს არათურით არ ჰგავდა, მაგრამ ილია მაინც კარგად მოეწყო. პეტერბურგის შეხუთული ჰაერის შემდეგ აქ სული მოითქვა. ბევრს წერდა და კითხულობდა. მაგიდაზე დახვავებულ წიგნებსა და ქალაქლებს იშვიათად შორდებოდა.

- კაცო, ამ „აჩრდილმა“ შენც აჩრდილი არ გაგხადოს, ამდენი მუშაობა შეიძლება? - უსაყვედურა იმ დღეს კობტა აფხაზმა.
- მიფრთხილდები?
- რატომაც არა, შენი ჯანის კაცი თავს უნდა გაუფრთხილდეს. მაშინ იყო და ძლივს გადარჩი.
- ბედი მაქვს, ახლაც გადავრჩები, - მაგიდიდან ქალაქლები აკრიფა, - „აჩრდილი“ თავს არ მანებებს, გადათეთრებას შევუდექი უკვე.

კობტამ ჯერ კიდევ მელანშეუშრობელი ფურცლები გამოართვა, ჩაიკითხა, მერე ერთი ადგილი მოეწონა და ხმას აუწია:

მომავალია ნუგემ-მომცემი,
რაც ვერ ჰპოვე დღეს, იპოვი ხვალევ.

- ეს კარგად გითქვამს. ხალხს ნუგეში და მომავლის რწმენა უნდა. მაინც როდის დაამთავრებ პოემას?
- ჯერ რაც უკვე დანერგილი მაქვს, იმას უნდა გავკრა-გამოვკრა, ადვილად ვერ ვწერ. პირველ ნაწილს რომ გადავათეთრებ, მერე წაიკითხე, ახლა წავიდეთ, დროა, თორემ ჭავჭავაძის ქალი გაჯავრდება.
- ნეტავ რისთვის გიბარებს? - ჰკითხა კოხტამ.
- არ ვიცი.
- იქნებ რაიმე საიდუმლო უნდა გაგანდოს, მე რა შუაში ვარ?
- რას ამბობ, ჩემთან რა ესაიდუმლოება იმ მანდილოსანს?
- ორივე ჭავჭავაძე ხართ, იქნებ ქონებას გთავაზობს?
- ქონებას? - გაიღიმა ილიამ. - მაშ წამოდი, შენც გინილაღებ!

კოხტა ილიას ნებას დაჰყვა, მეგობრები პავლოვსკის ახლოს, ცარსკოე სელოში ეკატერინე ჭავჭავაძეს ესტუმრნენ.

პეტერბურგის ქართველ სტუდენტებსა და საზოგადოებაში ილია უკვე ცნობილი პოეტი იყო, მისი ლექსები ხელიდან ხელში გადადიოდა, მას ბევრი მკითხველი და პატივისმცემელი ჰყავდა.

ეკატერინე თვითონაც წერდა ლექსებს და რა გასაკვირია, ილიას პოეზია კარგად რომ სცოდნოდა.

ეკატერინე საიდუმლო განძივით ინახავდა ნიკოლოზ

ბარათაშვილის ლექსებს, თითქოს არ ემეტებოდა გამოსაქვეყნებლად, მონყენის წუთებში (მოსაწყენი და სადარდებელი კი ბევრი რამ ჰქონდა) წიგნაკებს გადაშლ-გადმოშლიდა, თვალს გადაავლებდა საყვარელი ადამიანის ნაწერ-ნააზრევსა და შვებასაც იგრძნობდა: „ტატოს ლექსები რომ დაიბეჭდოს, - თიქრობდა ხანდახან დედოფალი, - საქვეყნო გახდება და მე არაფერი არ დამრჩება“. მაგრამ ეს გულუბრყვილო აზრი მალევე უარყო და, ის იყო, დასახმარებლად ილია მოიხმო.

ილიასაც ეს უნდოდა, დედოფალს რომ არ მიეწვია, თვითონ ეახლებოდა, რადგან ბარათაშვილის კვალს თბილისიდან მოჰყვებოდა. ილიას თბილისში „ცისკრის“ ძველი ნომერი ჩაუვარდა ხელში, იქ წაიკითხა - „სულო ბოროტო“, „ბულბული ვარდზედ“, „ჩემი ლოცვა“, „რად ჰყვედრი კაცსა“.

მართალია ილიას წინათაც ჰქონდა წაკითხული ეს ლექსები, მაგრამ მაშინ თხუთმეტი წლისა იყო, სიბრძნეს ვერ ჩასწვდა, ახლა კი ბარათაშვილი ისე მაღალი მოეჩვენა, თვალი ვერ შეაწვდინა და იმავე საღამოს გიორგი ერისთავს ეახლა, ამ უცნობი პოეტის ამბავი გამოჰკითხა. „ცისკრის“ იმავე ნომერში დაბეჭდილი იყო გიორგი ერისთავის ლექსი „თ. ნიკოლოზ მელიტონის ძის ბარათოვის გარდაცვალებაზედ“. გიორგიმ და სხვებმაც, ვისაც ილიამ ბარათაშვილის ლექსებით გა-

მონვეული თავისი აღფრთოვანება გაუზიარა, უთხრეს ეკატერინე ჭავჭავაძეს თუ არა, მისი თხზულებები აბა სხვას ვის ექნებაო, და ილია პეტერბურგში ჩამოსვლისთანავე ეკატერინესთან შეხვედრის თადარიგს შეუდგა, თანაც ეჭვი ეპარებოდა, ეკატერინეს ის ხშირად შეხვედრია, მაგრამ ბარათაშვილზე არათფერი უთქვამს, თუმცა, რომ ჩაუფიქრდა, საეჭვო და საყოყმანო ვერათფერი დაინახა.

ეკატერინესთან ილია შარშანწინაც იყო, მაგრამ მაშინ გულდასმით ვერ შეძლო ორივე წიგნაკის გადაკითხვა, სტუმრებმა ხელი შეუშალეს. სამაგიეროდ, იმ ერთხელ წაკითხულიდან ბევრი ადგილი დაამახსოვრდა, ზოგიერთი სტრიქონი „კაკოშიც“ ჩაურთო, რა ექნა, დაიპყრო ბარათაშვილმა, თავისი ახალგაზრდა მემკვიდრე „მტკვრის პირას“ წაიყვანა „ფიქრთ გასართველად“.

ილია მეგობრობდა ეკატერინეს ქალიშვილთან, სალომესთან. ახლაც სალომე გამოეგება. სალომე ათი წლისა იყო, დედის მიერ განებივრებული, მონიჭული ქალიშვილივით მოვიდა ილიასთან და მობრძანდით, ფრანგულად უთხრა, მაგრამ ილიამ წარბები შეიკრა. სალომე მიხვდა, რაშიც იყო საქმე, მაშინვე გამოასწორა უნებლიე შეცდომა და ქართულად დაელაპარაკა.

- ბოდიში, სულ დამაფიქრდა, რომ თქვენ ამიკრძალებით ფრანგულად ლაპარაკი.

ილიას გაეცინა და ხელი ჩამოართვა, მერმე სტუმრები დარბაზში შეინვიეს. ფანჯრებიდან ქარი უბერავდა. აბრეშუმის ფარდები ხან აფრასავით იშლებოდა, ხან იკეცებოდა, მისი ფრიალ-ფრიალი აგრილებდა ოთახს.

სამეგრელოს დედოფალმა გამოსვლა შეაგვიანა.

სალომე ილიას წინ თამამად იდგა, მერე რალაც გაახსენდა, გაიქცა, დიდი, მოვერცხლილყდიანი ალბომი შემოიტანა და ილიას წინ, მაგიდაზე გაშალა.

- ეს ალბომი გუშინ მომიტანა დედამ, ჯერ არავის არათფერი ჩაუწერია, - დაიწყო სალომემ, ტატოს უბის წიგნაკიდან მე გადმოვიღე ერთი ლექსი, წაიკითხე, ვიცი, მოგეწონება.

ილიამ ალბომი მოუთმენლად გადაშალა და ბავშვის გაუნათავი ხელით დანერილ ფურცელს დააცქერდა. ეს იყო „საყურე“. ილია ამ ლექსს რომ კითხულობდა, სალომე სარკეში იცქირებოდა, პატარა ყურზე ჩამოკიდებული საყურე ერხეოდა და ჩუმ-ჩუმად იღიმებოდა. გოგონას მოეწონა ეს ლექსი, გეპირადაც ისწავლა, ახალ ალბომშიც ჩაწერა.

ილიამ „საყურე“ რომ წაიკითხა, მერე თავისთავად თქვა: აგე ზღვა ნელი, სიყვარულის სხივქვეშ გაშლილი“, შემდეგ ამ სტრიქონმა ნიკოლოზ ბარათაშვილისადმი მიძღვნილი ლექსი დაამშვენა.

- სალომე, ეს ლექსი რომ გადმოწერე, ის უბნის წიგნაკი არ შეიძლება მაჩვენო?

- დედა მოგართმევთ, დედამ თქვა, ილიას უნდა წავაკითხო, გაზეთში დაბეჭდავსო.

შემობრძანდა ეკატერინე, მუქი ვარდისფერი აბრეშუმის მარმაშა კაბა ეცვა, მკერდზე ღრმად ამოჭრილი. ეკატერინემ ხელი ჩამოართვა სტუმრებს, დივანზე ჩამოჯდა. დაღლილი, გაფითრებული სახე ჰქონდა. ილიამ ვერ მოითმინა, ალბომი ისევ გადათურცლა და თქვა:

- რა ჩინებული ლექსია, ნეტავი ვის საყურეს დაუნვავს ასე ეს დიდებული პოეტი?

ეკატერინე ოდნავ განითლდა, თავი ჩალუნა და ხმა გვიან ამოიღო.

- ჩვენი მამები უფრო მეგობრულად იყვნენ ერთმანეთთან ვიდრე ჩვენ, შვილები ვართ... ავერ, მეორე წელიწადია პეტერბურგში ხართ, რა შორს მე ვარ, მაგრამ ერთხელ არ აღვძვრიათ სურვილი ჩემი ნახვისა... თუმცა, ახლა ვისლა ვუნდივარ, უღონო და უბედური.

ილიას უნდოდა რალაც ეთქვა ნინო გრიბოედოვაზე. ახსოვდა მისი ამაგი, ციებიანი რომ ექიმთან მიიყვანა, მაგრამ მოერიდა, იცოდა მოგონება მწუხარებას გამოიწვევდა და ბარათაშვილთან შეხვედრის ეს ბედნიერი საღამო ჩაუშხამდებოდა.

- თქვენ ბევრი თხზულება გაქვთ ბარათაშვილისა?

- ბევრი მას არ დაუწერია. რაც თვითონ მომცა, ის შვეინახე, ახლავე მოგართმევთ!

ეკატერინემ მაგიდის უჯრა გამოწია და ორი პატარა წიგნაკი ამოიღო. ერთში „ბედი ქართლისა“ იყო მოთავსებული, ხოლო მეორეში - „მერანი“, „ფიქრი მტკვრის პირას“, „სული ობოლი“, „ვპოვე ტაძარი“ ...

- აი, ლექსები, ნახეთ, წაიკითხეთ, დაბეჭდეთ, გაიგოს ხალხმა რა შვილი ჰყავდა! - თქვა ეკატერინემ და ორივე წიგნაკი ილიას მიანწოდა.

ილიამ გადაშალა „ბედი ქართლისა“, მოუთმენლად გადადიოდა გვერდიდან გვერდზე.

ეკატერინე სტუმარს თვალს არ ამორებდა. ილიას შავი წვერი უფარავდა სახეს, უფარავდა ამ სახეზე გამოხატულ სიხარულსაც, მაგრამ ეკატერინეს მახვილი თვალი მაინც ხედავდა, მაინც გრძნობდა იმ აღტაცებას, ეს ახალგაზრდა პოეტი რომ განიცდიდა „ქართლის ბედის“ კითხვისას.

კოხტამ ველარ მოითმინა, ხელი წაატანა მეორე წიგნაკს, მაგრამ ილიამ არ დაანება.

ილია წამოდგა, ისევ გადაფურცლ-გადმოფურცლა წიგნაკი და ახლა ხმამაღლა, თავიდან დაიწყო „ბედი ქართლისა“.

ილია გატაცებით კითხულობდა, მარჯვენა ხელს მალიმალ მალლა სწევდა, მისი ბოხი ხმა ზარივით რეკდა.



ეკატერინე ხელე-
ბით მაგიდას და-
ეყრდნო და ერთ
წერტილს მია-
ჩერდა. მის დაფიქ-
რებულ თვალებს
ახლა წინ ედგა
ნიკოლოზ
ბარათაშვილი,
მკრთალი და ნაღვ-
ლიანი, სიტყვებიც

ნაცნობი და ახლობელი ისმოდა. ცრემლმორეული თვალები ოდნავ მოჭუტა და, წარსულში გადაეშვა. ეკატერინემ თვითონ ტატოსაც მოუსმინა, მამამისის, ალექსანდრე ჭავჭავაძის სახლის ბანზე ახლობლებს რომ წაუკითხა ეს პოემა, მაშინ ტატო ღელავდა, ჩქარობდა, ალექსანდრემ წიგნაკი გამოართვა და თვითონ დინჯად, აუღელვებლად განაგრძო.

ახლა ილიაც თითოეულ სიტყვას სწორედ ისე გრძნობით გამოთქვამდა, როგორც მაშინ ალექსანდრე, ეკატერინეს საყვარელი მამა. „ეხ, ტატო, ტატო!“ ეკატერინეს გული აუტირდა, მაგრამ თავი შეიკავა.

სალომემ შეატყო დედის წუხილი, ნელა წამოდგა და გვერდში მორიდებით ამოუდგა, ეკატერინემ ხელი მოხ-

ვია გოგონას და მუხლზე დაისვა.

ილიამ რვეული მაგიდაზე დადო, ზედ ხელი დაჰკრა და თქვა:

- აი პოეზია, აი ნიჭი!

„საყურეს“ ილიამ ჯერ თვალი გადაავლო, მოეწონა, მისი სიტყვები, გულს ჩასწვდა. ასეთ ცისფერთვლიან საყურეს ატარებდა ჩაიკოვსკაიაც. ამ მოგონებას, რომელიც გულში ტკივილად იყო ჩალექილი, ილია ყოველთვის გაურბოდა, მაგრამ ახლა ვერ გაექცა. „საყურეს“ კითხულობდა და ჩაიკოვსკაია ედგა. ამიტომ ჰქონდა მის ხმას ამდენი სითბო. ეს ყველაზე მეტად ეკატერინემ იგრძნო, თავს ვერ მოერიო. მისი ცრემლი და სიძაბუნე სტუმრებს რომ არ დაენახათ, მეორე ოთახში გავიდა.

ილია მიხვდა, თუ რა ცეცხლი სწვავდა ეკატერინეს, თუმცა წინათაც ბევრი რამ სმენია ბარათაშვილის უიმედო სიყვარულზე, მაგრამ ჭორი ეგონა, ან წუთიერი გატაცება. ახლა კი დარწმუნდა და გაიფიქრა - პოეტის გულს ყველას ღალატი რომ აეტანა, სიყვარულის ღალატს ვერ აიტანდა.

ჰატარა გოგონას უკვირდა, დედამ ასე მოულოდნელად რატომ დატოვა სტუმრებიო, ტატოს ლექსები მას ბევრჯერ მოუსმენია, ზოგი მათგანი ზეპირადაც იცოდა, მას არც ის გამოჰპარვია, დედა ამ ლექსების წაკითხვისას ყოველთვის რომ ღელავდა,

მაგრამ ახლა რა მოხდა?!

ეს ხომ გუშინ იყო, სწორეს გუშინ, სალომემ კვერცხის გულივით ყვითელი ჩონგური აიღო ხელში, ტახტზე ჩამოჯდა და ლარები აახმიანა, იქვე ეკატერინე იჯდა, სარკესთან თავის ორეულს მიშტერებოდა. გულს დარდით უვსებდა ნაოჭების, ჭაღარის მომრავლება, ემხი და სილამაზე თვალსა და ხელს შუა გაუქრა. განა იყო ოდესმე ლამაზი? ულამაზესიც იყო, ამას თვითონაც გრძნობდა, ერთ სილამაზედ მისი დაკვრა ღირდა. ვისაც მისი ჩონგურზე სიმღერა არ მოუსმენია და ცეკვა არ უნახავს, მას ნამდვილი ეკატერინე არ უნახავს.

ეს ფიქრი და მოგონება ჩონგურის ხმებმა უფრო გაუღვიძა. ცეკვისა და სიმღერის მიყუჩებულმა და მიძინებულმა უინმა კვლავ დაიპყრო, კვლავ მოუნდა დაკვრა, მიფერულილმა ახალგაზრდობამ ისევ გაიღვიძა, გოგონას ჩონგური გამოსტაცა.

ლამაზი თითები გზნებით ჩამოჰკრა ლარებს. მუსიკა მაცდუნებელია, უცებ დაავინწყდა, რომ ის იყო დედოფალი დიდებული და სოფლის გოგოსავით დაკვრა და სიმღერა არ შეეფერებოდა, მაგრამ სწორედ სოფლელ გოგოსავით უინიანად, გატაცებით უკრავდა, მღეროდა.

ჰატარა სალომემ ისიც კი გაიფიქრა, დედა გაგიჟდაო და შიშმა აიტანა, მაგრამ ბედზე თედორე ხომტარია შემოვიდა - მოძღვარი და ისტორიკოსი. გოგონას იმედი

მიეცა და გაჩერდა. თედორემ ნაბიჯი ვერ გადადგა, არც ხმა ამოუღია, კართან იდგა, ჩონგურის ხმამ თავის მშობლიურ კუთხეში გადაიყვანა, სამეგრელოს დარდიანი ხმებით ევსებოდა გული.

თედორე ეკატერინეს მემატთანე იყო. ამ დიდებული მანდილოსნის თითოეული ნაბიჯი ქალაქდზე გადაჰქონდა. თედორეს ნაწერები ამჟამად ზუგდიდის მუზეუმში დევს, მაგრამ, სამწუხაროდ, მღვდელს გამორჩა ეკატერინესა და ილიას შეხვედრა, მათი საუბრის აღწერა. გამორჩა, თუ გამოტოვა?!

ჰასუხს თვითონვე ვეძებ.

ბარათაშვილის წიგნაკებს სალომე ყოველთვის შიშით უყურებდა, მართალია, ლექსები მოსწონდა, მაგრამ ის არ მოსწონდა, რომ ამ წიგნაკების რალაც თილისმა დედას თვალებს ცრემლებით უვსებდა. „ნეტავი სულაც წაიღოს ილიამ და მოგვასვენოს“, - თეიქრობდა ის.

- სტუმრები მარტონი არიან, წამოდი - შეახსენა დედას. გვიან წამოდგა ეკატერინე, ჯავრი სახიდან გადაიყარა, მაგრამ გულს ვერათფერი მოუხერხა და მორიდებით შევიდა სასტუმრო ოთახში.
- მაჰატიეთ, - გაღიმება სცადა, მაგრამ არ გამოუვიდა.
- დიდი ხანია ილიას თქვენთან მოსვლა უნდა, ემზადებოდა. გუშინწინ მამათქვენზე ლექსი დაწერა - სცადა უხერხულობის გაფანტვა კოხტამ.

ეკატერინეს გაუკვირდა და თავი დაუკრა ილიას.

- გმადლობთ! - კობტას შეხედა, - ვთხოვოთ, წაგვიკითხოს.

ილიამ გულისჯიბიდან მოკეცილი ქალაქი ამოიღო, გაშალა და ეკატერინეს გაუწოდა.

- ინებეთ!
- ვთხოვთ, თქვენ წაგვიკითხოთ! პოეტებმა კარგი კითხვა იციან! ტატო ლექსს რომ კითხულობდა, ცეცხლსა და სევდას ორივეს ერთად აფრქვევდა.
- ტატოს ლექსების შემდეგ ჩემს ლექსებს ვერ წავიკითხავ ...მითხრეს, თქვენ შესანიშნავად კითხულობთ თურმე.
- შეიძლება წინათ, როცა ახალგაზრდა ვიყავი! - ეკატერინემ ილიას ლექსი აიღო, დახედა, სევდა აღებეჭდა სახეზე.

ვიდრე ილია ბარათაშვილის მეორე წიგნაკის კითხვას შეუდგებოდა, ეკატერინე წამოდგა და მთრთოლვარე ხმით თქვა:

- თქვენ იკითხეთ, მე ამ წუთას გეახლებით!

ეკატერინე რომ გავიდა, ილიამ კითხვა დაიწყო ...

მცირე ხნის შემდეგ სალომე პეპელასავით, უხმაუროდ წამოდგა, ცერებზე შემდგარი დარბაზიდან გავიდა. საწოლ ოთახში, ბალიშებზე დამხობილი ეკატერინე გულამოსკვნილი ტიროდა. ხელში ილიას ლექსი ეჭირა.

სალომეს ელდა ეცა.

- დედა, ვინ განყენინა, რატომ სტირი?
- გაჩუმდი, შვილო, აბა, როდის ვტირი?
- ცრემლი, ცრემლი!

ეკატერინემ თვალები ამოიწმინდა, ბავშვს სახე მოარიდა.

- ექიმს დავუძახებ.
- ვერ მიშველის, მოდი აქ, ჩემო გოგონა, - მოიხმო დედამ და ცნობისმოყვარე ქალიშვილი გულში ჩაიკრა, - აი, ახლა არ ვიტირებ. შენა ხარ ჩემი წამალი, გესმის? ... - და დუმილის შემდეგ გაიმეორა:
 - „ხან ღონდება ნაზ ქალსავით უიმედო სიყვარულით“.
- დედა, რატომ ამბობ ამას?
- აი, აქ წერია, შვილო! - და ლექსი მიაწოდა, თვითონ კი ისევ გულში უელავდა ილიას სიტყვები, - „უიმედო სიყვარული“. - კარგად უთქვამს ილიას... - ეკატერინეს თვალწინ წარმოუდგა მამა, წარსული ცხოვრების ჭირი და ლხინი ირეოდა ცნობიერებაში.

სალომემ ლოყა დედის ცხელ ლოყას მიაღო და გაინაბა.

ეკატერინეს ხშირად უცრემლებდა თვალებს სამშობლოდან გასახლება. 1857 წელს მთავრობამ ეკატერინე აიძულა განშორებოდა თავის სამთავროს და პეტერბურგში ეცხოვრა ოჯახითა და ამალით. სალომეს

ეგონა, დედა ახლაც ამას დასტიროდა და გული გაუკეთა:

- არა უშავს, დედა, აქ ვიცხოვროთ, ამაზე ნულა სტირი! ეკატერინემ ცრემლი მოიწმინდა, თმები გაისწორა და სტუმრებთან გავიდა. უკან სალომე გაჰყვა. ცუდ დროს შევიდა ოთახში, ილია „თავადის ჭ . . . ის ასულ ეკ . . . ნას“ კითხულობდა. სახეზე ცეცხლი მოეკიდა ...

ილია ადვილად მიუხვდა წუხილს, თვითონაც განითლდა და ოდნავ გაიღიმა.

- ქალბატონო, გამიგონია, თქვენ ჩონგურს ჩინებულად უკრავთ, ეს ლექსი არ დაგიმღერებიათ?

- როცა დარდი არ მქონდა, ვმღეროდი, მაგრამ ახლა არ მემღერება.

- რას იზამთ, ჩვენ არავის გვემღერება, მაგრამ მაინც ვმღერით, სიმღერა დარდსაც აშუშებს! - მიუგო ილიამ, ისე, რომ ბარათაშვილის წიგნაკებისათვის თვალი არ მოუშორებია. თავისი შავყდიანი უბის წიგნაკი ამოიღო, „ფიქრი მტკვრის პირას“ და „საყურე“ გადაიწერა.

კობტამ თვალი მიადევნა კალამს.

ამ ხელნაწერების გაცნობის შემდეგ დაიწერა ილიას „მტკვრის პირას“.

და, კობტა აფხაზის მოგონებაც, რომელიც მან მოხუცებულობის უამს დაწერა, ამ პირველ შეხვედრას ეკუთვნის, ალბათ.

„ვინ წარმოიდგენთ, რა შთაბეჭდილება მოახდინეს ამ ლექსებმა ილიაზე. თითქმის მთელი ერთი კვირა ყმანვილი ბოლავდა ბარათაშვილით.“

ეკატერინეს ეგონა, ბარათაშვილი მარტო მას უყვარდა, მისი ლექსები მარტო მას მოსწონდა. მაგრამ აი, ილია პირველი შეხვედრისთანავე მოიხიბლა, ვერც კობტა აფხაზი მალავდა აღფრთოვანებას.

- დედოფალო, ცოდვია ეს საუნჯე ცხრაკლიტულში რომ გიდევს! - შეჰბედა კობტამ.
- მაცალე, კობტავ, მაცალე! - უთხრა ილიამ. უკანასკნელი სტრიქონიც ჩაათავა და განაგრძო: - დედოფალს დიდი მადლობა, რომ ეს საუნჯე შემოგვინახა. ამ სამსახურს საქართველო არასოდეს დაივინცებს!

დედოფალს ტუჩებზე წუთიერმა ღიმილმა გადაურბინა.

- ამასწინათ გრიგოლ ორბელიანი მესტუმრა, მთხოვა ტატოს ლექსები წამიკითხეო. ვიცი მისი გულის ამბავი, როცა ტატო გარდაიცვალა, გრიგოლი ელდისაგან ავად გახდა, მაგრამ ძალიან შემომეხვევნა და წავიკითხე. იტირა გრიგოლმა, ამ ლექსების გამოცემას თავი ვერ დავადგითო, ფულიც კი შევაგროვეთ, მაგრამ საქმეს მაინც საშველი არ დაადგაო. ეხ, დაუდევრობა, დაუდევრობა, ნანობდა გრიგოლი.

- სანანებელიც აქვს, დისწულისათვის უნდა მოევლო! -
ვერ მოითმინა კოხტამ.

ილიას არათფერი უთქვამს, ხელები მაგიდაზე ჩამოაწყობს და იმ ჯადო წიგნაკებს უყურებდა, რომლებიც მის წინ იდო. გულმა გული იცნო: ილია მთელი არსებით ახლა ნიკოლოზ ბარათაშვილთან იყო, თავის დიდ წინაპარს „ქართლის ბედზე“ თუ ესაუბრებოდა.

იმ საღამოს, ილია რომ შინ დაბრუნდა, ამხანაგებს უთხრა: „როს წარვიკითხე მისი ლექსები, ვერარა ვთქვი რა განცვიფრებულმა“.

პავლოვსკში ყველას ეძინა, არ ეძინა მხოლოდ ილიას. იგი მაგიდასთან იჯდა და წუხდა. ეკატერინე ჭაჭაჭაძესთან, მართალია, „ვერა რა თქვა განცვიფრებულმა“, მაგრამ თავის ოთახში იქ უთქმელი სიხარული ლექსში გაამუღავნა.

როს წარვიკითხე მისი ლექსები,
ვერა რა ვსთქვი რა განცვიფრებულმა!..
ვით ქარიშხალით ატეხილ ბუქმა
ცას განუბნივოს შავი ღრუბლები,
ისე იდარა ჩემ მწუხარ შუბლმა!
ხალხო ობოლო, შენ მებრალეები,
რომ დაგაობლა მის ციურ შუქმა
და განგაშორა თვისი სხივები!..
როს წარვიკითხე მისი ლექსები,
აღმოვიკვნიესე დაობლებულმა!..

როცა პეტერბურგის ქართველ სტუდენტებში ილია გატაცებით ლაპარაკობდა ბარათაშვილის საოცარ ნიჭსა და პოეზიაზე, პოეტის უბედური მამა სიცოცხლეს ესალმებოდა... ვინ გაიხსენებდა მას, ბედნიერ ვარსკვლავზე დაბადებული შვილი რომ არ ჰყოლოდა?!

ბარათაშვილმა ილიას თვალი აუხილა და გული გაუხსნა. ილიამ პირველმა სწორად განსაზღვრა ბარათაშვილის შემოქმედების მნიშვნელობა ქართველი ერის ცხოვრებაში. მანვე მიუთითა პოეტის საკაცობრიო ხასიათზეც.

„ნიკოლოზ ბარათაშვილმა ჩვენს აზრს, - წერდა ილია, - ჩვენს გულისთქმას, ჩვენს ჭკუა-გონებას დიდი განი და სიღრმე მისცა, კაცობრიობის წყურვილს ქართველიც თანამოზიარედ გაუხადა და კაცობრიული წყურვილის მოსაკლავ წყაროს ქართველიც დაანათა“.

ილიამ ცოტა როდი იბრძოლა და იშრომა ბარათაშვილის ნაწარმოებთა გამოსაქვეყნებლად. მან ამ დიდი პოეტის არა თუ ლექსებს, არამედ ბარათებსაც მოუყარა თავი. ილიამ თავისი დისა და სიძის ოჯახში აღმოაჩინა ბარათაშვილის ოთხი წერილი, მიწერილი მაიკოსადმი. ეს მონაპოვარი მაშინვე გადაუგზავნა „კრებულის“ რედაქციაში კირილე ლორთქიფანიძეს და მისწერა:

„ძმაო კირილე! გიგზავნი ბარათაშვილის წიგნებს. შენ იცი და შენმა რიგიანობამ, როგორც კარგად, შეუძლებლად და შეუმცდარად დაჰბეჭდავ. მართლწერა და ნიშნების ხმარება სრულად და შეუმცდარად დედანისა არის და აგრეთვე უნდა დაიბეჭდოს. საკვირველია, რომ ჩვენგან გაკიცხულს ასოებს არც ნიკ. ბარათაშვილი ხმარობს მაგრე რიგად. ჰსჩანს მაგ ასოებს არც ის ეწყობოდა. შესანიშნავია“.

ეკატერინე ჭავჭავაძისეული ბარათაშვილის ავტოგრაფ-კრებულები ილიას შემდეგ, ვინ იცის, კიდევ ვინ წაიკითხა. მოხუც დედოფალს ისინი ბოლო წლებში ალბომებთან ერთად ეწყო მაგიდაზე, ქართველი სტუმრები ამ საუნჯეს ენათებოდნენ, მაგრამ შემდეგ უკულმა დატრიალდა ავტოგრაფების ბედი... წიგნმა შავ ბაზარში ამოყო თავი. იქ ქართულ სიძველეთა მფარველმა მოუსწრო... ეს საუნჯე ამჟამად დაცულია საქართველოს მეცნიერებათა აკადემიის ხელნაწერთა ინსტიტუტში. ორივე კრებულს მინწერილი აქვს: „ვიყიდე 1887 წელს პეტერბურგში; ბუკინისტ პ. ი. ვორონინისაგან, ნევის პროსპექტზე N54. ე.თაყაიშვილი“.

აკაკი

თბილისში, რუსთაველის პროსპექტზე, ყურადღებას იპყრობს მაღალ კვარცხლბეკზე მდგარი ილიას და აკაკის ქანდაკება. აკაკი და ილია იმ შფოთიან დროში ათეული წლების მანძილზე ერთად იბრძოდნენ, ერთად ეწეოდნენ საზოგადო მოღვაწის მძიმე უღელს.

ვერც სიკვდილმა დააშორა ისინი ერთმანეთს.

დღესაც ამაყად დგანან თბილისის მთავარ პროსპექტზე. ამ ორი დიდი ადამიანის მეგობრობას დიდი და გრძელი ისტორია აქვს.

აკაკი პეტერბურგში რომ ჩავიდა, იმ წელიწადს ილია იქ კავკასიელთა შორის ცნობილი კაცი და ქართველ სტუდენტთა სათვისტომოს აღიარებული ხელმძღვანელი იყო.

„ქართველ სტუდენტებს, - წერს ნიკო ნიკოლაძე, - რომელთაც ხელმძღვანელობდა ილია ჭავჭავაძე, ძველი ქართული წიგნებისა და ხელნაწერების კარგა გვარიანი კოლექცია შეეგროვებინათ და თავზე ევლებოდნენ მას. ესენი ამტკიცებდნენ, რომ მიზანშეწონილია დაარსდეს რამდენიმე კავკასიური სათვისტომო - ქართველების, სომხების, ლეკების და სხვათა, და მათ შორის უნდა დამყარდეს მჭიდრო კავშირიო... ამ აზრმა გაიმარჯვა კიდევ“.

აკაკიც ამ წრეში მოხვდა და თავის თანამემამულეს

ადვილად დაუმეგობრდა.

ილიას უკვე დანერვილი ჰქონდა „აჩრდილი“, „გლახის ნაამბობი“, „კაცია ადამიანი?!“, მრავალი ლექსი. ამ ნაწარმოებებს ქართველები ხარბად ენათვებოდნენ, დედანშივე კითხულობდნენ, ლექსებს კი თავის უბის წიგნაკებში ინერდნენ.

სხვებს, რასაკვირველია, არც აკაკი ჩამორჩა, „აჩრდილი“ დედანში გაიცნო.

ილიამ სამშობლოს სევდა უფრო მწვავედ განიცადა მას შემდეგ, რაც ბარათაშვილის პოეზიას ეზიარა. ბარათაშვილმა გადაძალა ახალგაზრდა ილია, ოცნებით არაგვის პირას წაიყვანა, არაგვი - წმინდა ქართული მდინარე - პეტერბურგში მიმავალ ახალგაზრდებს დიდხანს მიაცილებდა და თანაც ქართლის ბედზე ეჩურჩულებოდა.

ბარათაშვილმა მჩქეთარე არაგვი დაგვიხატა, ილიამ კი ამ მდინარეს უფრო სევდიანად მიმართა:

გულ-ხელთ დაკრეფით შენსა წმინდა წყალს
 რამდენჯერ ტანჯვით ვადევნებდი თვალს!..
 რას ვეძებდი მე? ჩემ ქვეყნის წარსულს,
 შენ-წინ დაღუპულს ჩემს ძველსა მამულს, —
 და მარტო სისხლი ჩემს თვალს დაღალულს
 აძლევდა ხოლმე გულსაკვდავ პასუხს.

„აჩრდილის“ ნაწყვეტის „ცისკარში“ გამოქვეყნების შემდეგ, იმავე ჟურნალში, დაიბეჭდა აკაკის ლექსი „ამაო ძებნა“. ეს ლექსი ილიას „აჩრდილის“ გამო რომ არის შექმნილი, ამაზე თავის დროზე მიუთითა მათმა საერთო მეგობარმა კირილე ლორთქიფანიძემ, რომელიც კრებულ „ჩანგურის“ შესახებ დაწერილ ცნობებში აღნიშნავს „აკაკის ნაწარმოები („ამაო ძებნა“, კ.გ.) ჭავჭავაძის არაგვის გამო არის დაწერილი“.

აკაკის ეს ლექსი არის ერთგვარი პოლემიკური გამოსხაურება.

მწერლობაში თვის შესდგმის დღიდანვე ილია და აკაკი გულმოდგინედ აღევნებდნენ თვალყურს ერთმანეთის შემოქმედებას. „ამაო ძებნის“ გამოქვეყნების შემდეგ გავიდა ორიოდე წელი, ილიამ უკან მოიხედა, განვლილ ლიტერატურულ ცხოვრებას თვალი გადაავლო, „ცისკრის“ ძველი ნომრები მაგიდაზე დაილაგა და კრიტიკული წერილისათვის მასალების ამოკრეფას შეუდგა. მან ჩაინიშნა აკაკის ნაწარმოებები: „პ; წ-ს“, „ამაო ძებნა“. ორივე ლექსი ახლა უფრო მოეწონა და მიაწერა: „კარგია“.

აკაკი კიდევ ერთხელ გაეჰაეჭრა ილიას. ამჯერად ისინი ერთმანეთს შეეცილნენ ქართველ სტუდენტთა შეფასებაში. როგორც ცნობილია, „ქართველი სტუდენტების სიმღერა“ მრავალჯერ გადააკეთ-გადმოაკეთა ილიამ. ამ ლექსის მეორე ვარიანტი მიუღვ-

ნა სოსიკო ვაჩნაძეს. სოსიკო ილიას ახლო მეგობარი იყო, იმ დროს პეტერბურგში აპირებდა წასვლას სწავლის გასაგრძელებლად. ამის თაობაზე მან ილიასაც მისწერა.

ილია ანიკო ვაჩნაძისადმი გაგზავნილ ბარათში აღნიშნავს: „სოსიკო მწერდა, რომ ვაპირებ რუსეთში წამოსვლასაო, არ იქნება ურიგო, რომ წამოვიდეს, ხომ იცი, საყვარელო დაო, რომ სწავლისთანა ამ ქვეყანაში გამოსადეგი არა არის რა. მაშასადამე, ცოდვა არის სწავლის მსურველს არ მისცენ საშუალება“.

ამ დროს უკვე ილია სწავლაში დანინაურებული, გამოცდილი სტუდენტი იყო და გულითადი მეგობრის ჩამოსვლა ძალიან გაუხარდა. ეს სიხარული მან გამოხატა „ქართველ სტუდენტების სიმღერაში“. ვაჩნაძის პეტერბურგში ჩასვლა ილიამ ამ მშვენიერი ლექსით აღნიშნა. ამ ნაწარმოებში ილიამ უმღერა იდეალურ ქართველ სტუდენტებს, ღირსეულ მამულიშვილებს, რომლებიც, მიუხედავად სიღარიბისა, თავგამოდებით ენაფებოდნენ მეცნიერებას, რომ ერისთვის გამოსადეგი მოქალაქენი გამხდარიყვნენ.

აკაკი ამ ლექსს რომ გაეცნო, არ დააყოვნა და მაშინვე გაეპასუხა. პასუხი ძალიან მკაცრი, პაროდიული გამოუვიდა.

ილია თავის ლექსს ასე იწყებს:

დედამ რომ შვილი გაზარდოს, —
ემაგრე ჩვენისთანაო;
ძმურად გამოსადეგნი ვართ
ყველგან და ყველასთანაო.

აკაკი კი პასუხობს:

დედამ რომ შვილი გაზარდოს
და მერე თქვენისთანაო?!
ნაცარქექია რამა ხართ
ყველგან და ყველასთანაო.

და ასე ბოლომდის.

კირილე ლორთქიფანიძემ „სტუდენტების სიმღერა“ უბის წიგნაკში ჩაიწერა და სადაც ახლობელს შეხვდებოდა, ყველას აკითხებდა. ეს ლექსი მან აკაკის უჩვენა. აკაკიმ წიგნაკი გამოართვა. თვითონ წაიკითხა და თქვა:

- რას ამბობს ეს კაცი, ასეთი კარგი სტუდენტი განა გვყავს?

და იქვე ექსპრომტად ეს პაროდია თქვა. ბევრი დაეთანხმა პოეტს. ილიას მორიდებით გადასცეს პაროდია.

- რას იზამთ, სარკეს ორი მხარე აქვს, წინა მხარე ბრწყინავს, ბრჭყვიალებს, მე სტუდენტების ეს მბრწყინავი მხარე მედგა თვალწინ, როცა ვწერდი. აკა-

კიმ კი სარკის უკანა მხარე დაინახა, რომელიც ბუნებით შავია და შავადაც უმღერა! -დამშვიდებით თქვა ილიამ, რადგან მან კარგად იცოდა ვის წინააღმდეგაც იყო მიმართული აკაკის ეს გესლიანი პაროდია.

აკაკის სიცოცხლეში ეს პაროდია არ გამოქვეყნებულა. მისი გარდაცვალების შემდეგაც დიდხანს ინახებოდა მუზეუმში.

პეტერბურგის უნივერსიტეტში შესვლის პირველსავე წელს ილიამ დაწერა „ხმა სამარიდამ“. ამ ლექსში ცხოვრების მანკიერი მხარეებია მხილებული. ლექსი შექმნიდან ოთხი წლის შემდეგ დაიბეჭდა „საქართველოს მოამბეში“. ეს ნაწარმოები აკაკიმ გულდასმით გაარჩია თავის წერილში და აღნიშნა: „ამ ლექსში ოცნებას კი ვერა ვხედავთ, მაგრამ ყოველდღიურს ჭეშმარიტებას, ჩვენს ნაკლოვანებას და ჩვენს საჭიროებას ვხედავთ და ამისთვის მოგვწონს პოეტი, ამაში მდგომარეობს მისი მაღალი ღირსებაც“.

ახალგაზრდა აკაკი ილიას პირველი შემთავსებელი და მეგობარი იყო. აკაკიმ გაბედულად შეადარა ილია ჭავჭავაძე ნიკოლოზ ბარათაშვილს: „ჭავჭავაძე არის ბარათაშვილის მოკანანახე და მისი დიდი ღირსებაც ამაში არის დაფუძნებული. ყოველს მის ლექსში ხედავთ ქართველების ტანჯვასა და გოდებას“.

1864 წელს პეტერბურგში კირილე ლორთქიფანიძემ

გამოსცა ქართველი პოეტების ლექსთა კრებული „ჩანგურის“ სახელწოდებით. ჩანგურში მოთავსებული იყო ნიკოლოზ ბარათაშვილის, ილია ჭავჭავაძის და სხვათა თხზულებები. ერთი წლის შემდეგ „ცისკარში“ აკაკიმ „ჩანგურზე“ მოათავსა ვრცელი წერილი და გულდასმით გაარჩია ბევრი ნაწარმოები. დაწვრილებით განიხილა ილიას ლექსებიც და პირუთვნელად შენიშნა: „თუ ჭავჭავაძის ლექსებში მარტო ხელოვნებას მივაქცევთ ყურადღებას, მაშინ მის ლექსებს არ ექნებათ დიდი ღირსება. მაგრამ ჩვენ მარტო ხელოვნებას არ ვეძებთ (ხელოვნურად ნათქვამი სისულელე და ოცნება იქნება); ჩვენ ვეძებთ ჭკვიან აზრებს და მას კიდევ ვპოულობთ ჭავჭავაძის ლექსებში“.

აკაკი აღფრთოვანებულია ილიას პროზაული ნაწარმოებებით და წერს: „ჩემის აზრით მისი „კაცია აღამიანი?!“ და „გლახის ნამბობი“ - ობოლ მარგალიტებად რჩებიან ჩვენს ლიტერატურაში“.

აქ უადგილო არ იქნება კიდევ ერთი ამონაწერი მოვიყვანოთ აკაკის სტატიიდან. აკაკი მკაცრად მიმართავს „ყოვლისმცოდნე სწავლულებს“ და წერს: „მისთვის შევეხე აქ ჭავჭავაძეს და ბარათაშვილს, რომ ეგება ჩვენმა განათლებულმა სწავლულებმა, რომელთაც ჯიბეში ხელი ჩაუწყვიათ და დაცინების მეტს არას აკეთებენ, ეგება იმათ მოჰკიდონ კალამს ხელი და კრიტიკულად გაარჩიონ ჩვენი მწერლები. თუმცა ბევრ-

ჯერ გამიგონია იმათგან, რომ ჯერ უნდა იყოს რამე, რომ მერე კრიტიკოსი გამოჩნდეს და დასწეროს მისი განხილვაო. მაგრამ ეს სულ ტყუილი თვალის ახვევა არის: ის კაცი, რომელსაც წინ უდევს რუსთაველი, ბარათაშვილი და ჭავჭავაძე, სტყუა ამ სიტყვებით, არათფერი გვაქვსო! სწავლულეხო, მოგვხედეთ! რა არის ეს გულისშემზარებელი თქვენის მხრით გულგრილობა? გვიჩვენეთ გზა და კვალი და თუ ვერ გამოგყვეთ, მაშინ დაგვცინეთ და მაშინ შეგვრისხეთ!“.

აკაკი ყოველთვის მხარში ედგა ილიას და მისი ჭირისა და ლხინის მოზიარე იყო. ახალ და ძველ თაობათა ბრძოლის წინა ხაზზე ილიას გვერდით აკაკიც იბრძოდა.

1875 წლის გაზაფხულზე სითბომ ერთბაშად ააყვავა თბილისის ბაღები, მაგრამ მარტო ამით კი არ იყო წლის ეს ღრო კარგი და სამახსოვრო, ბუნების ამ გამოღვიძებას დაემატა ქალაქის ლიტერატურული ცხოვრების ფეხზე წამოდგომაც. გაიმართა პირველი ლიტერატურული საღამო - აკაკი ჩამოვიდა ქუთაისიდან, ილია აქ დაუხვდა, „დროებამ“ საგანგებო მეთაური მიუძღვნა მწერალთა ამ მეჯლისს.

„ნამდვილი დამამშვენებელი და გამაცოცხლებელი ამ საღამოსი, - წერს რეცენზენტი, - იყვნენ აკაკი წერეთელი და ილია ჭავჭავაძე. ჩვენ იშვიათად გაგვიგონია ისეთი ოსტატური და ხელოვნური წაკითხვა,

როგორც აკაკიმ თავისი „ადვოკატის დილა“ და „სცენა საპყრობილეში“ წაიკითხა, ი. ჭავჭავაძემ - თავისი „კაცია ადამიანის“ ერთი ალაგი და გრ. ორბელიანის „დ. ო-ვის დარდები“.

ილია აკაკის ყოველთვის პატივისცემით ეპყრობოდა, ერთ-ერთი თავგამოდებული დამფასებელი იყო მისი პოეტური ღვაწლისა. როცა აკაკი კახეთს ეწვია, კახელები თავიანთ სათაყვანო მგოსანს დიდი სიყვარულითა და პატივისცემით შეხვდნენ. აკაკის კახეთში მოგზაურობას ილიამ მშვენიერი წერილი მიუძღვმა.

“საცა წავიდა ბ-ნი აკაკი, წინ დახვდა მისგან ფრთაასხმული და გაღონიერებული სიყვარული საქართველოსი და ქართველისა, წინ დახვდა გულწრფელის პატივისცემითა და მადლიერობით აღსავსე გულითა. აგრე თვითონვე იგემა ბ-ნმა აკაკიმ ნაყოფი თავის დანერგულისა და დათესილისა.”

ჩვენ ესეთი მიღება ბ-ნ აკაკი წერეთლისა აღვნიშნეთ, როგორც სანუგეშო ამბავი, როგორც სასიხარულო მაგალითი და ნიშანი ჩვენის ცხოვრების წარმატებისა. მაგრამ ამ შემთხვევაში ერთი ფრიად შესანიშნავი საგანიც არის. ეგ არის სიტყვა აკაკი წერეთლისა, თქმული თელავში კახელების წინაშე. ამაზედ მშვენიერი სიტყვა ჩვენ არ გვახსოვს ქართულს ენაზედ. კითხულობთ და გიკვირთ, გიკვირთ და კითხულობთ. არ

იცით, რა რას დაამჯობინოთ, სიტყვა აზრს, თუ აზრი სიტყვას, - ისე შეზავებულია, ისე შეხამებულია, ისე შეხორცებულია სიტურფე სიტყვისა აზრის მშვენიერებასთან. ყოველი წესი ორაქტორის ხელოვნებისა დაცულია და ხმარებული, რომ სიტყვამ ისე გასჭრას, როგორც მთქმელს განუზრახავს, და აზრმა და გრძნობამ იმ გზით მიაღწიოს დანიშნულ ადგილამდე, როგორც მთქმელს სურვებია.”

აკაკიმ პირველმა აღიარა ილია ახალი თაობის მეთაურად და საზოგადო პორიზონტზე მისი გამოსვლა მოკუპრულ ცაზე ცისარტყელას გამოჩენას შეადარა.

„ბარათაშვილის შემდეგ ლექსებს ბევრი სწერდა, მაგრამ რაგვარს; ზოგი ლოცვებს, ზოგი მოღებს, ზოგი რას. მაგრამ იმათი მღერა, რასაკვირველია, ჩხავილი იყო და არა სტვენა, რადგანაც თვითონაც არ ბრძანდებოდნენ ბულბულები... ყოველს მის ლექსში ვხედავთ ქართველების ტანჯვას და გოდებას... ილიას ერთი სტრიქონს არ გავცვლი, - დასძენს აკაკი, - ფუთობით რომ მიბოძოთ ჩვენი ბულბულების ნაწერები, რომელშიაც მეტი პოეზიაც იქნება და რითმებიცა... ჩვენ ვეძებთ ჭკუის აზრებს და ამას კიდევ ვპოულობთ ი. ჭავჭავაძის ლექსებში“.

1882 წელს აკაკის შეუსრულდა სალიტერატურო მოღვაწეობის მეოთხედი საუკუნე. ეს თარიღი საზოგადოებამ ფართოდ აღნიშნა და ილიამაც „ივერი-

აში“ დაბეჭდა წერილი, მხურვალედ მიესალმა თავის თანამოღვაწეს და მეგობარს:

აკაკი „ტკბილის გრძნობიერების სიტყვით, - წერს ილია, - ამ ოცდახუთსწელიანდში ატკობდა ქართველის ყურს, აუხიზლებდა გონებას და ჰმართავდა ქართველის გულს ქართველისა და საქართველოს სიყვარუ-



ლისათვის“.

შემდეგ წერილში ილია უფრო მკაფიოდ, უფრო ალტაცებით მიმართავს:

„გაუმარჯოს აკაკი წერეთელს, რომლის სამსახურს და ღვაწლს ქართველი გულში ჩაირჩენს სამუდამო სახსოვრად და რომლის მშვენიერის ლექსებით არაერთხელ დაიტკობს ყურსა და გრძნობას და არაერთხელ გულს მოიციმს მამულის სიყვარულისათვის“.

1909 წელს პეტერბურგში სახელმწიფო საბჭოს არჩევნებზე რეაქციონერებმა გაიხსენეს ილია ჭავჭავაძე რომ კრიჭაში ედგა მთავრობას და თქვეს, შევცდით, რომ ასეთი კაცი ავირჩიეთ და ახლა მაინც არ გავიმეოროთ ეს

შეცდომაო.

რეაქციონერთა აშკარა შემოტევამ გააგულისა მიხეილ მაჩაბელი, რომელიც საბჭოთა არჩევნებში მონაწილეობდა და საჯარო სიტყვაში ილიას მონინააღმდეგეს საკადრისი პასუხი გასცა.

იმ დროს აკაკი პარიზში იმყოფებოდა. გაზეთში მაჩაბლის ეს სიტყვა რომ წაიკითხა, გაუხარდა ილიას მძაგებლებმა ღისეული სილა რომ მიიღეს და მაჩაბელს მისწერა: „ძმაო მიშა, ჩემ ხანგრძლივ სიცოცხლეში ბევრჯერ არ დავმტკუბარვარ სიამოვნებით და ერთი იმ წამთაგანი მერგო, როცა წავიკითხე შენი სიტყვა „სახელმწიფო რჩევაში“ წარმოთქმული; რომ სიტყვა აღარ გავაგრძელო, გადაგეხვევი და გადაგკოცნი სიყვარულით“.

სამეგრელოში მოვედი და საქართველო ვნახე

1885 წელს ქართველთა შორის წერა-კითხვის გამავრცელებელმა საზოგადოებამ, ივანე მაჩაბლის სიტყვით რომ ვთქვათ, „მართლაც მეფური შეწირულება მიიღო“. ეს იყო სამეგრელოს სამთავროს უძველესი ხელნაწერებისა და წიგნების მდიდარი ბიბლიოთეკა.

სამეგრელოს მთავრის ოჯახში წიგნი უყვარდათ, დიდი და პატარა სიამოვნებით ეტანებოდა ქართულ წიგნებსა და ხელნაწერებს. მწიგნობრების ოჯახში რძლად ალექსანდრე ჭავჭავაძის ქალიშვილი ეკატერინე რომ შევიდა, მასაც მზითევში დიდძალი წიგნი და მშვენიერი ხელნაწერი „ვეფხისტყაოსანი“ მოჰყვა. ეკატერინე თვითონ იყო ლიტერატურით გატაცებული, ლექსებსაც წერდა, დაქვრივების შემდეგ, რუსეთსა და უცხოეთში ყოფნისას, ბევრი წიგნი შეიძინა და ზუგდიდის ისედაც მდიდარი ბიბლიოთეკა კიდევ უფრო გაამდიდრა.

ბიბლიოთეკის მოწყობით განსაკუთრებით თავი ისახელა მთავარმა დავით დადიანმა, მან უძვირფასესი ხელნაწერებისა და ისტორიული ნივთების მთელი მუზეუმი შექმნა, რომელიც ზუგდიდის სასახლის მშვენიერებას წარმოადგენდა.

1854 წელს, ომარ ხანის მეთაურობით სამეგრელოში თურქთა ურდო ასაკლებად რომ შემოიჭრა, ძვირფასი ბიბლიოთეკა უშიშარ ადგილას - გორდის სასახლეში გადაიტანეს და შემდეგ უკან აღარ დაუბრუნებიათ.

ეკატერინე ჭავჭავაძის შვილი ნიკო დადიანი ევროპულად განსწავლული იყო, კარგად იცოდა ქართული, რუსული, ფრანგული, გერმანული და სხვა ენებიც, თავისი ოჯახური მდგომარეობით გადაგვარებას არათფერი აკლდა, მაგრამ გული მაინც ქართული ჰქონ-

და და მამულისადმი სიყვარულით უძგერდა.

ნიკო დადიანი პეტერბურგში ცხოვრობდა, უგანათლებულეს თავად „მინგრელსკად“ წოდებული, იმპერატორის ამალის დიდებით მოსილი გენერალი იყო.

ნიკომ რომ გაიგო ქართველთა შორის წერა-კითხვის გამავრცელებელი საზოგადოების დაარსება, დახმარების ხელი გაუწოდა და თავისი მამის, დავითის ხსენებული ბიბლიოთეკა საჩუქრად გადასცა. იმ ხანებში ეს ბიბლიოთეკა მთელ საქართველოში ყველაზე მდიდარი გახლდათ. „თუ ამ ჩემის ბიბლიოთეკის შეწევნით, წერს ნიკო დადიანი, წერა-კითხვის გამავრცელებელი საზოგადოება მოუტანს რაიმე სარგებლობას ჩვენს სამშობლოს, მით შევრაცხ თავს ბედნიერად.“

ეს განძი ქართველი ხალხისათვის ძვირფასი საჩუქარი იყო. ილიამ საბაბი იშოვნა, არ დააყოვნა და სამეგრელოში გაემგზავრა. ჩამბარებულ კომისიაში შედიოდნენ: ვასილ მაჩაბელი (ნიკო დადიანის ახლო მეგობარი, რომელსაც მასთან ამ საგანზე მიწერ-მონერა ჰქონდა), დავით ერისთავი, სამსონ ყიფიანი, გიგა ყიფშიძე, იონა მეუნარგია და სიმონ ღოღობერიძე, ხოლო ილია გახლდათ ამ კომისიის თავმჯდომარე და ხელმძღვანელი.

ილია ჭავჭავაძის და მისი მეგობრების სამეგრელოში გამგზავრება ნაჩუქარი ბიბლიოთეკის ჩაბარებაზე უფრო დიდ მიზანს ისახავდა. მაშინ შავბნელი ღრო იყო, ცარიზმის აგენტებმა და მათგან მოსყიდულმა ადგილობრივმა შავ-

რაზმელებმა, ხალხის სურვილის წინააღმდეგ, სამეგრელო-სამურზაყანოს სკოლებიდან ქართული ენის განდევნის საკითხი დააყენეს. ყველაფერი აირდა-ირია, დაიწყო ახალი სახელმძღვანელოების შედგენა. ხალხს ვინ უგდებდა ყურს, თუმცა, ქართულმა გაზეთებმა ხალხს მხარი დაუჭირა და სასტიკად გააკიცხა ამ საქმის მესვეური, მაგრამ აქ ხმა აღიმალლა ცენზურამ და გაზეთებში ამ საკითხებზე წერა აუკრძალა.

ასეთი გაჭირვების დროს, სამეგრელოს სოფლებსა და ქალაქებში ილიას მოგზაურობას, ხალხთან შეხვედრას, სკოლების დათვალიერებას მეფის მოხელეთა ზრახვების ჩასაშლელად უდიდესი მნიშვნელობა ჰქონდა. ილიამ იცოდა, რომ დაგეშილი პოლიცია ფეხდაფეხ დასდევდა, სამეგრელოს სკოლების მდგომარეობის გასაცნობად, საგანგებოდ წასვლა შეუძლებელი იყო. ამიტომ, ბიბლიოთეკის ჩაბარების საბაბი სწორედ ხელსაყრელი გამოდგა.

სანამ ილია და მისი მხლებლები გორდში ჩავიდოდნენ, აკაკი წერეთელი იქ დიდი ხნით აღრე ჩასულა, მთელი ბიბლიოთეკა აღუწერია და კატალოგებიც შეუდგენია. კომისია რომ ჩავიდა, მოსამზადებელი სამუშაოები უკვე ჩატარებული იყო, ჩაბარება გაუადვილდათ, განძი ცხენებს აჰკიდეს და ქუთაისისაკენ გზას გაუყენეს სამსონ ყიფიანმა, გიგა

ყიფშიძემ და სიმონ ლოლობერიძემ.

რაკი განძი გაგზავნა, ილია შეუდგა სამეგრელოს უფრო ღრმად გაცნობას, ხშირად ქვეითად ირჩევდა სიარულს, გზადაგზა გლეხებს ესაუბრებოდა, ხან ერთ ჭიშკრთან შედგებოდა, ხან მეორესთან, ათვალიერებდა კონინდრით გადამწვანებულ ვზოებს, ბაღებს, ოდასახლებებს.

ილია მისმა მეგობარმა მექი თვალავამ დაპატიჟა ბანძაში, სადაც ილია ებრაელებსაც ესაუბრა, გამოჰკითხა ვის რა უჭირდა, ვის რა ულხინდა.

მექი თვალავა ქუთაისში მუშაობდა, ცნობილი იურისტი იყო და ბანძაში კარგა გამართული სახლ-კარი ჰქონდა. მწერლები და საზოგადო მოღვაწეები ქუთაისიდან ხშირად მოჰყავდა აქ და უხვ სუფრას უშლიდა.

ილიას ჩამოსვლა მან ქუთაისში გაიგო, მაშინვე გამოსწია ბანძაში, სამეგრელოს სასურველ სტუმარს გულისა და სახლის კარი ღირსეულად გაუღო.

თვალავას ეზოში ილია ცხენით შევიდა, მას მიეგება ნიკოლოზ დადიანი, ცხენიდან ჩამოიყვანა და გულში ჩაიკრა. ილიას პატივისცემად გამართულ ნადიმს ესწრებოდა ნიკოლოზ დადიანის შვილი შალვა დადიანი. შალვა ახალგაზრდა იყო, სუფრის ბოლოს მორცხვად იჯდა და ილიას თვალს არ აშორებდა. ბევრი რამ განიცადა და ნახა შალვამ იმ ლხინში და მერე კალმის ერთი მოსმით აღწერა მოგონებებში „ჩემი მა-

რაო“.

გორდსა და ბანძაში ილიას ყოფნისას იონა მეუნარგიას მამა, მიხეილი, სუფრის თადარიგს იჭერდა ცაიშში. მიხეილი ცაიშის საკათედრო ტაძრის დეკანოზი იყო, შეძლებული ოჯახი ჰქონდა, ილიას ახლოს იცნობდა, „ივერიაში“ თანამშრომლობდა. განიზრახა ილიასთვის შესაფერისი პატივი ეცა, ყოველნაირი ღვინო ჰქონდა, არც ფრანგული შამპანური აკლდა, მაგრამ „ოჯალეშზე“ ნაკლებად იყო და ისიც სოფელ ჭკადუაშიდან გამოგზავნა სალომე დადიანმა, მიურატის მეუღლემ.

სალომეს ბავშვობის შემდეგ ილია არ უნახავს, ახლა მეფი ფალავას სახლში შეხვდა და გაიხარა. მოიგონეს პეტერბურგი, ნიკოლოზ ბარათაშვილის ლექსების გადანერა. უკვე დაქალაქებული სალომე ბევრ რამეში ჰგავდა ულამაზეს დედას - ეკატერინე ჭავჭავაძეს. ილიამ ეს მსგავსება ხელად შეამჩნია, მოსწონდა თავისი გვარის შვილი ასეთი ლალი და თვალადი რომ იყო, მაგრამ ის არ მოსწონდა, სალომე რომ მისთხოვდა ნაპოლეონ მესამის ნათესავს მიურატს. მისი შესაფერისი ქართველი კაცი ქვეყანაზე არ აღმოჩნდაო? - ფიქრობდა გულში.

სალომე ვერსალის სასახლეში დედასთან ერთად ცხოვრობდა, იქ დაუმეგობრდა თავის თანატოლს, ბარონესა ბერტა ფონ-ბუტნერს. ეს ორი ლამაზი ქალიშვილი ბევრ დიდებულს მოსწონდა, ბერტას

ეტრფოდნენ ერეკლე მეორის შვილიშვილი ირაკლი ბაგრატიონი, სამეგრელოს მთავრის ძე ნიკო დადიანი „მინგრელსკი“, თავადი ვიტგენტშეინი და სხვები... ბერტამ საქმროდ ვიტგენტშეინი აირჩია, მაგრამ ამ ვაჟკაცს ბედმა უმტყუნა, უეცრად გარდაიცვალა, ამას დაემატა ბერტას მამის უცაბედი გაღარიბება. ოჯახი ულუკმაპუროდ დარჩა, ბერტა გუვერნანტად დაუდგა ბარონ ფონ-ზუტენერის ოჯახს. ბატონის ოცდახუთი წლის ჭაბუკი არტური ძალიან დაუახლოვდა ბერტას და შემდეგ კიდევაც იქორწინეს. არც ერთის მშობელმა ეს შეუღლება კანონიერად არ ჩათვალა და უჭერო შვილებს სახლის კარი დაუკეტეს. ახალგაზრდები ქუჩაში დარჩნენ, ისევ ეკატერინემ გაუნოდა დახმარების ხელი.

სხვანაირად წარიმართა ნიკო დადიანის ბედი. მან შეირთო მარიამ ალდეღბერგის ასული და მცირე ხნით სამეგრელოში მოინდომა ჩამოსვლა. ეკატერინეს შეებრაღა უსახლკაროდ და ულუკმაპუროდ დარჩენილი ბერტა და არტური და შვილს დაავალა, ზუგდიდში წაიყვანე ესენი, ჩვენს მამულში მოაწყეო. ბარონი არტური დადიანმა თავისი მამულების მმართველად დანიშნა. ბერტასთვისაც გამოინახა სამუშაო - ფრანგულ და გერმანულ ენებს ასწავლიდა წარჩინებულ მეგრელთა ბავშვებს.

ილია გორდს რომ ეწვია, იმ დროს არტური და ბერტა ცაისში იყვნენ და „ვეფხისტყაოსნის“ იონა მეუნარგიასე-

ულ ფრანგულ თარგმანს რედაქტირებას უკეთებდნენ.

ილია ბანძიდან ნოქალაქევისაკენ გაემართა, თვალი მოსტაცა მიკოტახირმა, ავიდა გოჭის ციხეზე, იქიდან გადახედა სამეგრელოს, მერმე ძველ სენაკს ეწვია და ზუგდიდისკენ აიღო გეზი.

ზუგდიდში დიდხანს დააყოვნა, გულდასმით დაათვალიერა მთელი ქალაქი, ბევრ შემხვედრს გამოელაპარაკა. ჩანანერებით უბის წიგნაკი გაავსო.

შემდეგ თავის ძველ მეგობარს იონა მეუნარგიას ეწვია ცაისში.

ილიამ მასპინძელი რომ მიიკითხ-მოიკითხა, მერე ზუტენრებთან შევიდა, მაგიდაზე საბეჭდი მანქანა იდგა, ბერტა მაშინვე წამოდგა, არტური არ ჩანდა, ილია მიესალმა ქალბატონს, მის მეღონით დასვრილ თითებს შეხედა და გაიღიმა:

- გეტყობათ, ბევრს მუშაობთ!
- რა ვქნათ, გვაჩქარებენ.
- მერე როგორ მიდის საქმე?
- კარგად.
- აბა, თქვენ იცით! - ილიამ გადაშლილ-გადმოშლილი ფურცლები აიღო, თვალი გადაავლო და თქვა - ეს ისევ გადასაბეჭდია.
- რასაკვირველია.
- მოასწრებთ კი, ქალბატონო?
- მოვასწრებთ, ბატონ ზიჩის არ დავაბრკოლებთ -

ქართულად მიუგო ბერტამ, თან ჩაეცინა.

ამ დროს იონა შემოვიდა, გადახაზულ-გადმოხაზულ ქალაქლებს თვალი მოარიდა და განითლდა.

ილიას მოეწონა ბერტას ქართული.

- ბარაქლა, ქალო, რა კარგად გისწავლია ჩვენი ენა.
- თქვენ მოსაწონად შეიძლება არ ვიცოდეთ, მაგრამ ვჯახირობთ მაინც.
- ბატონო ილია, მეგრულიც შეისწავლეს, - დაუმატა იონამ, ცოლი და ქმარი ერთმანეთს მეგრულად რომ ელაპარაკებიან, იმის მოსმენას არათფერი სჯობია. ნიჭიერები და მონდომებულები არიან, გენაცვა, რატომაც არ ისწავლიან.

ბევრი სტუმარი ჰყავდა იონას მონვეული. დილა იყო, საუზმის უხვ სუფრას ოცდაათამდე კაცი შემოუსხდა, ახლო-მახლო სოფლებიდან მონვეულებს ლამაზად ეცვათ, ჩოხაშემორტყმულ წელს ხმალ-ხანჯალი და დამბაჩები უმშვენებდათ, მომღერალი ვაჟები და მეჩონგურე მანდილოსნები ერთად ისხდნენ, საუზმე მხიარული არ იყო, ილიამ წვეთი ღვინო არ დალია, ჯერ სოფელი დამანახეთ და მერე დამათვრეთო. სხვებმაც სტუმარს მიბაძეს.

ილიამ მეუნარგიას ლამაზ ეზოში გაიარ-გამოიარა, გამონასკულ ტყემლისათვის ყურადღება არ მიუქცევია, არც აყვავებული ატმისა და ბრონეულის ბუჩქისთვის შეუხედავს, დათვის ხესთან შეჩერდა, ფოთლები მონყ-

ვითა, დაყნოსა და მოეწონა.

- ჩემო იონა, დაფნის ნერგები გამომიგზავნე თბილისში, იქნებ საგურამოში გაიხაროს.
- აბა, იონა, უშველე, გაუგზავნე, - დაუმატა დავით ერისთავმა, - ხომ იცი ილიას ამბავი, სადაც არ უნდა მივიდეს, ყველგან მეურნეობა უნდა წამოიწყოს. თქვენ არ იცით, მიუგო ილიამ, თუ რა ძვირფასი და სასარგებლოა კეთილშობილი დაფნა.

ილია ჭიშკარში გავიდა - მოდი, ახლა ტაძარსაც ვნახავო. ბევრი სტუმარი გაჰყვა მას, ტაძარი ღია იყო. ილიამ დაათვალიერა ხატები და ძველი ნივთები, იქვე ტაძრის შიგნით, ეკატერინე ჭავჭავაძის შვილების საფლავებთან შეჩერდა, წარწერები წაიკითხა და ფიქრმა წაილო.

იონა მეუნარგიას პაპა - პეპუ მხატვარ-მოქანდაკე იყო. ცაიშის ისტორიულ ტაძარში პეპუს მიერ გაჭედდილმა ხატებმა ილია დიდად დააინტერესა, წაიკითხა წარწერებიც და ძალიან მოეწონა, მაგრამ ასე ძვირფასად მორთული ტაძარი რომ ყავრით იყო დახურული, ეს არ მოეწონა.

- არ სჯობდა, კრამიტით რომ გადაგეხურათ?
- გადავხურავ, ბატონო! - მორიდებით მიუგო იონას მამამ, მიხეილმა.

ილიას წასვლის შემდეგ, მან ყავარი ჩამოაყრევინა და ცისფერი თუნუქით გადახურა ეს ისტორიული ტაძარი.

იონა მეუნარგიას კარის მეზობელმა, ზურაბ ქირიამ თავის მოგონებაში მშვენივრად აღწერა ცაისში ილიას სტუმრობა. ზურაბი მაშინ სუფრას ემსახურებოდა და ბევრი რამ დაამახსოვრდა.

„ტაძრიდან სტუმრები რომ დაბრუნდნენ, - წერს ქირია, - სუფრა განცობილი იყო და სადილობაც დაიწყო. თამალობა პეხუ უორდანიას დაეკისრა, რომელიც გვარიანი მოქართულე, მომღერალი და მოქეიფე ხომ იყო და იყო. ლხინი დიდხანს გაგრძელდა, თითქმის შემოათენდათ.

ილიამაც რამდენიმე ყანწი ოჯალეში მიირთვა, ძლიერ გამხიარულდა. ყველაზე მეტს ერისთავი, ზორბა, ლამაზი კაცი ოხუნჯობდა. მისი ლაპარაკი ყოველთვის დიდ სიცილს იწვევდა, უმთავრესად რუსულად ლაპარაკობდა; მე რუსული კი არა, ქართული ძლივს მეყურებოდა. ამავე დროს სუფრასთანაც არ ვიჭეჭი, როგორც მოსამსახურეს, ხშირი შესვლა-გამოსვლა მიწევდა და მაშინ თუ მოვკრავდი რასმე ყურსა და თვალს. სიმღერა გაჩაღდა, რომელშიც ილიაც ჩაერია. ფერხული მოითხოვა. თვითონაც ცეკვავდა და ყველანი ჩაგვაბა. წრე ისე გაიზარდა, რომ დარბაზში არ ეტეოდა. თამადამ მოითხოვა, ვინაიდან ფერხულს დიდი დარბაზი უნდა, უმჯობესია ხვალისთვის გადავდოთ და რაკი ეზო ფართოა, აი აქ გავმართოთ ფერხულიო და თუმცა თვითონ ვერ იცეკვა, ფეხი მაინც ააყოლა, რამაც ეჩვეუ-

ლო მხიარულება, სიცილი და ქუდების ჭერში სროლა გამოიწვია.

ილია განსაკუთრებით გულისყურით უსმენდა ჩონგურსა და სიმღერებს. არ მახსოვს, თუ რომელი სიმღერა იყო, რამდენიმეჯერ გაამეორებინა მეჩონგურე ქალს და თვითონაც კი ააყოლა ხმა.

შებარხოშებულმა ილიამ კახური სიმღერაც წამოიწყო. ამ სიმღერიდან მხოლოდ ერთი სიტყვა დამამახსოვრდა დღემდე, ეს არის „ფარინა-ფარინა“, რითაც სიმღერის ყველა ბოლო მთავრდებოდა. ილიას ხმა ააყოლეს ერისთავმა, მაჩაბელმა, ფალავამ, ბატონიშვილმა, იონამ და სხვებმაც. შესანიშნავი სიმღერა იყო. ეს სიმღერა შემდეგ ოდნავ გადასხვაფერდა ჩვენში, „ფათარინა-ფათარინას“ ვამბობდით. იგი მთელი ნახევარი საუკუნის განმავლობაში არ დავიწყებია ჩვენს კუთხეს ილიას სტუმრობის მოსაგონრად, მას ყოველ შეკრებილობაზე ვმღეროდით...“

დილას ილია დაემშვიდობა მასპინძლებს, იონამ უზანგი დაუჭირა და ცხენზე შესვა. ილიამ მათრახი მოიქნია და ცხენი კარგა მანძილზე გააჭირითა. მას მაჩაბელი დაედევნა, მდინარე ჯუმაძღე ჭენებ-ჭენებით მივიდნენ.

ილია და მისი მხლებლები ახალ სენაკში თეიმურაზ კაკაბაძის სასტუმროში დაბინავდნენ.

თეიმურაზ კაკაბაძე ცას ეწია, ძვირფას სტუმრებს კარგი ვახშამი გაუმართა, დილითაც, სანამ მატარებელი ჩამოდგებოდა, მშვენიერი საუბმე მიაართვა და კაპიკი ფული არ აიღო.

- ილია ჭავჭავაძე მესტუმრა და ქირა გადავახდევინო, მაშინ ან რა მეგრელი ვყოფილვარ, ან სად გავახილო თვალი!“

იონას ახლო ნათესავი, ლადი მეუნარგია მოგონებაში აღნიშნავს, რომ კაკაბაძეს უთქვამს, „ილია ჭავჭავაძე უბრალო ვინმე არ გეგონოთ, მეფის ტოლი კაცია, მისი სტუმრობა დიდად სასახელოა“... მთელ თავის სიცოცხლეში ის ჰქონდა სატრაბახოდ თურმე, იონამ ილია ჭავჭავაძე მე მომიყვანა, იცოდა, მე ვიყავი იმის სტუმრობის ღირსიო“.

გიორგი ხარატიშვილის საინტერესო წიგნში „ილია ჭავჭავაძე და ყვარელი“ ასეთი ამბავი ამოვიკითხე: როცა 1885 წელს ილია სამეგრელოში ეწვია თავის მეგობარს მექი თვალავას, თან წაიყვანა კახელი გლეხები, იმ მიზნით, რომ დასავლეთელი ძმათა ცხოვრებას კახელებიც გასცნობოდნენ“.

კახელმა გლეხებმა ბევრი რამ საინტერესო ნახეს სამეგრელოში, ილიამ ლხინის დროს თვითონ თქვა:

- ძალიან მომეწონა იმ მხარის მოსახლეობა, ეზოების განლაგება, სისუფთავე, მცხოვრებთა ზრდილობა, მეტადრე სიმღერები.

კახურ სუფრულ სიმღერებს შეჩვეულ ილიას კოლხურმა მელოდიებმა გული მოუნახა. ქალების წკრიალა, ოდნავ სევდიან, მაგრამ მაინც მხიარულ სიმღერებსა და ჩონგურების დუდუნს რომ ისმენდა აი, ნამდვილ საქართველოში ვარო და მერმე სადღეგრძელოში თქვა:

- „სამეგრელოში მოვედი და საქართველო ვნახეო!“

ეს სიტყვები მეგრელებმა გულში ტკბილად ჩაიკრეს, თაობიდან თაობას გადასცეს, დღესაც სიხარულით იმეორებენ.

სამეგრელოდან ჩამოტანილმა „ქართულ ხელნაწერთა უნიკალური ძეგლების საგანძურმა, - წერს სოლომონ ცაიშვილი, - მყარი საფუძველი ჩაუყარა წერა-კითხვის გამავრცელებელი საზოგადოების მუზეუმსა და ბიბლიოთეკას.“

ამ განძის დაბინავების შემდეგ ვასილ მაჩაბელმა ნიკო დადიანს დაწვრილებით მისწერა, როგორ მოიარეს სამეგრელო, ძვირფასი წიგნები და ხელნაწერები, როგორ ჩაიტანეს თბილისში. როგორ მოილხინა ილიამ, როგორ მოეწონა ეს მხარე და მისი ხალხი.

ნიკო დადიანი მეგობრის ამ წერილმა გაახარა, მაგრამ ამ ხანებში მაინც შუბლი ჰქონდა შეკრული, ნუხდა სამეგრელოს სკოლებიდან ქართული ენა რომ იდევნებოდა. ამ საკითხზე მაშინ მთავრობის ოფიცია-

ლურ გაზეთებში ბევრი სტატია იბეჭდებოდა, რეაქციონერი კალმოსნები გაჰკიოდნენ, მეგრელები ქართველები არ არიან და ქართულად რად უნდა ისწავლონო, სკოლებში თავიანთი ენის დამკვიდრება უფრო მეტ ნაყოფს გამოიღებსო.

ეს უსამართლობა და ძმათა გათიშვის ბოროტი ცდა, იმპერატორის ამაღლის პირველმა გენერალმა, ნიკო დადიან „მენგრელსკიმაც“ ვერ მოითმინა და ბოლმით სავსე წერილები გამოავაზნა სამშობლოში.

„მე წავიკითხე ის სტატიები, - წერს ნიკო დადიანი, - რომელნიც ამტკიცებენ, რომ მეგრულ ენას და ქართულ ენას შორის მსგავსება არ არისო. მე ამას ვიტყვი: ის გარეშე ქვეყნის ფილოლოგები, რომელნიც ამას ამტკიცებენ, სრულიად დაბნეულები არიან. ჯერ ჩვენი ენა ისწავლონ და მერე სწერონ... ჩვენდა საბედნიეროდ, ჩვენ ხალხს აქვს თავისი საკუთარი აზრი და რწმუნება, რომელიც დაგვიტოვა ჩვენმა საკუთარმა ისტორიამ და ახლა ვერა კაცი ვერ დაგვაჯერებს იმას, რომ ნამდვილად არ არის ჩვენთვის და რაც ავნებს ჩვენს წინსვლას, ხალხს მაშინ გაიცინობს კაცი, როდესაც იმ ხალხში ცხოვრობს, ან იმ ხალხის ენაზე ლაპარაკობს, ამას გარდა, ხალხის ისტორია და სურვილი უნდა შეიტყოს კაცმა და შემდეგ ილაპარაკოს. მე სამეგრელოს, იმერეთს და გურიას ვუყურებ, როგორც საქართველოს პროვინციებს. ჩვენ შორის განსხვავება

არ არის და არც უნდა იყოს. ეს არის ჩემი აზრი და ამ აზრით მოვკვდები. აი, რა გვაკლია. ახლა, რომ ვინმე ჩინელმა ფილოლოგმა დასწეროს ჩვენს ენაზე ან ქართული გვასწავლოს. ეგების ამასაც მოვესწროთ.“

ნიკო დადიანმა ამ მტკივნეულ საკითხზე მრავალი წერილი გამოგზავნა, რომლებიც „ივერიამ“ სიამოვნებით გამოაქვეყნა. ამ წერილებმა ბურგი გაუმაგრეს ილიას, ხალხმაც ხმა აღიმალლა, რუსთაველის ენამ სამეგრელოს სკოლებში ისევ თავისი კუთვნილი ადგილი დაიკავა.

ვ ა უ ა - ფ შ ა ვ ე ლ ა

ვაუა ილიას თავის მასწავლებლად თვლიდა, რასაც ხშირად გულწრფელადაც აღიარებდა. „უნდა გატეხილი მოგახსენოთ, რომ თუმცა არავითარი მსგავსება არ არსებობს, და იქნება ვერცა ვის შეენიშნოს, “მოხუცის ნათქვამსა” და თ. ილია ჭავჭავაძის „დი-



მიტრი თავდადებულის” შორის, მაგრამ ამ პოემის წერის დროს “დიმიტრი თავდადებულს” ჰქონდა ჩემზე გავლენა“.

ილია ყოველმხრივ ხელს უწყობდა თავის უმცროს თანამოკალმეს, უბეჭდავდა პოემებს, ლექსებს, მოთხრობებს, ეხმარებოდა ნივთიერადაც.

ვაჟამ „ივერიის“ თანამშრომლებს თავი შეაყვარა. როცა რედაქციაში ადგილი განთავისუფლდა, ილიას უთხრეს, ვაჟაზე უკეთესს ვის მოვიწვევთო. ილიას სახე მოელუშა, გიგა ყიფშიძემ იფიქრა, უარს იტყვისო და დაუმატა:

- თვითონაც ძალიან ვთხოვათ!
 - დანიშნეთ, ბატონო ილია, კაცს ლუკმა გაუჩნდება! - კვერი დაუკრა მანსვეტაშვილმა.
 - გამოგვადგება? ან კიდევ რომ გამოგვადგეს, ცოდო არ იქნება, მაგისი ნიჭი გაზეთის მუშაობაში ჩავკლათ?!
- მაგრამ თანამშრომლებს უნდოდათ და ილიამ უარი ვერ უთხრა.

ვაჟა მიიღეს. პირველ ორ დღეს კარგად იმუშავა. ხან სოფლიდან მიღებული კორესპოდენციები გაასწორა, ხან რუსული გაზეთიდან უცხოეთის ტელეგრამები გადმოთარგმნა. მესამე დღესაც ადრე გამოცხადდა. ცოტა ჩათვიქრებული ჩანდა, მაგრამ მისი გულის დარღვის გასაგებად არავის სცხელოდა, სტამბას ასანწყობი მასალა არ ჰქონდა, ჩხუბობდნენ მუშები.

მანსვეტაშვილმა ვაჟას მაგიდაზე რუსული გაზეთი გაშალა, თვალი გადაავლო წერილებს. ერთი მათგანი მოეწონა, უცხოეთში მუშათა ცხოვრებას ეხებოდა. წითელ თანქრით შემოხაზა და უთხრა:

- აბა ლუკა, ეს წერილი მალე გადათარგმნე!

კარგიო, ვაჟამ თავი დაუქნია, გაზეთი წინ დაიღო და კალაში აიღო. მანსვეტაშვილს ათასი საქმე ჰქონდა, მუშაობაში გაერთო და გვიან მიაკითხა ვაჟას.

- რა ქენი, ლუკა, გადათარგმნე?

ვაჟას მაგიდაზე დაწერილი ქალაქი ედო. მანსვეტაშვილს ის ეგონა თარგმანი და აიღო, მაგრამ..... ლექსი აღმოჩნდა.

- ეს რა ამბავია?

- თარგმანის მაგიერ ეგ ლექსი დავწერე. თარგმანის მაგივრობას გასწევს!

- არა ლუკა, ეგრე არ ივარგებს! - არ მოეწონა მანსვეტაშვილს.

ვაჟას მთელი ღამე არ ეძინა, თეძრობდა და ის მოიფიქრა, რომ რედაქციაში მუშაობა მისი საქმე არ იყო და ილიას სახელზე განცხადება დაწერა, განთავისუფლება ითხოვა. ეს მაშინ, როცა მისი დანიშვნის თაობაზე კედელზე გამოკრულ ბრძანებას ჯერ მელანი შემშრალი არ ჰქონდა.

ილიას ჯერ მისი დანიშვნა უჭირდა, ახლა კი განთავისუფლება უფრო გაუჭირდა. განცხადებას ჯერ

არათფერი არ დაანერა და ვაჟა გამოიძახა, მაგრამ უთხრეს, წავიდაო. მაშინ სარედაქციო თათბირზე გაზეთის მასალების განხილვას რომ მორჩნენ, ვაჟას განცხადება ხმამაღლა წაიკითხა და მანსვეტაშვილს შეხედა. - რას იტყვი?

- უნდა გაათავისუფლოთ!

- ეგ ადვილია, - დაუდასტურა ილიამ, - მაგრამ ულუკმაპუროდ ხომ არ დავტოვებთ?... თვეში ხუთ თუმან დავუნიშნავ, წავიდეს ჩარგალში, იმუშაოს და ყოველთვიურად რაიმე ნაწარმოები მოგვანოდოს.

- ბატონო ილია, ეს ძალიან კარგი აზრია! - გაუხარდა მანსვეტაშვილს.

- არ ეყოფა, მაგრამ დანარჩენი თვითონ იშოვოს, რა ვქნა, მეტის მიცემის საშუალება არა მაქვს.

ილია კაბინეტში შევიდა.

ამით დამთავრდა იმ დღის სარედაქციო თათბირი.

ჩარგალში ვაჟა მარტო შემოქმედებით შრომას არ ეწეოდა... იმ ხელით, რომლითაც ღამე წერდა, დღისით ამუშავებდა მინას, მოჰყავდა ჭირნახული მრავალრიცხოვანი ოჯახის გამოსაკვებად.

ვაჟა შემდეგში უფრო დაუახლოვდა ილიას. რასაც დასწერდა, მაშინვე მასთან მიჰქონდა. ილიას მოსწონდა ვაჟას ძარღვიანი, მთის სიდიადით სავსე და ეროვნული შუქით განათებული პოეზია.

იმ ზათხელს ვაჟამ გუდანაბადი აიკიდა და ილიაობაზე ეწვია თავის ქომაგსა და დამხმარეს. საგურამოში სტუმრები უკვე მისულიყვნენ. ვაჟამ ცხენი მეჭინიბეს გადასცა, თვითონ შემოგებებულ მასპინძელს გადაეხვია.

- მომილოცავს ეს ბედნიერი დღე, ჩვენო იმედო, ჩვენო მამავ!
- გმადლობთ, ჩემო ვაჟა, გმადლობთ!
ილიამ სუფრის თავში, რაფიელ ერისთავის გვერდით დასვა დაგვიანებული სტუმარი და მცირე ხნით თვითონაც იქ მოთავსდა.

რაფიელმა ილია ადღე-გრძელა და ალავერდი ვაჟასთან გადავიდა.

ვაჟა წამოიმართა, მირთმეული ყანნი არ გაავსებინა, ჯერ მაცალეთო, და უბიდან რვეული ამოიღო.



- ბატონებო, ჩემთვის ღმერთს ორატორობის მაღლი არ მოუცია, ანდა რად გინდათ მშრალი სიტყვა? არ სჭობია, პოემა წაგიკითხოთ, რომელიც ნიშნად სიყვარულისა ჩვენს ილიას მივეძღვენი.

ეს პოემა „ძალლიკა ხიმიკაური“ იყო, რომელიც ვაჟამ იმ ლხინში წაიკითხა.

მონონების და შეძახილები და ტაში გაისმა.

- დაგელოცოს კალამი! - შეაქო რაფიელმა და თბილად გადაეხვია თავის უმცროს მეგობარს.

ყანწის შემდეგ ვაჟას მადა გაეხსნა. ბევრი სვა და იმხიარულა. უკვე ღამე იყო, სუფრა რომ აიშალა. ვაჟამ წასვლა დააპირა, მასპინძლის ხვეწნა-მუდარა არ გავიდა.

- რა ვქნა, ამ ყიამეთ ღამეში როგორ გავიშვა? - წუხდა ილია. მერე ვერათერს რომ ვერ გახდა, მეჭინბეს რაღაც გადაუჩურჩულა. წასასვლელად აზვავებული ვაჟა ცოტა ხნით შეაჩერა, მუსაიფი გაუბა, სთხოვა, მთვარის ამოსვლამდე მაინც დაიცადეო.

- მთვარეს ვუყურო, თათარი კი არ ვარ! - გაეცინა ვაჟას და საჭინბოსკენ წავიდა. ცოტა ხნის შემდეგ ცივად გამობუნდა და მანპინძელს უსაყვედურა: - ცხენი რომ დაგიტოვრია, ესეც ხომ ანგარიშში ჩასავდებია? ჩემი დათრობა კი ვერ შესძელი!

- არ გენყინოს, ვაჟავ! - უთხრა ილიამ, - თუ შენ კიდევ ღვინო გინდა, წამობრძანდი, - და ხელი გადახვია.

- არა, ბატონო ილია, ვაჟას ღვინო არ უნდა, ვაჟას სიყვარული უნდა, სიხარული უნდა!

- შენ, ჩემო ვაჟა, ჩვენ ერისაგან არც სიყვარული გაკლია და არც სიხარული.

ეს რომ რაფიელმა გაიგონა, მაშინვე შენიშნა:

- მაგრამ ერთი რამ აკლია მაინც.

- ჩემო რაფიელ, შენ რომ თიქრობ, ის ყველას ვაკლია! - მიუგო ილიამ, მაგრამ ვაჟა გაჭირვეულდა.

- ფული? ფულზე ლაპარაკი არ გამაგონოთ, ჩარჩები ხომ არ ვართ. ჩვენ, ვილაპარაკოთ პოეზიაზე, ბალახზე, ვარდზე, ხეზე, ფული? ღმერთმა შეაჩვენოს მისი მამგონი, მეჯავრება და მიტომაც არა მაქვს.

იმ ღამეს ოლღამ რაფიელსა და ვაჟას ილიას კაბინეტში გაუშალა ლოგინი. რაფიელი ადრე ჩანვა. ვაჟამ ყური არავის უგდო, ნაშუალამევს ნასვამმა და ნასიამოვნებმა თავისი გაქუცული ნაბადი, უნაგირზე რომ ჰქონდა მიკრული, კაკლის ქვეშ გააშლევინა და ზედ წამოწვა.

შენუხდა ოლღა.

- ბატონო ვაჟა, აქ როგორ შეიძლება ძილი. ამობრძნდით მალლა, იქ რაფაელი და ილია გელოდებათ.

- თუ ჩემი მოსვენება გსურთ, გამიშვით, აქ ვიყო, მესამე სართულზე არ დამეძინება. აქ ბალახებსა და ვარდებში ძილს რა სჯობია.

განბილებული ოლღა წავიდა.

ვაჟას მალე ჩაეძინა, მაგრამ დილას ადგომა მაინც ილიამ დაასწრო. თავისი თათრული ქუდით წამოადგა თავს, არ გააღვიძა სტუმარი, იქვე, ლოდზე ჩამოჯდა.

ბიჭს არაყი და საუბმე მოატანინა. ამასობაში რაფიელიც მოვიდა, ჯერ კიდევ ძილისთვის თავი ვერ წაერთმია, მზეს ვერ უყურებდა, თვალებს ბლიტავდა,

- ესეა, ჩემო რაფიელ, არ გვეძინება ბებრებს! - შეაგება ილიამ.

- ეგ იქით იყოს და, „ძალლიკა ხიმიკაური“ სიზმარშიც ჩამყვა, კიდევ უნდა წავაკითხო. კარგი გამოსვლია. უი, მთლად არ დამავინწყდა, უნდა მეთქვა, კარგი იმიტომ გამოსვლია, რომ კარგ კაცს მიუძღვნა! - ბოლოს მაინც გაიოხუნჯა ენამოსწრებულმა რაფიელმა და იკითხა: - გავაღვიძო?

- არა, დაისვენოს! - მიუგო ილიამ.

- ბატონებო, მე მღვიძავს! - ვაჟა წამოდგა.

- მაშ თვალი რატომ არ გქონდა ღია? - ჩაეკითხა რაფიელი.

- შემრცხვა თქვენი, ორი ბუმბერაზი დამადექით თავზე. ვაჟა მარღად წამოხტა, იქვე წყაროს მიაშურა, გლეხურად დაიბანა ხელ-პირი და მერმე სუფრას გადახედა.

- ისევ სმა-ჭამა? არა, ბატონო, ეხლა წავალ!

- ყმანვილო, ვერსად ვერ წახვალ, ეგ პოემა დაგვიტოვე აქ და მერე სადაც გინდა, იქ წაბრძანდით! - უთხრა რაფიელმა.

- ვერ დაგიტოვებთ. ჯერ კიდევ შალაშინი უნდა.

- მაშინ, წავიკითხე, გთხოვთ!

ვაჟა წამოდგა, უბეში ჩამთბარი რვეული გადაშალა და კითხვა დაიწყო. რაფიელი და ილია სულგანაბულნი უსმენდნენ. აივანზე გადმომდგარი სტუმრებიც ჩამოვიდნენ და იქვე ჩამოსხდნენ.

ვაჟამ კითხვა გვიან დაამთავრა. ახლა უფრო მოეწონათ პოემა, შეაქეს, მაგრამ მაქებარებს თავი მოარიდა. განითლდა, სტუმრებს თავი დაუკრა, გამოემშვიდობა. ილიამ იგი ჭიშკრამდე მიაცილა. შარავზე გასული ცხენს შემოახტა და ფშავურად დასჭყვივლა.

ილია კიდევ შეხვდა ვაჟას შინაურ წრეში. ეს იყო ყვარელში. ილია თავის ახლობელ ნათესავთან, ანდრო მაცაშვილთან სტუმრობდა. ოლღაც თან ჰყავდა. გულუხვი მასპინძელი არაფერს იშურებდა, მთელ ნათესაობას მოუყარა თავი, ლხინი ლხინს გადაეხა. ილია ორი დღით იყო ჩამოსული და ერთი კვირა დარჩა. შაბათს ილიამ მასპინძელს სთხოვა, არავითარი სუფრა და ღვინო, დასვენება მინდა და დამასვენეო.

- როგორც თქვენ გესიამოვნებათ! - დაეთანხმა მაცაშვილი.

მაგრამ შუადღისას ჭიშკარს იალაღებიდან მომავალი ვაჟა-ფშაველა მოადგა, თოხარიკი ცხენი შეაყენა და დაიძახა:

- ეი, სანდრო, შინა ხარ?

სანდრო შეეგება სტუმარს, კიბესთან ილიაც გამოვიდა.

- ოო, ვაჟა! ვაჟა! სალამ-ქალამი! რასა იქ, როგორ სუფევ ოჯახით, ოთხთევით?

ილიამ ძალიან გაიხარა ვაჟას ნახვით. თვითონ ვაჟას სახეზე ისეთი იერი გადაეკრა, ზეც ეწერა, არ სჯეროდა, რომ მის წინ ილია იდგა. ილიამ ეს შენიშნა და სიტყვა გადაუკრა.

- განა გასაკვირია ყვარელში დაბადებული კაცის ყვარელში ნახვა?

- რა ვიცი, ყველაფერს ველოდი და...

- მე არ მელოდი? მოულოდნეობა კარგია, ჩემო ვაჟა, თუ ის ადამიანს სიამოვნებას მოჰგვრის.

სახელდახელო სუფრაზე ილიამ არც თვითონ დალია ღვინო და არც ვაჟას დააღეფინა, დღეს ცივ წყალზე მინდა გადავიდე და შენც ხათრი დამდეო. როცა წაისაუბმეს, ილია ტახტზე ჩამოჯდა, გვერდით ვაჟა მოისვა, მასპინძელს „ვეფხისტყაოსანი“ მოატანინა და ვაჟას სთხოვა - წაიკითხო, იცოდა, ვაჟა კარგად კითხულობდა რუსთაველს.

მასპინძლები სკამებზე ჩამოსხდნენ, ოღლა ფანჯარასთან დადგა, ასე მიჩვენებო.

დამჯდარი ვერ წავიკითხავო, მოიმიზება ვაჟამ, წამოდგა და ხელნაწერი წიგნი გადაშალა. იკითხა, ბევრი იკითხა, კარგად კითხულობდა და მსმენლები დაიპყრო.

ილია შორს წაიღო ფიქრმა, წარსულისაკენ მიიხედა,

მოაგონდა თავისი გატანჯული დედა. გვერდზე მოისვამდა და „ვეფხისტყაოსანს“ რომ უკითხავდა. დიდხანს, დიდხანს იყო მოგონებათა ბურუსში. ვაჟა კი გატაცებით კითხულობდა და ვერ ამჩნევდა ილიას თვალელებში მწუხარების ტკბილ ცრემლს.

ეს სევდა ახალი არ იყო. წარსულის მოგონება, დარდი და ცრემლი ილიამ მშვენივრად ჩამოაყალიბა რამდენიმე წლის წინათ. ახლა კი ფიქრში მხოლოდ თავის ნაწერს კითხულობდა:

„მას აქეთ ბევრმა წყალმა ჩაიარა და ბევრი კარგი რამ წაგვართვა და თან წაიყოლა. დაგვეხოცა დედ-მამა, მომიკვდა ორი ძმა, გარდამეცვალა ერთი დაცა. დავჩით ამ ქვეყნიერებაზედ მარტო და-ძმანი. ახლა ერთსაცა და მეორესაც თმაში ჭალარა გვირევიან, და როცა ახალი წელიწადი მოდის, მინდა თუ არა, ცრემლიანის თვალით უკან მიმახედებს ხოლმე. ვხედავ ჩემს თავს ჩვენს პატარა სოფელში, ჩემს პატარა ფუნჩულა და-ძმებს შორის. ვხედავ, როგორ დაგვხარიან შვილებს დედა, მამა, როგორ შევხარით ბოვშურის სიხარულითა დედას, მამას, მესმის ტრედივით უგუნური ტიტინი ჩემის პატარა დისა, პატარა ძმისა. მომესმის ჭკუადამჭდარი, სიყვარულიანი ლაპარაკი დედი-ჩემისა, მამი-ჩემისა. დღეს ყოველივე ეს მარტო ტკბილი სიზმარია. დღეს იქ, იმ პატარა სოფელში, საცა ამოდენა სახსოვარი აუგია ჩემს გულს, მარტო ხუთი სამარელაა და ამ სამარეებში

მარხია ყოველივე ეს, რისთვისაც ეხლა გული მენვის, გული მედაგება. იქ მარხია დედა, მამა, ორი ძმა და ერთი და, და ამასთან ერთად ჩემი ყმანვილობაცა - ბედნიერება, რომელიც წავიდა და თავის დღეში არ მომიბრუნდება.

წავიდა ის ბედნიერი დრო და აღარ მოვა. წავიდა და გული ჰკვნესის რალაც სხვანირი ტკივილითა, რალაც სხვანირ მწუხარებისაგან, რომელსაც ზოგჯერ აღამიანი სიხარულზედაც არ გასცვლის ხოლმე. ტკბილია კვნესა ტკივილისა, ტკბილია ცრემლი ამ მწუხარებისა. აქ კვნესა ნიავივით აგრილებს გულის წვასა და ცრემლი ჰნამავს გადამჭვნარ გულსა გამოსაცოცხლებლად. ვილამაცა სთქვა დატკობა საამური ტკივილიაო, და სწორედ ამისთანა ტკივილია ეს ტკივილიცა“.

ვაჟა კითხვით დაილალა და გაჩერდა,
 - აგაშენა ღმერთმა! - უთხრა ილიამ. მან ზეჰირად იცოდა „ვეფხისტყაოსანი“ და ახლა თვითონ გამოიღო თავი. მიუხედავად ხანდამულობისა, ტარიელის წერილი მაინც დიდი გზნებით თქვა.

ვაჟა დიდხანს არ დარჩენილა, ნასადილევეს წავიდა, ფშავლებთან უნდა გავიდე, საშური საქმე მაქვსო.

სალამოს ილიაც წავიდა შინ. სანდრო მაყაშვილს საკინძეები უსახსოვრა, ვერცხლის მოზრდილი საკინძე ოქროთი იყო შეფერილი და ზედ ჭავჭავაძეების საგვარეულო ღერბი ეხატა.

ილია ვაჟა-ფშაველას კითხვით ვერ ძლებოდა. მის პოემას სტამბაში რომ გზავნიდა, მაშინ ხომ კითხულობდა, მაგრამ მერე უკვე „ივერიაში“ გამოქვეყნებულს თავს უყრიდა და ხელახლა კითხულობდა. ილიას ახარებდა მთის პოეტის ქართული, ძარღვიანი ლექსი.

იმ გაზატყვისს ილია საგურამოში ისვენებდა. შინ არ აღმოჩნდა არც ერთი „ივერია“, რომელშიც ვაჟას ნაწარმოები იყო დაბეჭდილი, ამიტომ გიგა ყიფშიძეს მისწერა:

„ბატონო გიგო! თქვენი ჭირიმე, ის „ივერიები“ გამომიგზავნეთ, საცა ვაჟა-ფშაველას აფშინაა, გოგოთური და სხვა პოემები. ერთის სიტყვით, ყველა ის „ივერიები“, საცა პოემებია“.

ღუელი

კოლა ერისთავი ისევ ლოგინში იწვა. ტახტზე მიყრილ-მოყრილ ტანისამოსს თებერვლის მზის სხივები ცივად ეფინა. მაგიდაზე ჩამოდებული ქამარ-ხანჯალი ბრჭყვიალებდა, იქვე ყვითელი ტყავის საფულე ეგდო.

კოლამ მაგიდისკენ მიიხედა და ის საფულე თვალში ეკალივით მოხვდა.

„იმ მამაძ... ჯიბე გამომიფხიკა და შინ ეტლითაც არ გამიშვა, ფეხით წადი, კარგი ჰაერიაო. გამამასხარავა. კაცი ამას იკადრებდა? ახია, ჩემზე, რატომ ილიასთან არ მივედი... ღმერთო, აწი თუ იმ რეგვენს გავეკარე, უარესი დამმართე, ფული კი არა, თავიც წამაგებინე“. - ფიქრობდა კოლა და იმ ცარიელ საფულეს ბოლმით სავსე თვალეებს არ აშორებდა.

ბიჭი შემოვიდა და მოახსენა:

- ილია ჭავჭავაძე მობრძანდა!
- მერე, კართან რას გააჩერე?

კოლა წამოხტა, შარვალ-ხალათი ჩაიცვა, საფულე უკრაში შეაგდო და სტუმარს მიეგება.

ილია მაგიდასთან დადგა, კოლას პირდაპირ, ჯერ ხმას არ იღებდა, პაპიროსს მოუკიდა, თამბაქოს ბოლი უღვაშსა და წვერს მოედო, მერე ღია ფანჯრისაკენ გაემართა.

- ილიკო, ეს შენა ხარ? - ჰკითხა გაოცებულმა კოლამ.
 - ველარ მიცანი?
 - ვერა, ძმაო. რა არის შენს თავს?!
 - რა იქნება? სეკუნდანტად უნდა დამიდგე.
 - არა, არა, არა!
 - მშიშარა, - ილიამ საყელოში ჩააგლო ხელი და მოქაჩა, - სალამოს მოხვალ ჩემთან, სოსიკოც დაგხვდება, თქვენ ორს გენდობით.
 - ვისთან მაგზავნი?
 - ნიკოლაძესთან!
 - რა დაგიშავა?
 - გუბინდელი „ობზორი“ წაიკითხე?
 - სად მეცალა.
 - ჩემს პიროვნებასთან რა ხელი აქვს?... პირად შეურაცხყოფას არავის ვაპატიებ... დუელი არ წამოგცდეს, დანარჩენს სალამოს გეტყვი. შვიდზე გელოდები. - და წასასვლელად გაიწია.
 - დარჩი, ვისაუბმით!
 - გმადლობთ, საშური საქმე მაქვს.
 - საქმე? კარგ ერთი, ვითამაშოთ, ჯავრი გადაგეყრება. დუელი რად გინდა.
 - მინდა, მინდა!
- იყვირა ილიამ და ოთახიდან გავარდა.
- კოლამ ვერ მოასწრო ხმის ამოღება, გაოგნებული თანჯარასთან მივიდა, თამბაქოს ბოლოში გახვეული

ილია ეტლში იჯდა.

„ასე რამ გააგულისა, მაგრამ ძველი ხევსურია, თავისას არ იშლის“. - გაიფიქრა კოლამ. ბიჭი მოიხმო და უბრძანა:

- გუშინდელი „ობზორი“ მომიტანე.
- საიდან?
- სიმბორსკისთან გაიქე, იმას ექნება.

კოლას ჯავრად ის ყოფნიდა, ნუხელის რომ ბევრი ნააგო, ახლა დუელი რაღა ჯანდაბაა. მერე ვინ, ილია და ნიკო, ჰო, არა, არა! ორივე საქართველოს ჭკუა და გონებაა. საჩხუბარი რა აქვთ? - ფიქრობდა კოლა და მეორე ოთახიდან ხმაური რომ მოესმა, ბიჭს გასძახა:

- კიდევ აქა ხარ? გასწი, მოიტანე ის დასაწვავი გაზეთი.

კოლა ერისთავი განათლებული კაცი იყო, ევროპაში იმოგზაურა, ბევრი რამ ნახა და შეისწავლა, შესანიშნავი დეკლამატორი გახლდათ. ბიძამისის, ნიკოლოზ ბარათაშვილის ლექსებს ლამაზად კითხულობდა, მერმე ილიას დაუახლოვდა და მის ნაწარმოებებსაც დაეწაფა.

ერთხელ ილიამ ექსპრომტიც კი დაუნერა.

„სხვისი სიტყვა შენგან თქმული

კეთდება და უფრო შვენის!...“

ილიას ძალიან მოსწონდა ეს ლაზათიანი მამულიშვილი, რომელმაც ფული არ დაიშურა და ნიკოლოზ ბარათაშ-

ვილის თხზულებანი გამოსცა, მერმე გრიგოლ ორბელიანთან ერთად, ზემდგომ ორგანოებში განცხადება შეიტანა, განჯიდან ნეშტის გადმოსვენების თაობაზე.

კოლა ერისთავი ილიას ხშირი სტუმარი იყო. ხან ქალაქს თამაშობდნენ, ხანაც საქართველოს და ევროპის კულტურაზე საუბრობდნენ. როცა ილია მოწყენილი, ან ავად იყო, კოლას მოიხმობდა და მასთან საუბარში გული ეხსნებოდა.

„კოლა! აბა თუ ბიჭი ხარ. - წერდა ილია, - მოხვალ ჩემთან. მეც ეს სამი დღეა ავად ვარ. კარში არ გამოვდივარ, მოდი ერთი ლაზათიანი ბეზიკი გაგჭიმოთ. კნენას მოახსენე, რომ ექიმმა კნიაზ კოლა ერისთავის ნახვა წამლად დამიწერა და თუ ამ წამალს დაიშურებთ ჩემთვის, თქვენ იცით-თქო და თქვენმა სულგრძელობამ“.

მაგრამ, ახლა კოლა დუელმა შეაშფოთა.

სალამოს, დანიშნულ დროზე, კოლამ ილიასთან ეტლი მაინც მიაგრიალა. ხელში დაჭმუჭვნილი გაზეთი ეჭირა, სასტუმრო ოთახში სოსიკო შალიკაშვილი ფანჯარასთან ატუბულიყო, გრძელ უღვაშს იგრეხდა. ილია კი ტახტზე იყო წამოწოლილი, თავთან სკამი ედგა, რომელზეც წიგნები და გაზეთები ეწყო. კოლა რომ შევიდა, ილია მაშინვე წამოხტა, ხელი ჩამოართვა და უთხრა:

- აი, მეორე სეკუნდანტი. წესი და რიგი სოსიკოსავით ვინ იცის?!
- კი, მაგრამ, - კოლამ ხელში ვაბეთი შეათურიალა, - ამისათვის ღირს...
ილიამ სიტყვა შეანწყვეტინა.
- ღირს რომელია, შენ საქმეს მიხედვით.
ილიას არავის სიტყვის მოსმენა არ უნდოდა. იმ დღეს სახლიდან არ გამოსულა, არც საჭმელი უჭამია, მოუთმენლად მოელოდა დაღამებას.
- კოლა, - მიმართა სოსიკომ, - მე უკვე ვიყავი ნიკოლაძესთან. ის თანახმაა და სეკუნდანტებად დათიკო გურამიშვილი და ნიკოლოზ სიმბორსკი წამოაყენა. რას იტყვი?
- აბა, რა ვთქვა, ჩემო სოსიკო, მე ვინ რას მეკითხება!
- მე და შენ ცალკე უნდა მოვილაპარაკოთ, ილია არ თმობს, გვაჩქარებს, ამაღამ უნდა მოეწყოს დუელი.
- ამაღამ? - კოლამ ილიას გადახედა - ცეცხლი გეკიდება?
ილიამ შუბლი შეიკრა და მეორე ოთახში გავიდა.
- სოსიკო, როგორც ვატყობ, აქ ცოდვა დატრიალდება, მე თავი დამანებეთ!
- მეც შენც დღეში ვარ, მაგრამ ან გვიანაა. რაკი შევეტოპეთ, ბოლომდე გავიდეთ!
- რა ბოლომდე, კაცო, ნიკოს და ილიას ერთმანეთი დავახოცინოთ?!

- თვითონ ასე ინებეს და... ახლა ნუ ვაყოვნებთ, სიმბორსკისთან მივიდეთ, იქ გურამიშვილიც დაგვხვდება, ოთხი კაცის ჭკუა მაინც სხვა არის!

სოსიკო და კოლია ილიამ დერეფანში გამოაცვილა და თან გაათრთხილა:

- შერიგება და პატიება არ გამაგონოთ, გესმით?!
- გვესმის, ბატონო, - თავი დაუქნია კოლამ და ის გაზეთი ჯიბეში ჩაიბლუჯა.

საბურთალოს მინდორზე, ისევ ქარი ზუზუნებს. ადამიანის ჭაჭანება არ არის, ათასში ერთხელ მონადირე თუ გამოივლის, მაგრამ ახლა არც ის ეტანება ამ მოხრიოკებულ მიდამოს. ეს დილა ჩვეულებრივად უნდა გათენებულიყო საბურთალოში, მაგრამ განთიადის შუქის დაშვებამდე, ცხენების თქარა-თქური გაისმა, სუროიან ხეს მშვიდად შეფარებული ყვავი დაფრთხა, ცაში აიჭრა და ყრანტალ-ყრანტალით მინდორს გადაეფლო. ეს ყვავი ცუდად ენიშნა კოლა ერისთავს. ხევთან ეტლი გაჩერდა, ყოველთვის დინჯი ილია ახლა ძალზე ჩქარობდა, ეტლიდან მარდად გადმოხტა და წინ გაუძღვა თავის სეკუნდანტებს.

ყვავის ჩხავილი უკვე უფრო შორიდან ისმოდა. კოლამ ვერ მოითმინა და ილიას უთხრა:

- გესმის?
- ყვავია, მგელი ხომ არ გგონია? - ცივად მიუგო ილიამ.

- ყვაფი დაუძახე შენ, სამას წელიწადს ცოცხლობს.
- იცოცხლოს, მე რას მიშლის.
- შენ მარტო ნიკოლაძე გიშლის, არა? ჰო, ილია, არ ვარგა ასე.
- წამოდი, წამოდი.
- სად წამოვიდე, კაცო, შენი ფეხით სიკვდილთან მიდიხარ, მეც წამოვიდე?

სოსიკო შალიკაშვილი ოფიცერი იყო, წესრიგის მოყვარული, დინჯად მიდიოდა, კოლა ერისთავის ლაპარაკი არ მოეწონა და მკაცრად უთხრა:

- გაჩუმდი, კაცო, ისედაც განწყალეებული გული სულ ნუ გამინწყალე!

ბილიკი ამოათავეს და ტრიალ მინდორზე გავიდნენ.

მთვარე მინდვრის თავზე დიდ ლამპასავით ეკიდა, მაგრამ შუქის ნატამალიც არ ჰქონდა, თავისთავს ძლივს ანათებდა. სამაგიეროდ მეტეხის მხრიდან ცა გახსნილი იყო. მზის წინამორბედი სხივი წყაროსავით მოდიოდა და ტრიალ მინდორზე ეცემოდა.

სოსიკო მინდორზე გავიდა, მომალლო ადგილას ხმალი დაასო და შემდეგ გრძელი, მხედრული ნაბიჯებით ბარიერის ადგილი გადაზომა. დანარჩენი სეკუნდანტებიც მას მიჰყვებოდნენ.

ნიკო ნიკოლაძე ხესთან იდგა, თავჩალუნული, ხანდახან გამოაპარებდა თვალს მოწინააღმდეგისაკენ. ილიამ ეს

შეამჩნია და „მტერს“ ზურგი შეაქცია. ილია თავშიშველი იყო, ქარი ჭალარას უწუნავდა, ხშირ-ხშირად თითებით გადაივარცხნიდა თმას და პაპიროსს უჩინანად ეწეოდა.

სეკუნდანტებმა მანძილი გადაზომ-გადმოზომეს, რევოლვერები შეამონწმეს, ყველაფერი წკიპზე შედგა, საცაა ტყვიას უნდა დაეჭუხა.

მაგრამ ნიკოლოზ სიმბორსკიმ დამბაჩა-მომარჯვებულ ილიას მხარზე ხელი გადახვია, მერე ნიკო ნიკოლაძეს დაუძახა. ნიკო რომ მოვიდა, მკლავზე ხელი სტაცა და უთხრა:

- რას სჩადიხართ, ძმებო! თქვენ ახლა ერთმანეთს კი არა, საქართველოს ჰკლავთ. - სიმბორსკის ცრემლი მოერია, - თქვენ უკვე რამდენი რამ გააკეთეთ თქვენი სამშობლოსათვის, მომავალში კიდევ ბევრს გააკეთებთ, მაგრამ ამ მომავალს რომ ისპობთ... ბატონო, ილია, აბა, გახედეთ თქვენს თბილისს, გახედეთ, როგორ სჭირდებით მას!

გათენდა. დადგა 1880 წლის პირველი მარტი, რომელიც დარს პირდებოდა ქვეყანას. ქალაქში ფანრები ჯერ კიდევ არ ჩაექროთ და დილის იისფერ შუქში უღონოდ ანათებდნენ.

ცნობილმა პოეტმა სიმბორსკიმ იცოდა ილიას და ნიკოს ფასი, ცდილობდა სიტყვა როგორმე გულში ჩამწვდომი გამოსვლოდა, რომ ამით ორივეზე ემოქმედა და სისხლისღვრა ჩაეშალა.

კოლა ერისთავი ილიასთან მივიდა და ჩასჩურჩულა:

- შერიგდით, კაცო, გაათავეთ!
- შერიგდით! - მიმართა გურამიშვილმა.
- შერიგდით! - კვერი დაუკრა შალიკაშვილმა.

სიმბორსკიმ დაუმატა:

- ერთმანეთის დახოცვა რომ განგიზრახავთ, უკან მიიხედეთ, ვის სტოვებთ სამშობლოში?!
- „მე შეურაცხყოფილად მივიჩნიე თავი მარტო იმისათვის, რომ ნიკოლაძეს თუნდ ერთი წამით შეეძლო ეფიქრა, რომ რაც „ივერიაში“ დაიბეჭდა, ის ჩემის თანხმობით იყო“.
- „თუ ეს ასეა, - შეაწყვეტინა ნიკოლაძემ - მაშ, რაც მე ჩემს გაზეთში ვთქვი ჭაჭავაძის შესახებ, უკან მიმაქვს!“ ნიკოლაძე ილიასთან მივიდა და გადაეხვია.

უცებ დამბაჩამ დაიქუხა.

ეს ილიას დამბაჩა იყო. კოლა ერისთავმა დასცალა და მეგობრებს დასჭყვივლა:

- ახლა წამოდით, მაღარიჩი ჩემზე იყოს!

პურ-მარილის ხასიათზე არავინ იყო, მაგრამ იკოდნენ კოლა ერისთავის ჭირვეული ხასიათი და მის ნებას დაჰყვნენ.

კოლამ მართლაც ნანატრი სუფრა გაშალა, სტუმარიც ბევრი ჰყავდა, ღუელის თაობაზე კრინტიც არავის დაუძრავს, მასპინძელი ძალიან ოხუნჯობდა, არც პოეტი სიმბორსკი აკლებდა, მაგრამ ილია და ნიკო გა-

მოთიშულნი იყვნენ საერთო მხიარულებას. ერთო-ორი სადღეგრძელოს შემდეგ ილია აივანზე გამოვიდა.

მზე ანათებდა, მაგრამ ღრუბლები მომძლავრდნენ და ისევ მალე მიიმალა, მთაწმინდას ნისლი ებურა.

ილია გაჰყურებდა თბილისს, მაგრამ არავის დანახვის და განსჯის თავი აღარ ჰქონდა. თავის თავს კიცხავდა, „ასეთი სიფიცხე გაგონილა?“ ფიქრში ნიკომ შეუშალა ხელი, ისიც სუფრასთან ვერ გაჩერდა, ხელი მოხვია ილიას და თავისივე სიტყვები გაახსენა:

- სულგრძელობითა ძლევა სჯობს, ვაჟკაცობითა ძლევასა.

ეს დუელი იყო ილია ჭავჭავაძის და ნიკო ნიკოლაძის ურთიერთობის მხოლოდ ერთი ეპიზოდი, თორემ ისე ისტორიაში მათი მეგობრული დამოკიდებულება ნათელით და სიყვარულით არის მოსილი. ამ სიყვარულმა დაანერინა, ალბათ, ნიკოლაძეს ეს სტრიქონები:

„განა ამ სტრიქონების დამწერი, - ამბობდა ნიკოლაძე, - ყველაფერში ეთანხმება, მაგალითად, გ. წერეთელს, ი. ჭავჭავაძეს, აკ. წერეთელს, ან ს. მესხს? ან განა ესენი ყველაფერში ეთანხმებიან მას? არა! ზოგიერთ საქმეში, ზოგიერთ კითხვებზე ჩვენ სხვადასხვა აზრისა ვართ. მაგრამ ჩვენ საზოგადო მიზანი ყველას ერთი და იგივე გვაქვს და უნდა გვექონდეს. ამ საზოგადო მიზანს ჩვენ ყველანი, ჩვენი ძალისა და ცოდნის მიხედვით, ერთგუ-

ლად ვმსახურობთ და თუ წვრილმან აზრებში, წვრილმან საგნებზე, ან შემთხვევებზე - ვშორდებით, ეს ერთმანეთის პატივისცემის შეწყვეტის ნებას არ გვაძლევს.“

ილიას ცხოვრების მათიანემ შემოგვინახა კიდევ ბევრი მშვიდობიანად დამთავრებული დუელის ამბავი. მათ შორის საინტერესოა უკანასკნელი დუელის გახსენება, თუნდაც იმიტომ, რომ ის ლაპარაკობს მოხუცებულობაში ილიას ახალგაზრდულ შემართებასა და სიფიცხებზე. ხასიათის სიმტკიცით ილია ხშირად იგებდა და თავისი გაჰქონდა.

1905 წლის 18 ივნისს ბანკის საერთო კრებაზე მან მკაცრად გააკრიტიკა თავადი მიხეილ ვეზირიშვილის თავმჯდომარეობით არსებული კომისიის მუშაობა. თავისი სიტყვის დასამტკიცებლად ილიამ მოინდობა ვეზირიშვილის კომისიის ოქმის ერთ-ერთი ადგილის წაკითხვა, მაგრამ ვეზირიშვილმა შეაჩერა.

- ოქმი წასაკითხავად სხვას გადაეცით.
- როგორ, მე არ მენდობი? - ჰკითხა ილიამ.
- დიად, თუ გნებავთ, ვერ გენდობით!

ეს სიტყვები ცუდად გაისმა დარბაზში, დამსწრენი აჩოჩქოლდნენ, მაგრამ ხმა არავის ამოუღია. ილიაც ერთი წუთით შეჩერდა. ამ ერთ წუთში აქა-იქ მაინც ჩუმად გაისმა: „რას არ ენდობა, კაცო, ილია რა სულმდაბალი

ნახა, თავის სასარგებლოდ ოქმის გადაკეთებას როგორ იკადრებს. აფსუს, მთლად დაიკარგა ნამუსი.“

ილიამ სათვალე მოიხსნა, მრისხანედ შეხედა თავად ვეზირიშვილს და უთხრა:

- მაგისტვის პასუხს აგებთ!

მეორე დღეს ილიამ სეკუნდანტებად გაუგზავნა მიხეილ გრუზინსკი და დავით ჯორჯაძე.

ვეზირიშვილმა გამონვევა მიიღო, თავის მხრივ სეკუნდანტებად დანიშნა კობიაშვილი და დიასამიძე.

საქმე ამით არ დამთავრებულა. ორივე მხარის სეკუნდანტები ერთსულოვნად წინააღმდეგი იყვნენ რევოლუციის გასროლისა. მაგრამ ილია უკან არ იხევდა, ნუ დაგავიწყდებათ, იგი მაშინ სამოცდარვა წლისა იყო, თავი ახალგაზრდად ეჭირა, არ ეშინოდა სიკვდილისა და თავგამოდებით მოითხოვდა: - „ვეზირიშვილი გამოვიდეს ბრძოლის ველზე, თუ ეს არ სურს, მაშინ ბანკის იმავე კრებაზე მოიხადოს ბოლიში, სადაც ინციდენტი მოხდაო“.

ვეზირიშვილს სეკუნდანტებმა საშველი არ მისცეს, გატეხეს მისი სიჯიუტე და ბანკის რწმუნებულთა 23 ივნისის კრებაზე მან ბოლიში მოუხადა ილიას. დიასამიძესაც ეს უნდოდა და სეკუნდანტთა თათბირის ოქმს მიაწერა: „ეს მოხდა ორივე მხარის სეკუნდანტთა სასიხარულოდ“.

ილიაობა

ილიაობა ყოველი წლის 20 ივლისს იმართებოდა. დიდი ეროვნული დღესასწაული იყო. ამ დღეს ილია ჭავჭავაძე საგურამოში უხვად მასპინძლობდა საქართველოს ყოველი კუთხიდან ჩამოსულ სტუმრებს. ქართველები აქ მარტო სალხინოდ და სალალობოდ არ იკრიბებოდნენ.

ხალხმრავალ სუფრაზე საქართველოს ბევრი საჭირბოროტო საკითხი ირჩეოდა. საგურამოს მეტი სხვა შესაკრები ადგილი მაშინ არ იყო. აქ ჩამოდიოდნენ უმთავრესად თერგდალეულები და იდეურად მათთან ახლოს მდგომი პირები. ილიას უახლოესი ნათესავები და ახლო-მახლო სოფლების გლეხკაცობა...

აკაკი წერეთელი, რაფიელ ერისთავი, ვაჟა-ფშაველა, ილია ოქრომჭედლიშვილი, ალექსანდრე ხახანაშვილი, ნიკო ნიკოლაძე, ივანე მაჩაბელი, იაკობ გოგებაშვილი და სხვ. საგურამოში, ხშირად თუ არა, „ილიაობას“ მაინც მოდიოდნენ და ორ-სამ დღეს რჩებოდნენ ხოლმე.

თუ იმ დროს საქართველოში ვინმე უცხოელი სწავლული ან რუსი ლიტერატორი იყო, ილია უეჭველად მოიწვევდა და მერმე ისეთ ნასიამოვნებს ისტუმრებდა, რომ შემდეგ ისინი რუსეთსა და საფრანგეთში, ინგლისსა თუ გერმანიაში გაზეუბნებულნი და

წიგნებში წერდნენ ქართველთა სტუმართ-
მოყვარეობაზე, ლიტერატურასა და ზნე-ჩვეულებებზე.

იმ წლის 20 ივლისის გათენებას საშველი არ დაადგა. ილიას არ ეძინებოდა და ღამე ერთობ გრძელი ეჩვენა. ერთხელ მამლებმაც გადაჰყვივლეს ერთმანეთს, მაგრამ სიბნელე მაინც არ იძვროდა. ჩამობურცულ ცას წვიმა ეკიდა.

ილია აივანზე გამოვიდა, მაგიდაზე ვაშლით საესე კალათი იდგა. მოეწონა საგანგებოდ შერჩეული ყვითელი და სურნელოვანი ვაშლი „გორულა“. ყოჩაღ, ჩემო თოიძევ, გაიფიქრა მან. საკეცი დანა გამართა და ვაშლი გაჭრა. ილიას ხილი ძალიან უყვარდა, მეტადრე ხეს როცა ესხა. მოსაწყვეტად არ ემეტებოდა, თვალს ახარებსო.

კარგი ბალი ჰქონდა და ხილი რომ არ დაკარგულიყო, კონსერვის პატარა ქარხანა მოაწყო. ხილის აჩირვა, წვენის გამოხდა გიგო თოიძეს ევალებოდა. ილიას მისთვის მოჰქონდა ხელსაწყო-მანქანები და სახელმძღვანელო წიგნები. ისწავლე და სხვასაც ასწავლეო. თოიძეს ეს საქმე ემარჯვებოდა და მალე სახელიც გაითქვა.

ახლა თოიძის მოტანილი ვაშლი ილიამ კალათიდან ამოალაგა, მერმე ოთახში შებრუნდა და ზოლებიანი ქისა გამოიტანა. ქისაში ბაჭაღლო ოქროს თუმნიანები

ეყარა. ილია მუშაობას შეუდგა. ვაშლს მოხერხებულად ჩაჭრიდა ხოლმე და შიგ თუმნიანს დებდა ისე, რომ ფული არ ჩანდა. ამ საქმით რომ იყო გართული, კიბეზე ელისაბედი ამოვიდა.

- ილიკო, რაებს აკეთებ, კაცო!
- სიტკბოსთვის ვშვრები, ისე ძალიან მუყავა.
- ნეტავი შენ, ჩოთიროს თავი გაქვს.
- მა რა ვქნა, არ დამეძინა და ეგეც ხომ საქმეა.
- მაგას მერეც მოასწრებ, მეც მოგეშველები, ახლა წამომყე და სეპარატორი მიჩვენე. ბევრი ფული ჩაყარე მაგ მანქანაში?
- სამაგიეროდ საქმე გამოვიდა.
- წინილებსაც უკრუხოდ აჩეკვინებ?
- მაშა! წინილების მანქანას, ინკუბატორს ეძახიან.
- კაცო, შენ სულ გააგიჟებ ხალხს, აქ საქართველოა, ძმაო, გერმანია კი არ არის.
- მანქანები ქართველებსაც არა სწყენთ. ჩვენში რკინასა და რვალს რომ ამუშავებდნენ, გერმანია მაშინ სად იყო.
- რა ვიცო... წამოდი, მიჩვენე.

ილია და ელისაბედი დაცვარულ ბალახში სიარულით კარგა გაილუმპნენ და მერე ბოსელს მიაღვინენ. ნახეს კრიალა სეპარატორი, შემდეგ საქათმეში შავ-შავი წინილების წივ-წივმა გული შეულონა ელისაბედს.

- ამათ საცოდავობას ვერ ვუყურებ; - თქვა მან და წავიდა.
- ალბათ უდედლობას სტირიან საბრალონი.
- არ ვიცი, კარგად კი იზრდებიან! - მიუგო ილიამ.

ქათმებს რომ ათვალიერებდნენ, ქარმა წამოუქროლა და წვიმა მოიტანა. მაგრამ აღმოსავლეთმა პირი გაიხსნა და დილის მგემ მალლიდან გადმოხედა საგურამოს. წვიმა მაინც არ თმობდა მოედანს და ქარის ნებაზე მიმოდოდა. ხან ხეებს უშხაპუნებდა, ხანაც სახლებს, ხან ფირუზისფერად შეწამლულ ვაზს წინწკლავდა.

ილიას გაუხარდა მზის ამოსვლა. თონისკენ მიმავალი ფიქრობდა, ბედი მქონიაო. თონის ცხელი ჰაერი სახეში ტალღასავით მოხვდა. ქეთო ჯავახიშვილს ცეცხლი წაჰკიდებოდა, ოფლით სველი კაბა ტანზე მიჰკროდა, რა სწრაფად მუშაობდა! ვარცლიდან გუნდებს იღებდა, აბრტყელებდა და ისე ეყუდებოდა თონეში, რომ ფეხის ტერფები ძლივს მოუჩანდა. ილიას შეებრალა ეს გამრჯე ქალი.

- დაისვენე, ქეთევან, დაისვენე! - მიმართა მას.
- ე, პურს ვინღა გამოაცხოხოს, მე რო დავისვენო. ცოტა რომ დაგვიანდეს, ცომი დამჟავდება და წახდება.
- ისევ ცომი წახდეს, შენს ავად გახდომას ისა სჯობია, შენი შვილების პატრონი ვინღა იქნება, შენ რომ

ავად გახდე.

- არავინ, ბატონო!
- მარტო რატომ მუშაობ?
- მოურავმა მიბრძანა, დამხმარე არავინა მყავსო.
- ეხლავე გამოვგზავნი და დაისვენე.

ამასობაში ელისაბედიც მოვიდა.

ილიას უამინდობა ანუხებდა, ახლა მზემ რომ გამოანათა, მაგიდები კაკლის ქვეშ დაადგმევინა, ზოგიც დიდ დარბაზში, დანარჩენი ყველაფერი მომზადებული ჰქონდა. საკლავი გუშინ დაჰკლეს. ცხვრები ხეზე ეკიდა და ატყავებდნენ. იქვე ქათმებს ხოცავდნენ. მათ კრიახს ყური მიჰქონდა.

ჭიშკარი გაიღო და ურემი ჭრიალით შემოვიდა ებოში. ურმის წინ სამი კაცი მოდიოდა. სამივეს თეთრი ჩოხა ეცვა. თითქმის ერთი სიმაღლისა იყვნენ, ტანადნი და ახოვანნი.

ქუდი შორიდან მოიხადეს, ილიასთან მივიდნენ და მიესალმნენ.

- ფოთიდან ვართ, ბატონო, - დაიწყო ერთმა, - ეპისკოპოზმა გრიგოლმა მცირე ძღვენი გამოგვატანა.
- თვითონ რომ მობრძანებულიყო, გამახარებდა. - მიუგო ილიამ.
- ციებამ არ გამოუშვა, ბატონო, თორემ სხვა ვინ დააკავებდა.

ურემზე სანწახელივით გრძელი ყუთი იდგა წყლით სავსე, შიგ სამი დიდი ზუთხი იწვა, ონსილა არ ჰქონდათ, ბოლოებს ძლივს იქნევდნენ. პატარა ზუთხები კი ბლომად დასურავდნენ. ილიამ ყუთს ზევიდან დახედა და თავი გაიქნია.

- რა უცნაური ხალხი ხართ, რა პატივისცემა იცით!

გლეხებმა ყუთი ურმიდან ჩამოიღეს, გრიგოლ დადიანის ძღვენმა ყველა ალტაცებაში მოიყვანა. ილიამ ფოთელი სტუმრები შინ შეინვია და ნიკო ხიზანიშვილი მოიკითხა.

- სად იქნება, სამზარეულოშია - მიუგო ოლღამ.

ილიამ ნიკო მოიხმო. ნიკოს უკვე მოესწრო წახემსება, სასმელიც არ დაეკლო და კარგ გუნებაზე იყო.

რა ხართ დასავლეთელები, ცოცხალი ზუთხი რამ მოვატანინათ, - იკითხა ნიკომ, სტუმრების ვინაობა რომ გაიგო.

- გული გულობდეს და ზუთხი რაა, მატარებელმა ხელათ მოიტანა! - მიუგო სტუმარმა.

- ნამგზავრი ხალხია, აბა შენებურად გაუმასპინძლდი, - უთხრა ოლღამ და სუფრაზე ხელადით ღვინო ჩამოღვა. ნიკომ წამოიწია და დიასახლისს ჩასჩურჩულა.

- მე ზუთხს დაველოდები.

ყვარლიდან ჩამოტანილი რუმბი ისევ აივანზე ესვენა. ილიამ ბრძანა ღვინის გადმოსხმა. თავისი მიწა-წყლის

საფერავი ძალიან უყვარდა... ყოველი კუთხიდან მოელოდა სტუმარს და დახვედრაც ხომ უნდოდა. საქართველოში სტუმრად მყოფი უცხოელებიც მისკენ მოისწრაფოდნენ და ათასნაირი ნუგბარი საჭმელ-სასმელი უნდა მოემზადებინათ.

„დღეობის მზადებას შეუდგებოდნენ ხოლმე რამდენიმე დღის წინად, - წერს იაკობ მანსვეტაშვილი, - მერე რა მზადებას! იკვლებოდა რამდენიმე ძროხა, ცხვარი, ბატი, ინდაური, აუარებელი ქათამი. იჟლიტებოდა უთვალავად ვარია, წინილა, იდგა მთელი ხროვა სხვადასხვა მწვანილეულობისა, გატენილი ტომრები ბოსტნეულობისა, სავსე გოდრები ხილეულობისა, ცხვებოდა აუარებელი ჰური, შოთი, ნაზუქი, იხდებოდა ქვევრები; საგურამოსი და ყვარლური ღვინოებით სავსენი. მახსოვს, ერთ დღეობას, სამი საპალნე ღვინო დაიხარჯა, ე.ი. 2250 ბოთლი“.

ნადიმის წინადღით თითო-ოროლად მოდიოდნენ, ხოლო 20 ივლისი რომ გათენდებოდა, სტუმრების დენა სადილობამდე არ წყდებოდა.

ვინ ეტლს მოაგრიალეებდა, ვინ ცხენს მოაჭირითებდა, უფრო ახლოს მცხოვრებნი ქვეითად მოდიოდნენ.

როგორც ყოველთვის, ილია დღესაც სახლის წინ, ეზოში იდგა, სტუმრები დღეობას ულოცავდნენ.

ჭიშკარს ეყვნიანი ეტლი მოადგა.

- აკაკი, რაფიელი! - გაისმა ხალხში.

ილია მიეგება აკაკისა და რაფიელს. შინ შემოუძღვა. აკაკიმ ყვითელ-ყვითელი ვაშლებით საფსე კალათას რომ შეხედა, ილიას უთხრა:

- მე და რაფიელს თითო ვაშლი ხომ არ გვანყენს?
- მიირთვით.

აკაკიმ კალათისაკენ წაიღო ხელი, მაგრამ ილიამ დაასწრო და მაგიდიდან აღებული ვაშლი მიანოდა.

- აი ეს ინებეთ.
- ეს მირჩევნია, თორემ შენ რომ მანვდი, ისეთ ვაშლს ხიდანაც მოვკრეფ! - აკაკიმ ორი ვაშლი ამოიღო. ერთი რაფიელს მისცა.
- შეიძლება? - მორიდებით იკითხა კიბეზე ამოსულმა მაღალ-მაღალმა გლეხმა, რომელსაც ხელში ლაყუჩით არაგვის ორაგული ეჭირა.
- მობრძანდი, ლაზარე. - ილიამ აკოცა, ორაგული ჩამოართვა და ვაშლი ჩაუდვა ჭიბეში.
- რას შვები კაცო, შესძახა აკაკიმ, ბავშვი ხომ არ არის, ვაშლს თავაზობ, ყანწი მაგას.
- ყანწის ჭერიც დადგება, - მიუგო ილიამ.

ლაზარეს მხარზე ხელი მოუთათუნა. ლაზარე რომ წავიდა, რაფიელმა იკითხა:

- ხიზანიშვილი აქ არის?
- დიახ, გუშინ მოვიდა, - უპასუხა ილიამ.
- მაშინ ეს ორაგული დამალე, თორემ ჩვენ ძვალისც

არ შეგვხვდება.

ილიამ აივნიდან გადაიხედა, გლეხები უკვე მოსულიყვნენ და მასპინძლის მოლოდინში ებოში იდგნენ. ილიამ ბიჭს უბრძანა, კალათი წამოეღო, თითონ წინ გაემართა, გლეხებთან მივიდა, ყველას სათითაოდ მიესალმა და ვაშლები ჩამოურიგა... ილია ისევ მიუბრუნდა ძვირფას სტუმრებს. აკაკიმ მოუთმენლად კითხა:

- ხომ არ დაგაკლდა ვაშლი?
- არა.

მერმე ბიჭმა კალათი ამოიტანა და ისევ მაგიდაზე დადგა. აკაკიმ რომ ჩაიხედა, ხუთიოდე ვაშლს თავისიკ დაუმატა და რაფიელს შეხედა. რაფიელს გაეცინა.

- ბიჭს რომ კალათი მიჰქონდა, მაშინ ჩავაგდე, - უთხრა მან.

ისევ გამოჩნდა ეტლების ქარავანი, სტუმრებს სტუმრები მოემატნენ, მოვიდნენ ნიკო ლოლობერიძე, პეტრე ნაკაშიძე, ილია ოქრომჭედლიშვილი, დიმიტრი ბაქრაძე და ბევრი სხვა.

ამასობაში სუფრა გაშალეს ხუთ ადგილას. კაკლის ქვეშ - ქალაქის სტუმრებისათვის, კაკლის გაყოლებაზე, ხეებს ქვეშ, წინამძღვრიანთ სკოლის მონათვეთათვის და იქვე, მხარმარცხნივ გლეხებისათვის.

ტოლუმბაშად რაფიელ ერისთავი აირჩიეს. ჯერ ჭიქებით დაიწყეს სმა, მერე მოაყოლეს თასები, ჯამები,

ყანწები. პირველი ყანწი ილიამ დალია და იქვე არხეინად დაჭდა.

- კი მაგრამ, ვისთან გადადიხარ ყანწს? - ჰკითხეს ილიას.
- დიმიტრი ბაქრაძესთან.
- ჩემს მეტი კაცი ვერ ნახეთ?!
- შენ რა, ვითომ ვისზე ნაკლები ხარ? - მიუგო ილიამ.

მერიქიფემ დიმიტრის ყანწი შეავსო. ისტორიკოსი დიმიტრი ბაქრაძე სუსტი აგებულებისა იყო. ხელადიანი ყანწის გამოსაცლელად მას სული არ მოსდევდა, მაგრამ მაინც უარი არ უთქვამს. დაღვევით დალია, მერე გადმოაპირქვავა და ცერზე დაიბერტყა, ასე მტერი დაგეცალოთო. თვითონაც იქვე წაპირქვავდა, კინწი წასწყდა და ჩაიკეცა.

ილია გლეხების სუფრისაკენ გაემართა, გზაზე ცოტა ფეხი აერია, მაგრამ თავი შეიმაგრა და ღინჯად მიაღვა მეზობლებს.

- სხვა, როგორა ლხინობთ, სუფრას რამე ხომ არ აკლია? - იკითხა მან.
- ყველაფერი ბლომადა გვაქვს.
- დიდი მადლობა მოგვიხსენებია.

გაისმა ყოველი მხრიდან. როგორც მოძღვრიშვილი წერს თავის მოგონებაში, ილიამ თქვა: „თქვე ბრიყვებო, თქვენ რა მადლობლები ხართ, როცა თქვენი ნაშრომით ქეითობთო... როგორი მასპინძელიც მე ვარ, თქვენც ისე-

თივე მასპინძლები ხართ, რაც მე ცხოვრება მაქვს, ცოტა მე მეკუთვნის და ბევრი კი თქვენიაო“.

შეისვენა, ჯამი აიღო და განაგრძო:

- თქვენი სადღეგრძელო იყოს, შრომის შვილებო, ამ ქვეყანაზე რაც კარგი და ლამაზია, ყველაფერი თქვენი შექმნილია, იცოცხლეთ, იმხიარულეთ!

ჯამი გამოსცალა და შემდეგ წამოიწყო საყვარელი სიმღერა, „მუმლი მუხასა“.

გლებებიც აჰყვნენ.

მუმლი მუხასა გარს ეხვეოდა...

გუგუნებდა მწყობრად, ბოლოს ილიამ ხმა აუწია, თან მაგიდას მუშტები დაახალა.

მუმლი დაიღრჩო, მუხა გადარჩა.

სიმღერის შემდეგ ილია სოფლის ქალების სუფრას მიაღდა. ვინც ფეხზე წამოდგა, სთხოვა დაბრძანდითო, თვითონაც დაჯდა, სავსე ჭიქებს აღმაცერად გადახედა.

- „აბა, კარგა დრო გავატარეთო, ვიქეიფეთო, ღვინო კი ისევ ისე გიდგიათ, მიირთვით, დალოცეთ ცის ნამი და დედამინა, რომელიც ჩვენ უხვ მოსავალს და საზრდოს გვაძლევს“.

ილიამ ადღეგრძელა ქალები, მერე მოძღვრიშვილი მოიხმო და დაავალა: ქალებს ტკბილი ღვინო მარნიდან მოუტანეო.

ყანწმა თავის გაიტანა, ბევრი მოცელა, ბევრი სიმღე-

რისა და ცეკვის გუნებაზე დააყენა.

„აგერ ასიკო ცაგარელი თავის დამქაშებით, - წერს მანსვეტაშვილი, - უკვე ღვინით გაღებულებით, შესძახის თავის მეზურნეს. ჩაჰბერე ღუდუკს, გამაგონე მისი ტკბილი ხმა. ღუდუკის ხმა კი მართალია, ტკბილია, მაგრამ ასიკო რომ ზედ დაჰკვივის თავის ჩახლეჩილი უხამსური ხმით რალაცა შიქასტას, ეს კი, უნდა მოგახსენოთ, სიტკბოებას სრულებით არა ჰგავს, ეს უფრო ტურების კვილს მოგაგონებს. თუმც ამის დამქაშებს, ეტყობა, ძლიერ მოსწონთ, რადგან სულ „ჰაჯან-ჰაჯან-ს“ მისძახიან.

ამათვე ჯგუფშია ყველასაგან კარგად ცნობილი გიგო ყარანგოზიშვილი, განთქმული მოქეიფე, დარდიმანდი, ლოთი-ფოთი. სმაში ჯკუას არ კარგავდა, მხოლოდ სმა თავისებური ფოკუსებით იცოდა. მაგალითად, ღვინით სავსე ჭიქას დაიდგამდა ხელისგულზე, მერე ხელს ისე მოიღრეცდა, გადმოატრიალებდა, რომ ხელისგული ზემოდ მოექცეოდა, ჭიქაც ზედვე იდგა და არც ღვინო დაიღვრებოდა. ახლა ეს ღვინო უნდა დაეღია. ეს არც ისე ადვილი იყო: გადმობრუნებულ ხელს და მკლავს ისე ადვილად ვერ მიიტანდი პირთან. გიგო ამასაც ახერხებდა: მოიხრიდა კისერს, რაც ძალი და ღონე ჰქონდა, - ვშიშობდით, კისრის ძარღვები არ დაუწყდესო, - იმდენად გადმოიხრიდა წინ, რომ ნიკაპი თითქმის გულის ფიცარს მიეჭინებოდა. ამგვარად ხელის გულზე

მღვარ ჭიქას ტუჩებს მიუახლოვებდა და დაინყებდა ნელ-ნელა ღვინის წრუპვას. ჭიქას რომ ნახევრამდე მიიყვანდა, კბილებით სწვდებოდა თვით ჭიქას, ღვინოს გამოასარიელებდა და დაინყებდა ჭიქის კვნეტას. აქაც დიდ ხელოვნებას იჩენდა: ისე ჰკვნეტდა და ჰყრიდა პირიდგან შუშის ნამტვრევებს, რომ ოდნავაც არ გაიკანწრავდა არც ღრძილებს, არც ტუჩებს. ბევრისათვის ეს საზარელი, არა ესთეტიური სანახავი იყო, უნდოდათ ეთქვათ: გიგო, კმარა, შედექი! მაგრამ გიგო არტისტი იყო, ხელოვნურად ასრულებდა თავის როლს, თავი მოსწონდა და აბა ვინ ეტყვის არტისტს: მორჩი, არ მოგვწონს შენი თამაშიო!“

გიგო ყარანგოზიშვილი თავის ოინბაზობას რომ მორჩა, ილიამ ორივე ხელი ჰაერში ამართა.

- აბა, სმენა იყოს და გაგონება. - სიჩუმე რომ ჩამოვარდა, ილიამ იქვე მღვომ იავორა შამხოლაშვილს უთხრა:
- თუ მეტლე როსტიაშვილს წააქცევ, ერთი საუენი შეშა ჩემზე იყოს.
- მაღლობელი ვიქნები, - მიუგო შამხოლაშვილმა და ხალათი გაიხადა.

მეზურნეებმა საჭიდაო გაახურეს.

„დავეჭიდე, წავაქციე, - წერს შამხოლაშვილი, - რამდენიმე დღის შემდეგ მივედი და ილიამ ბრძანა ერთი

საუენი შეშა უფასოდ გამოუწერეთო, მივიღე“.

ჭიდაობის შემდეგ ხალხი რომ მიწყნარდა, ექვთიმე ხელაძე მივიდა ილიასთან და უთხრა:

- ბატონო ილია, შეარიგე ანტონ ფურცელაძე და ნიკო დიასამიძე.
- მე რა ვარ? - ჰკითხა ილიამ.
- საქართველოს მამა ხარ.

ამ ლაპარაკს ყური მოჰკრა იონა მეუნარვიამ, რომ არ დავიწყნოდა, მაშინვე უბის წიგნაკში ჩაიწერა.

გლეხებმა დააგუგუნეს მრავალუამიერი. მას „ყანწით ვსვამ ღვინოს“ მოაყოლეს. მაგრამ ყველაზე მწყობრად და ჰაეროვნად მღეროდნენ წინამძღვრიანთ კარის სკოლის მონათფეთა სუფრაზე.

დაღლილი ოღლა, თავის ოთახში, ტახტზე მიწოლილიყო. ელისაბედიც იქვე, მაგიდასთან იჯდა და ლიმონის წვენს მიირთმევდა. მონათფეთა სიმღერა რომ შემოესმათ, ორივე მანდილოსანი ფანჯარას მიადგა.

- მაგათ კი დავენაცვლე, ნახე როგორა მღერიან? - თქვა ოღლამ.
- კარგი ახალგაზრდობა მოდის, - ელისაბედმა ილიას მოჰკრა თვალი, - ქალო, კაცი დამთვრალა, მიდი, ამოიყვანე.
- მე რას დამიჯერებს!
- თვითონ თამაღამ თავს უშველა და ილიკო რას ელოდება?

- აკაკი სად არის?
- აგერ, გლეხის ქალებში დგას, ხედავ?
- ვხედავ, მაგას რა დაღლის, წავალ, ილიას ამოვიყვან.

ოღლა ებოში ჩავიდა. მაგრამ ილიასთან პირდაპირ მისვლა მოერიდა და მოშორებით გაჩერდა. დამინახავს და თვითონ მოვაო. დიდხანს იდგა. მოლოდინი არ გაუმართლდა. ილია ხან ერთ სტუმარს დაელაპარაკა, ხან მეორეს. მერე ასიკოსთან მივიდა, იმ წუთას მედუდუკეებმა ჩაჰბერეს. ილიამ ასიკოს ხელი გადახვია. ოღლა ისევ შებრუნდა ოთახში.

- რა ჰქენი? - ჰკითხა ელისაბედმა.
- ღვინო არ ეტყობა, ყოჩაღად არის, ვერ შევანუხე.

ოღლამ იცოდა ილიას ხასიათი, ერიდებოდა მის წყენინებას, უფროთხილდებოდა მის გულს, მის სულს. ყველაფერს საყვარელი მეუღლის სასიამოვნოსა და გასახარელს აკეთებდა. განსაკუთრებით იმ ბარათის შემდეგ ქმარმა გული და ხასიათი რომ უჩვენა, უფრო თავშეკავებული იყო. ის ძველი წერილი საგანგებოდ ჰქონდა შენახული და კითხვა-კითხვით ხელში შემოაცვდა.

„ოცდაოთხი წელიწადია ერთად ვცხოვრობთ, - წერდა ილია, - და ნუთუ ჩემი საძაგელი ხასიათი ვერ იცანი ჯერაც. განა არ იცი, რომ თუ მენყინა რამე, გულში ჩავიხ-

ვევ ხოლმე და შუბლს აღარ გავიხსნი არავის წინ, ვინემ გულიდამ ჯავრს არ გადვიყრი. ორმოცდაათის წლის კაცი ვარ და ხელახლად ხომ აღარ დავიბადები? განა მე კი არ ვიცი, რომ ამ ჩემის ხასიათით განუხებ, მაგრამ შენ იცი, რომ ეგ ხასიათია და უნდა შემინდო ხოლმე, ტყუილად დაგიბუღებია გულში რაღაც ეჭვები, მე შენი ისეთივე გულით პატივისმცემელი ვარ და მოყვარული, როგორც ოდესმე ვყოფილვარ. მეუბნები, ისე აღარ მეალერსები, არათერს არ მელაპარაკებო. ნუთუ არა ჰხედავ, რა ვაი ვაგლახში გავაბი ჩემი, ეხლა კი გეტყვი, უბედური თავი! განა არ ჰხედავ, რომ ერთი წუთი დღე და ლამ მოსვენება არა მაქვს და შენს ჩემის გულითადის და საყვარლის მეგობარის სამდურავს როგორღა გავეძლო! განა საკმაო არ არის, რომ აქეთ-იქით მტრობას, ცილისწამებას, ათასნაირს მწუხარებას, ჭირსა და ვაგლახსა ძლივს ავდივარ, ძარღვები სულ მომეშალა, ღონიდან დავიცალე, ჩემის საკუთარის ბედნიერებისათვის აღარ ვცოცხალვარ, - ნუთუ ეს ყოველი საკმაო არ არის, რომ შენი სამდურავებიც ზედ არ დაერთოს? შენ უნდა ამისთანა შემთხვევაში ხელი მომანლოდო შველისა, შენ უნდა გამიტკბილო მწარე ცხოვრება, შენ უნდა გადამაყრევინო ჯავრი და მწუხარება და მის მაგიერ შენ ჩემს ავკაცობას დასტირი ხოლმე და ჩემთვის გულსაკლავ სამდურავს მითვლი. ვიცი ბევრს განუხებ ჩემის უჟმურობით, მაგრამ შენც უნდა

ცოტა შებრალება იქონიო... ღმერთს ჩემთვის ალერსის ნიჭი და უნარი არ მოუცია და როცა მეტი გზა არ არის, რომ ალერსიანი სიტყვა უნდა ვუთხრა ვისმეს, მე თვითონ ვწითლდები. განითლებას კიდევ გავუძლებდი, სწორედ სულიერად ვიტანჯები ხოლმე. ასე მგონია ხოლმე, რომ გული შეურაცხველია, როცა წმინდად გულში შენახული გრძნობა პირით გამოითქმის. იგი გრძნობაა მართალი, რომელიც კატასავით დღე მუდამ არა სჩხავის და მზეთუნახავად დაბინავებულია გულში.

...ერთხელ და ერთხელ მერწმუნე, რომ თუ მოღრუბლულსა მხედავ, ეგ ჩემს უგემურ ხასიათს მიაწერე და არა იმას, რომ შენს ბედნიერებას მე გულგრილად ვექცეოდე. ბევრჯერ მეტი სიტყვა მომივა ხოლმე, ბევრჯერ გუნება ისე მომეშლება, რომ ლაპარაკის თავი არა მაქვს, ბევრჯერ დაფიქრებული და ხმაგაკმენდილი დავეთრევი, - უფრო ხშირად არც მოცლა მაქვს და არც ხალისი ხმის ამოღებისა და გართობისა, და შენ კი ყოველს ამას სამღურავის მიზეზად ჰხდი და შენდობის მაგიერ გულს მიკლავ ხოლმე“.

ტკბილი სიტყვა რას მიქვიანო, გახსოვთ ოთარაანთ ქვრივის ნათქვამი, დაახლოებით ილიაც იმას იმეორებს. საერთოდ ილიას ბევრი რამ აქვს თავისი პირადი თვისებებიდან მიწერილი ოთარაანთ ქვრივისათვის. აკი

ეუბნებოდნენ, ოთარაანთ ქვრივი ეს თვითონ შენა ხარო და იმასაც ჩაეცინებოდა ხოლმე.

მზე გადაიხარა და სალამო მოახლოვდა. ყველაზე ადრე მონათვეები წამოიშალნენ, შორი გზა ჰქონდათ და შინ დროზე მისვლა არჩიეს.

გლეხებიც თავიანთ გზას გაუდგნენ. კაკლის ქვეშაც მიჩუმდა სუფრა.

ლამემ ყველას დალლა და ღვინო აგრძნობინა. თვით გიგო ყარანგოზიშვილიც არაქათგამოცლილი ბალახზე წამოგორდა.

ოთახებსა და აივანზე ასამდე ლოგინი გაიშალა. ვისაც მოსვენება უნდოდა, მოისვენა, მაგრამ მათი მძიმე ხვრინვა, ქმენა, ბუტბუტი, ბოდვა ერთიმეორეში იყო არეული და სუფრის ამლაგებლებს უსიამოდ ჩაესმოდათ.

მზის ამოსვლას ვინ დაუცდიდა, ბევრი უთენია წამოხტა. ხელპირი დაიბანა, მაგრამ მაინც მოთენთვასა და ტანში მოშლას უჩიოდა.

ილიამ კი ყველას დაასწრო, ღვინო არ ეტყობოდა, მსახურთა შორის დაფუსფუსებდა და საუზმის თადარიგს იჭერდა. სუფრაც მალე გაიშალა. ზოგი ჩაის დაენათა, ზოგმა ღვინო მოითხოვა, ზოგმა ჭრიანტელა მოინდომა.

ილია კი ყველას ურჩევდა, ხელი არაფერს ახლო, ეხლავე, მსუქანი ხაში მოვაო. თვითონ მოიდგა ორჯამიანი, ჩაყარა შიგ თაშარი პური, ხაშით პირთამდე

შეავსო და ჭამას მაღიანად შეუდგა.

აკაკის აღგომა შეუგვიანდა. ვერც რაფიელმა ასწია წელი. ცოტა ხანს ლოგინში ისაუბრეს და მერე ადგნენ. აკაკიმ პირი დაიბანა, წვერი დაივარცხნა, ილიას გვერდით მიუჯდა და ხაში მოითხოვა, მხოლოდ ნიორი არ მიაკაროთო.

რაფიელმა კი ჩაი მოინდომა. ოღღამ ჩაისთან ერთად ლიმონიც მიართვა. იცოდა ლიმონი უყვარდა.

- გმადლობთ, კნენა, - რაფიელი ხელზე ეამბორა.
- ბატონო ილია, კახელ კაცს ჩაი უფრო არგებს თუ ხაში? - ჰკითხა აკაკიმ.
- არც ერთი არ აწყენს!
- მაშა. - დაუდასტურა რაფიელმა.

... გავიდა ერთი წელი. „ილიაობის“ ნათელ დღეს საგურამოს ისევ ეწვივნენ სტუმრები, მაგრამ ამჯერად გარდა ქართველებისა, უცხოელებიც ბლომად იყვნენ... ფრანგი პროფესორი ჟაკ ბერტილონი, იტალიელი პროფესორი ბოსკო, რუსი მწერალი ვასილ ველიჩკო, გერმანელი ლიტერატორი არტურ ლაისტი და სხვ.

უცხოელმა სტუმრებმა ნახეს ილიაობის ნამდვილი ლხინი და შექცევა. ქართული სუფრის ხვაფი და ბარაქა.

არც მეორე დღეს ჩაუვლია უქმად. ილიამ დროსტა-

რება საგურამოდან ზედაზენში გადაიტანა. მოგზაურობა კამეჩის ურმებით მოენყო.

მარჯვე ბიჭებმა ღვინით სავსე კასრი შეყენებულ ურემზე ააგორეს. გვერდით შოთებით სავსე კალათი მიუგეს, ჭედილასა და დეკეულს თოკით ფეხები გაუკრეს და ზედ აიტანეს. მერე თეთრ ტილოში შეხვეული ტაბაკად შემწვარი ვარიები, ცივად მოხარშული დედლები, თევზეული მიაყოლეს. ურემი კარგად დატვირთეს და გზას გაუყენეს.

ილია, მეორე ურმის კოფოზე დაჯდა, სტუმრებიც იქ ავიდნენ, მესამე ურემიც ხალხით გაივსო, ზოგი ცხენითაც წავიდა, პეტრე უმიკაშვილმა ქვეითად არჩია წასვლა, მას მხარში ამოუდგა დიმიტრი ბაქრაძე. ილია ოქრომჭედლიშვილმა ლომა კამეჩებს სახრე გადაუშეულია.

მზე ახალი ამოსული იყო. გრილოდა, ყველას სიამოვნებდა მამაპაპური ურემი, მაგრამ გზა იყო ოღრო-ჩოღრო, ნჯღრევას ვეღარ გაუძლეს და ისევ ქვეითად ამჭობინეს სიარული.

ილია არ ჩასულა ურმიდან. კამეჩებს უღელი რომ შეუმსუბუქდათ, ფეხს უჩქარეს. ურმის ჭრიალმა, სიმღერებმა, ცხენების თქარა-თქურმა მიდამო გააღვიძა.

გაიღვიძა თვით ზედაზენმა და მისმა ძველმა მონასტერმაც.

მართალია, სტუმრებმა ძნელი და გრძელი გზა გამო-

იარეს, მაგრამ ტყის სილამაზემ, ანკარა წყაროებმა დაღლილობა გაუნელა და ზედაზენზე ამოსულებმა თავი მხნედ იგრძნეს.

ზედაზნიდან მთელი საქართველო მოჩანდა. თბილისი, ყარაიაზის უდაბნოზე არშიასავით შემოვლებული მტკვარი, მცხეთა, არაგვის ხეობა, როგორც იტყვიან, ხელისგულზე დაჯდა.

როცა დაღამდა, კოცონი აბრიალდა. გაშლილი სუფრის მახლობლად, მწვადები შიშხინებდა.

„მაგრამ ჭამის მადა ვილას ჰქონდა, - შენიშნავს მანსვეტაშვილი, - გუმინდელი ნაქეიფარნი, შორი და ძნელი გზით დაღლილნი იმას ვფიქრობდით მხოლოდ, რომ როგორმე დაგვესვენა. შევნაყრდით ცოტათი და საძილოთ მოვემზადეთ. ლოგინი რომელიც საკმარისად იყო წამოღებული, გაშალეს მინაზე, პირდაპირ ცის ქვეშ. ბევრმა უკვე დაიძინა, მაგრამ აღმოჩნდნენ ისეთებიც, რომელთაც ძილს ღვინო არჩიეს. შექეიფთდნენ და ისეთი ყიჟინა ასტეხეს, მრავალჟამიერს ისე გაჰკვიოდნენ, რომ არამცთ თუ აქ, ტყეში ნადირი და ფრინველი დამფრთხალიყო მგონი, თბილისშიაც კი უნდა ჩასულიყო ამათი ხმა. მთელი ღამე ამათ გამო ჩვენს თვალს ძილი არ მიჰკარებია. პეტრე უმიკაშვილიც კი, ეს პანანინა, უჩინარი, სუსტი კაცი, ესეც კი აიყოლია ღვინომ და მთელ ღამეს დაფროტიალეზ-

და და მძინარეებს თავს დასტრიალებდა. პეტრეს ცოტა ქალაჩუნა ხასიათი ჰქონდა. კარგი ლალასავით ყველასათვის მოეწყო. ვის საბანს გადახურავდა, თუ გადახდილს ნახავდა. ვის ბალიშს გაუსწორებდა, მეტადრე თავს ევლებოდა დ. ბაქრაძეს და ილია ოქრომჭედლიშვილს.

- აბა, ილიაჯან, კარგად დაიხურე, არ შეგცვივდეს, - და თან საბანს უსწორებდა. ერთი ხელით საბანს უსწორებდა და მეორე ხელში კი ღვინით სავსე აზარტეშა ეჭირა. და რადგან ღვინოს კარგად დაეძალა და ხელში სიმაგრე აღარა ჰქონდა, ამიტომ აზარტეშიდგან ღვინო ეღვრებოდა და ოქრომჭედლიშვილს, რომლისთვისაც პეტრე ასე ზრუნავდა, თავზე და პირზე დასდიოდა. ოქრომჭედლიშვილი ერიდებოდა პეტრეს წყენას და ვერა ეთქვა რა, მხოლოდ ამას კი ეუბნებოდა:

- გმადლობთ, პეტრეჯან, გმადლობთ! მაკმარე.

გედაზნის ამ ღამეს, ქართულ მოლხენასა და სტუმართმოყვარეობას, შემდეგ, თავის სამშობლოში დაბრუნებული პროფესორი ჟაკ ბერტილონი ბევრჯერ ნატრობდა. მის მესხიერებაში წარუშლელად აღიბეჭდა ილიასთან საუბარი, ქართული ზღაპრები და თქმულებები...

1897 წელს 9 ოქტომბერს პარიზიდან მოვიდა წერილი. ილიამ მოუთმენლად გახსნა კონვერტი.

ბერტილონი სწერდა:

„ჩემო ძვირფასო თავადო!

თქვენთან გატარებული ორი დღე დარჩება ყველაზე უფრო მომხიბლავად ჩემს ცხოვრებაში. ეს დღეები ჭკუის სასწავლებელიც იყო. რა დიდი სიამოვნებით ვისმენდი მშვენიერ ქართულ ლეგენდებს, ანდაზებს, რომელნიც თვით თქვენი ხალხის სულის გამომხატველნი არიან და ბოლოს ხალხური სიმღერები, რომლებიც თქვენ მოგვასმენინეთ, ძალიან საინტერესო იყო. მე ბედნიერი ვიქნები, როცა ამ შთაბეჭდილებებს გავაცნობ ჩემს ქვეყანას. ბევრჯერ გადავიკითხე თქვენი პოეზიის ზოგიერთი თარგმანი, რამაც, ხალხის გამიღვიძა სხვების გაცნობისა. რა საწუხაროა, რომ ჩვენი მანდ ყოფნა ასე ხანმოკლე იყო, რა ძალიან მინდა, რომ დავბრუნდე თქვენს მომხიბლველ ქვეყანაში. როდის შემეძლება ხელახლა მისი მონახულება, უფრო ხანგრძლივად მისი ხილვა.

კამეჩებით მთაში გასეირნება, ეს რელიგიური ცერემონიები ასეთი სადა და მიმზიდველი ძველ მონასტერში, საოცარი დღეები იყო, რომლის მსგავსს მე ვერასოდეს ვერ ვნახავ, ხოლო დაუფიქრარი კი დარჩება ჩემს მეხსიერებაში.

რა მომხიბლავია პრინცესა! როგორ კეთილი იყო იგი ჩვენთვის! მისი სახის ნაკვთები წარუშლელად

დარჩება ჩემს მესხიერებაში, როგორც სიკეთის გამოხატულება. მე გთხოვთ, გადასცეთ მას, თუ რაოდენ მაღლიერი ვარ მისი მომხიბლავი სტუმართმოყვარეობისა.

მას და თქვენ, ჩემო ძვირფასო თავადო, გიგზავნით ჩემს ყველაზე უფრო გულმხურვალე სურვილებს და დადასტურებას ჩემი თქვენდამი დიდი პატივისცემისა და ერთგული თანაგრძნობისა“.

ზედაზნის ღამე, ის ლხინი და სტუმრები აღწერილი აქვს არტურ ლაისტსა და გერმანელებშიც დიდი ინტერესი გამოიწვია ილია ჭავჭავაძემ, მისმა ცხოვრებამ და შემოქმედებამ.

არც პროფესორ ბოსკოს ჩაუტანია ეს ამბავი საფლავში. მისი წერილებით იტალიელებმა ბევრი რამ გაიგეს საქართველოზე, მის კულტურაზე, იქაც გაისმა ილია ჭავჭავაძის სახელი.

არც ველიჩკო ჩამორჩა ვინმეს. მისმა ლექსებმა და ნარკვევებმა რუს მკითხველებს ნამდვილი საქართველო, მისი მწერლები და კულტურა გააცნო.

ილია ჭავჭავაძის ილიაობა საქართველოს საზღვრებს გასცილდა.

ოცნება კახეთის რკინიგზის მშენებლობაზე

კახეთის რკინიგზის მშენებლობაც ბანკის თავსატეხი გახდა. მთელი დასავლეთი საქართველო თითქმის დაისერა ფოლადის მაგისტრალით, მაგრამ კახეთს, ამ უმდიდრეს კუთხეს, არაფერი ეშველა. ათეულ წლებით გაგრძელდა დავა, გავიყვანოთ თუ არა რკინიგზის ხაზიო. ბოლოს ილიამაც აიმაღლა ხმა.

„დღეს კახეთი საკუთარ გზას ითხოვს, - წერდა იგი, - მაშასადამე, ძვირად დაუჯდება თუ იაფად, ორივეს თითონ იკისრებს და თითონ გაუძღვება. საქმე იმაშია, რომ დღევანდელი მონინაალმდევნი კახეთის გზისანი ამტკიცებენ, რომ კახეთი ვერ გაუძღვება რკინიგზის ხარჯსაო და, მაშასადამე, რკინიგზა თავის ხარჯსაც ვერ ააყენებს და ზარალში იქნებაო.“

ბოლოს, როგორც იქნა, დაიწყო საძიებო სამუშაოები, მოვიდნენ სპეციალისტები, მაგრამ მათ ფული სჭირდებოდა და ეს ფულიც - თხუთმეტი ათასი მანეთი ბანკმა გაიღო.

ილია ვერ მოესწრო კახეთის რკინიგზის მშენებლობის დამთავრებას, მისი გარდაცვალებიდან რვა წლის შემდეგ შეჰკვივლა მხოლოდ კახეთისაკენ მიმავალმა პირველმა ორთქმავალმა.

P.S. 1913 წელს, ილია ჭავჭავაძის დისშვილის - კონსტანტინე აფხაზის უშუალო ხელმძღვანელობით დაიწყო კახეთის რკინიგზის მშენებლობა (მასალა ვიკიპედიიდან).

ილია ჭავჭავაძე



დაბ. თარიღი	27 ოქტომბერი (8 ნოემბერი) 1837
დაბ. ადგილი	ყვარელი
გარდ. თარიღი	30 აგვისტო (12 სექტემბერი) 1907 (69 წლის)
გარდ. ადგილი	წინამური
დასაფლავებულია	მთაწმინდის პანთეონი
საქმიანობა	პოლიტიკოსი, პოეტი, გამომცემელი, ფილოსოფოსი, მწერალი, ისტორიკოსი და ჟურნალისტი
ენა	რუსული ენა და ქართული ენა
ეროვნება	ქართველი
მოქალაქეობა	რუსეთის იმპერია
Magnum opus	კაცია ადამიანი?! და განდევნილი
ხელმოწერა	

ს ა რ ჭ ე ვ ი:

• ყვარელი	11
• პეტერბურგში	35
• ბარათაშვილი	113
• აკაკი	131
• სამეგრელოში მოვედი და საქართველო ვნახე	142
• ვაჟა-ფშაველა	157
• დუელი	170
• ილიაობა	182
• ოცნება კახეთის რკინიგზის მშენებლობაზე	206

ელგუჯა ადეიშვილი

„ილია და... რკინიგზა კახეთში“

Elguja Adeishvili

„Ilia da... Rkinigza Kakhetshi“

გამომცემლობის

რედაქტორი

- მერაბ ჯულაყიძე

მხატვარი

- მურმან გელენიძე

თბილისის სახელმწიფო სამხატვრო

აკადემიის პროფესორი

მხატვრული რედაქტორები - თინათინ გეგეშიძე

- სოფიკო ბოლქვაძე

ტექნიკური რედაქტორი

და კომპიუტერული

უზრუნველყოფა

- თამარ ფოფხაძე

კონსულტანტი

- ლუიზა ადეიშვილი

კორექტორი


- ნუნუ ადეიშვილი

თბილისი

2020

გამომცემლობა „უნივერსალი“, 2020

თბილისი, 0186, ა. პოლიბაოვსკაინის №4, ☎: 5(99) 33 52 02, 5(99) 17 22 30
E-mail: universal505@ymail.com; gamomcemlobauniversali@gmail.com



საქართველოს რკინიგზა შავი და კასპიის ზღვებს შორის მდებარე ევრაზიის სატრანსპორტო არტერიის ერთ-ერთ უმნიშვნელოვანეს ნაწილს წარმოადგენს, რომელიც უმოკლესი გზით აკავშირებს ევროპასა და ცენტრალურ აზიას.